

## APASORO NAU MUMAWA Siosi Amatonewa Gaiyawa

### *God Iesu Aug Kwimin Dana Dog Aine*

<sup>1</sup> ✧ Teopiras, buka neuma namuwa danave, Iesu me amatog nau anewa ge toewan munnewa undag tena. <sup>2</sup> ✧ Iesu apasoro gomiyamun, Guwawa Iyakaisiyapama gumbe dirumne. Ivi God me aug kwimin dog aine. Amatonewa kumiwa ge me dog aine kumiwa bunangave gaiyawa undag tena. <sup>3</sup> ✧ Me edawai aune, ivi kum 40 danave membo mu gumbo uwamunne. God toimuwawa oya wag dirumne. Sira natawa obiren gumbo me membo inainewa apasoro mu toyaumunne. <sup>4</sup> ✧ Iesu mu gaibu wakeyawa, me gwangwan mame dirumne, “Ye Jerusarem den kweya. Ye gunap Maman agi meuma anoyana. Me amaraya. <sup>5</sup> ✧ Kuiyawa Jon me yoi gumbe babataito yenne, megara pipi mame danave ye Guwawa Iyakaisiyapama gumbe babataito aya.”

<sup>6</sup> ✧ Mu desirom agoniyag aib singui waya, “Aya-pan, ge kum mame gare agege Isuraeru toimu numawa sira siya?”

<sup>7</sup> ✧ Iesu dirumwane. “Kum ge at koniwa yaug anotan den waya. Me Mamawa mekut yusiwa baraune me yaug anone. <sup>8</sup> ✧ Megara

---

✧ **1:1:** Ruk 1:3 ✧ **1:2:** Mak 16:19; Ruk 24:49-51 ✧ **1:3:** Ruk 24:36-49; Apa 10:41 ✧ **1:4:** Ruk 24:49; Jon 14:16-17; Apa 2:33  
✧ **1:5:** Mat 3:11 ✧ **1:6:** Ruk 24:21 ✧ **1:7:** Mak 13:32 ✧ **1:8:** Mat 28:19; Ruk 24:48

Guwawa Iyakaisiyapama guniyap uwapewa yu-tuiwa auya. At Jerusarem, at Judia ge Samaria undag, sira at piyu gina pusiwa apa ye yangeyap yauyanawa nauwawa aya.”

<sup>9</sup> Iesu mame wane, meve mu yaveme dog aine, sira irikup me tobodne me den yauya.

<sup>10</sup> Iesu dog aiviwa mu temtem kwimin yaveme. Yauya, apan duwam wape puipuyu eniyawa mu megiyowo wan yoiya. <sup>11</sup> ✧Mu waya, “Gariri igiyawa, ye diwan mapa yokeg kwimin yavene? Iesu mame kweyeg kwimin dog ainewa, me sira uwape ye aninin yauyanawa mina di.”

### *Matias Me Judas Arawa Aune*

<sup>12</sup> ✧Mu waya tui Orivu apa Jerusarem sira taig amiya. Tui mame Jerusarem megiaive sira Sabat kumive oma ape ampe. <sup>13</sup> ✧Mu gwetoimu kokawa uwayawa, mu gwe dana painau pantut doreg amiya. Meapa mu wakeeme. Uwayawa mu Pita, Jon, Jemus ge Andru, Pirip ge Tomas, Batoromiu ge Matiu, Arupies usiwa Jemus ge Jerot abnawa Saimon, ge Jemus usiwa Judas. <sup>14</sup> Mu undag desirom agoniyag nun veme. Mu vesin da gaibu, Meri me Iesu inawa ge Iesu gwanebaviwa gaibu.

<sup>15</sup> Kum me apa undag tatawaviwa 120 mina wakeya sira Pita mu danowo wan yoine. <sup>16</sup> ✧Me wane, “Tatangwanen, Judas me ebu iyayapan toewan munne mu Iesu yumiya. Guwawa Iyakaisiyapama Devid noive gumbe Judas oya matai matatpewa gaiyawa wane. Me gigirum

---

✧ **1:11:** Mat 26:64; Ruk 21:27   ✧ **1:12:** Ruk 24:50-53   ✧ **1:13:** Mat 10:2-4   ✧ **1:16:** Sam 41:9

tenewa me matadne. <sup>17</sup> Judas nu gunup wake-newa me nau mame ane.”

<sup>18</sup> ✧(Me kukaeba meuma oya garawa aune, me gumbe piyu gwiruwadne. Sira me apa kuiyaven aigne, me kwapiwa dumedne danawa taibe ane. <sup>19</sup> Jerusarem danave mame iyayapan undag yaug anoya. Sira piyu mame gae muma gumbe mu waya, Akerudama me natawa Gani-gani Piyuwawa.)

<sup>20</sup> ✧Sira Pita wane, “Buka Sam me gumbe tene, ‘At meuma dividivi den yaipe. Me apa bira da den wakepe.

Sira apan da me arawa aupe.’

<sup>21</sup> Me oya Ayapan Iesu nu gunup vin wakeivi kumiwa apa, <sup>22</sup> ✧me Jon Babataito amatog onne God Iesu gunup aug dog ainewa. Me kumive nu gaibu nau atu danunup apan da desirom nu gaibu Iesu sira inai yoinewa yangave yaunewa ape.”

<sup>23</sup> Meve mu apan duwam wagomiyaya. Mu Josep, me Barusabas waya sira iviwa da Jastas, ge Matias. <sup>24</sup> Meve mu nun waya, “Ayapan, ge iyayapan undag nonowa yaug anoana. <sup>25</sup> Ge wagomiyana duwam mame dana ambuwa apasoro nauwawa mame aug amarapewa toyau nuna. Judas kweg at meuma aine.” <sup>26</sup> Meve mu kae bumpai mina ayawa, me Matias namive aigne, meoya me apasoro 11 gumbo agoniya.

## 2

### *Pentikost Apa Guwawa Iyakaisiyapama Aigne*

---

✧ **1:18:** Mat 27:3-8    ✧ **1:20:** Sam 69:25; 109:8    ✧ **1:22:** Mak 1:9; 16:19; Jon 15:27

<sup>1</sup> ✧Pentikost kumiwa uwanewa, mu undag at desirom agonyag wakeya. <sup>2</sup> Pungi den wane mu noiwa anoya, taig yusipamit kwimin apa toivi mina. Me gwe undag mu wakeyawa noidauwane. <sup>3</sup> ✧Iyam meru pednawa minawa ube ube onke mu desirom desirom egowo wakeya. <sup>4</sup> ✧Mu undag Guwawa Iyakaisiyapama gumbe demtawa auya. Sira mu amatog gae ube ube waya, kuiyawa Guwawa Iyakaisiyapama gae watan oya waita munne.

<sup>5</sup> Gare, Jerusarem apa God gumbe aepam petat toeme Ju igiyawa wakeya. Mu kwimin ankwatave at undag apa onam wakeya. <sup>6</sup> Noiwa mame pawanewa, iyayanan obiren agonyag uwaya. Mu teraya, kuiyawa mu desirom desirom gae muma ubeube aigowawa veme anoya. <sup>7</sup> Mu yaug anog teraya, sira mu waya, “Iyai mame gae vemewa undag Gariri igiyawa go? <sup>8</sup> Mu desirom desirom gae numawa veme mu anoetewa, mame aninin? <sup>9</sup> Nu Parutia, Medes, Eramaiti igiyawa, sira Mesopotamia apa, Judia apa, Kapadosia apa, Pontas apa, Esia apa, <sup>10</sup> Prigia apa, Pampiria apa, Ejipt ge Sairin megiyave Ribia apa vinetewa, sira Romu apa amdau onamiyawa, <sup>11</sup> Ju igiyawa ge iyayanan mu anotumat mumawa yankweg Ju anotumat mumawa gumbe anotumat ayawa gaibu wakeya. Sira Kurete ge Arab igiyawa mu gae numa gumbe God yusipamit aiviwa gaiyawa veme anoete. Mame aninin!” <sup>12</sup> Mu yaug terag anopipanum eme, sira mu garawano aya, “Mame natawa divi?”

---

✧ **2:1:** Rvt 23:15-21; Deu 16:9-11 ✧ **2:3:** Mat 3:11 ✧ **2:4:** Mak 16:17; Apa 4:31; 10:44-46; 19:6

13 Megara upeba mu gumbo iyagau ake waya,  
 “Mu wain kokavit naya.”

*Pita Iyayapan Obiren Dirumne*

14 Meve Pita apasoro 11 gaibu wan yoik noiwa  
 gae yabdapam iyayapan dirumne. “Ne iyayapan  
 neuma Ju igiyawa ge Jerusarem apa wakeemewa  
 undag, mame yaimoyai guniyap watna naunewa  
 ne gunap. 15 Ye meib anovene. Megara iyayapan  
 mame mu wain den naya, kuiyawa kum gare 9  
 mumbevit. 16 Mame propeta Joeru wanewa.

17 ☆Kum oieba God wape,  
 ne Guwawa neuma iyayapan undag gumbo  
 egampna.

Ye usitainewa ge gwaiteaiwa God gaiyawa wape.  
 Ud mataiwa irakoniwa uyavi minawa yaupe,  
 sira iyai tayawa mu uyavi gumbe yaupe.

18 Me kumive, nau neuma eme igiyawa, apan ge  
 vesin gaibu,  
 mu gumbo Guwawa neuma egampna,  
 sira mu God gaiyawa wape.

19 Ne opa kwimin danave anopipantumowa toyau  
 muntna,  
 sira epa piyu egave irakoniwa toyau muntna.  
 Mu ganigani ge iyam ge aup dog aipewa.

20 Kum me tobiyape sisip uwape,  
 sira dud me tobiyape ganigani ape,  
 meve Ayapan eyawa kokawa kumiwa uwape.

21 Megara me apa undag me Ayapan iviwa gumbe  
 auwapewa  
 matai waita waita aupe.

22 Isuraeru igiyawa ye mame anoya. God me Nasaret apan Iesu wagomiyane ye guniyap irayauyau, anopipanumowa ge at irakoniwa ane. God apan mame yenan taibe ane. Ye yembovit mame yaug anoya. 23 God yumateba ge ano meuma me matai dimbae matatpewa yaug anopewa gumbe apan mame God barau yenne. Sira ye apan mame kukaeba igiyawa nanuwo gumbo barauyana korosi egave toya boane. 24 God me bo dawaeba gumbe warinamne sira inaig yoine. Kuiyawa me gumbe mina den ane, me bo aug yumnatpe.

25 ✧Devid me oya wane:

‘Evedni ne Ayapan namunap yaveni.  
Me ne nanin yutanwa apa wakene,  
meoya ne ipunapun den atna.

26 Meoya ne nonenwa me degadega ane,  
sira ne pednanwa degadega noiwa uwane.  
Ne kwapunwa gaibu owanowan gumbe wakepe.

27 Kuyawa ge ne guwanwa ades\*  
danave den wakepe.

Apan iyakaisi geuma den kweya putaipe.

28 Inaiinai ebuwawa toyau negana,  
sira ge namugap degadega neuma noidauwape.’

29 ✧Tatangwanen, ne natawa di diruitna. Isimuranewa Devid boane siya, me yampotawa gare mapa gunup. 30 ✧Me propeta, meoya me anone wagoba da matai kin arawa aupe God agi gumbe wane. 31 ✧Me yavivi ivi anin ape, Iesu sira

---

✧ 2:25: Sam 16:8-11 \* 2:27: Me at kukaeba arawa. Anotumat den eme igiyawa matai ampe. ✧ 2:29: 1Ki 2:10 ✧ 2:30: 2Sm 7:12; Sam 89:3-4; 132:11 ✧ 2:31: Sam 16:10

inainewa gaiyawa wane, ‘Me ades danave evedni den kwepe kwapiwa den puwaipe.’ <sup>32</sup> God me Iesu mame sira inaine, sira nu undag me yangunup yautu. <sup>33</sup> ✧Sira God Iesu aug nanin yutanwa apa baraune. Iesu Mamawa gumbe Guwawa Iyakaisiyapama aune me Mamawa me gumbe wait agi wanewa. Iesu Guwawa Iyakaisiyapama egamne gare ye mame yavene sira anoenewa. <sup>34</sup> ✧Devid kwimin den dog aine. Me wane, ‘Ayapan me Ayapan neuma wane. Nanin yutanwa apa wakeya. <sup>35</sup> Ivi ne anavi geuma ne atna amag ankwatave barautna.’ <sup>36</sup> ✧Meoya, Isuraeru igiyawa undag, mame yai yaug anotanit di. God me Iesu mame Ayapan ge Keriso anewa, ye korosi gumbe toyana.” <sup>37</sup> Meve iyayapan mame anoyawa, mu nonomagowa mut mina yuwamiya, mu Pita ge apasoro upeba gumbo waya, “Tatangwanen, nu anin aton?” <sup>38</sup> Pita gara wane, “Ye undag desirom desirom nonemagewa biroriyape kukaeba yeuma yankweya, sira Iesu Keriso iviwa gumbe babataito auya, me kukaeba yeuma anog yankwepe. Sira puyo meuma me Guwawa Iyakaisiyapama auya. <sup>39</sup> ✧Agi mame yenan ge ye usitainewa ge iyayapan undag painau wakeyawa oya munne. Natawa me iyayapan undag Ayapan God numawa wagomiya munnewa mu munan munne.” <sup>40</sup> Pita gae upeba gaibu taibe dirumwane, “Kukaeba kum garewa apa yaimoyai ayun wariya.” <sup>41</sup> ✧Iyayapan gae meumawa

---

✧ **2:33:** Apa 5:32; 7:55-56 ✧ **2:34:** Sam 110:1 ✧ **2:36:** Apa 5:30-31 ✧ **2:39:** Ais 57:19 ✧ **2:41:** Apa 2:47; 4:4

auyawa mu babataito auya. Me kumive iyayapan 3,000 mina agoniyag aigowawa aya.

### *Anotumat Igiyawa Baigan Mumawa*

<sup>42</sup> ✧Mu apasoro toewanewan mumawa yaimoyai yumateme, baigan amuneme, bredi warensieme sira nun veme. <sup>43</sup> Iyayapan undag teraya. Apasoro anopipanumawa ge irakoniwa obiren aya. <sup>44</sup> ✧Anotumat igiyawa agoniyake dividivi undag divi da den wane me nekut neuma. <sup>45</sup> Tawara ge dividivi kusiwa mumawa gwiruwareme anmagawa auke, bira da mu anoemewa keb ag muneme. <sup>46</sup> Kum evedni mu temporu arawa danave danowa desirom toboreme. Mu gweyowa danave bredi warensiya sira toborake nakwai naya degadega ge danowa oraivit gumbe. <sup>47</sup> ✧Mu God waragateme sira iyayapan undag mu gumbo baigan amuneme. Sira Ayapan kum evedni waita waita auyawa mu desirom toboraya.

## 3

### *Pita Me Apan Da Amawa Gegerainewa Wari-namne*

<sup>1</sup> Kum da apa nun watan kumiwa me augoi kum koniwa 3 mina\* Pita ge Jon temporu dog amiya. <sup>2</sup> Gare apan da amawa gegerainewa meib di yainewa me evedni yotug am temporu ankwin noiwa me iviwa “Kakare Oraivitwa” apa barauya. Apan mame temporu arawa unigemewa gumbo

---

✧ **2:42:** Apa 20:7 ✧ **2:44:** Apa 4:32-35 ✧ **2:47:** Apa 6:7; 11:21 \* **3:1:** Watavit, me kum koniwa 9 mina Isuraeru kum muma gumbe.



nun waivi. <sup>3</sup> Meve me Pita ge Jon unig ataneme yawamne. Mu gumbo divi da oya nun wane. <sup>4</sup> ✧Pita yangut temtemtem yaune, Jon sira meib. Pita wane, “Nu yaununa.” <sup>5</sup> Sira me mu gumbo owanowan ane divi da aupe. Apan me mu gumbo yangut yawamne.

<sup>6</sup> ✧Sira Pita wane, “Siruva ge gooru ne gunap onan. Go, dimbae da ne gunap ne ge gentna. Nasaret apan Iesu Keriso iviwa gumbe aga.” <sup>7</sup> Nani yutanwa gumbe me wan aune. Sira tatevit apan me amawa ge koniwa yusi wane. <sup>8</sup> Me amave owan em yoik sira amatog a aine. Sira me a aivi, pisiapisia aivi ge God gumbe waiyaivi mu gaibu temporu arawa dana unig amiya. <sup>9</sup> Iyayapan undag me a aivi sira God gumbe waiyaiviwa yauya. <sup>10</sup> Mu yaug anoya me apan desiroma temporu arawa ankwin noiwa “Kakare Oraivitwa” waya apa yan wakek nun waivi. Mu me gumbe divi matadnewa mu yawak teraya.

### *Pita Wane Temporu Danave*

<sup>11</sup> Me Pita ge Jon gumbo kwab nadnewa, iyayapan undag terake kinikinipam onam gumbo at iviwa waya Soromon ebuwawa gwanob gaibuwa uwaya. <sup>12</sup> Pita mame yaune, me mu gumbo wane, “Isuraeru igiyawa, dimbae oya mame ye terayana? Dimbae oya ye yangut yau nunene, ye anoene nu nukut yutunwa go anotumat numawa gumbe apan mame warinamtu? <sup>13</sup> ✧Ebraam, Aisak ge Jakob God mumawa, sira isimuranaiwa

---

✧ **3:4:** Apa 14:9 ✧ **3:6:** Apa 4:10; 16:18 ✧ **3:13:** Eks 3:6,15; Ruk 23:13-25; Apa 2:23

God mumawa, me eyawa meuma nau meuma abnawa Iesu wanne. Ye me toen guttan oya nanuwo barauyana. Pairat me yan kwepe aipe wane, go ye Pairat namive me topayayana. <sup>14</sup> Ye Iyakaisi ge Oraiwa abnawa topayayana, sira wayana iyayapan gurivi abnawa yan kwepe aipe. <sup>15</sup> Ye inaiinai kuiyabariwa toen guriyana. Megara God me Iesu bo igiyawa gumbo warinamne. Nu yangunup me yautu. <sup>16</sup> Iesu iviwa gumbe, sira anotumat meuma gumbe, apan mame me ye gare yaug anoenewa yusiwa aune. Anotumat me Iesu gumbe onnawa, ye undag namuyap apan mame ui kwapiwa undagit inaine.

<sup>17</sup> ✧Tatangwanen, ne anona. Namu yoiyoi yeumawa ayawa mina ye ayana. Kuiyawa ye den yaug anoyana. <sup>18</sup> Megara God namu wane Keriso edawai aupe, propeta undag mu nouwo waya. Gare God me ane matadne. <sup>19</sup> ✧Nonemagewa biroriyaya, meve God oya tobiyaya. Meapa God kukaeba yeuma undag muimpe. <sup>20</sup> Waribiyatan kumiwa Ayapan gumbe uwape. God Keriso baraupe ompe. God yenan wagomiyanewa me Iesu. <sup>21</sup> Iesu kwiminaw wakene, sira God dividivi undag mataiven biroriyatanwa kumiwa uwape, meve Iesu uwape. Me kumiwa oya, propeta iyakaisiyapama nouwo God watavit kum obiren agi wane. <sup>22</sup> ✧Mosisi wane, 'Ayapan God yeuma yenan propeta ne mina wan yoipe ye dam desiroma yapeyap. Ye naunewa taig dividivi undag ye guniyap waiviwa anoya. <sup>23</sup> Bira da propeta me gumbe naunawa den taig anopewa, me iyayapan

---

✧ **3:17:** Ruk 23:34; 1Ti 1:13    ✧ **3:19:** Apa 2:38    ✧ **3:22:** Deu 18:15,18-19

meuma gumbo atan kwagomiyape onanape.’

<sup>24</sup> Sira, propeta Samueru gumbe amatog onne propeta upeba onamiya. Mu undag, kum garewa gaiyawa waya. <sup>25</sup> ✧Ye propeta usitainawa. Ye agisiyawa usitainawa. God isimuranaiwa gumbo agisiyawa wadne. God Ebraam gumbe wane, ‘Ge wagogaiwa gumbo iyayapan undag piyu egave waribiyape.’ <sup>26</sup> ✧Namu God nauwawa aiviwa wan yoine yenan baraune onne. Kuyawa me waribiya yempe sira ye desirom desirom kukaeba yeuma gumbe tobiroriya yempe.”

## 4

### *Pita Ge Jon Daiboru Painauvitwa Apa*

<sup>1</sup> Pita ge Jon iyayapan dirumemewa, pirisi igiyawa ge temporu amat namu yoiyoi abnawa ge Sadusi igiyawa mu gumbo uwaya. <sup>2</sup> Mu anopipanum kokavit aya, kuyawa Pita ge Jon iyayapan toewanewan eme sira Iesu bo tog sira inaine me ebu meib, mu bo gumbe inai mutpewa igiyawa gaiyawa dirumeme. <sup>3</sup> Mu Pita ge Jon yu-mamiya. Augoi arivi oya, mu nog dana teya waya umae mumbe kwempe dauwag ampe. <sup>4</sup> ✧Megara iyayapan obiren gae anoyawa mu anotumat aya. Apan 5,000 mina anotumat aya.

<sup>5</sup> Umaewa namuyoiyoi igiyawa, iyayapan amareme igiyawa ge Gwangwan toewanewan mu Jerusarem apa toboraya. <sup>6</sup> Pirisi painauvitwa Annas, Kayapas, Jon, Arekisanda sira iyayapan upeba pirisi painauvitwa dam meumawa gaibu

---

✧ 3:25: Gen 22:18 ✧ 3:26: Apa 13:46 ✧ 4:4: Apa 2:41

mu me apa. <sup>7</sup> Mu waya Pita ge Jon mu namuwu tam onampe. Mu amatog singui muneme, “Dimbae ano yusiwa gumbe go dimbae iviwa gumbe ye mame ayana?”

<sup>8</sup> Meapa Pita Guwawa Iyakaisiyapama gumbe noidauwane, mu gumbo wane, “Namuyoiyoi igiyawa ge iyayapan amareme igiyawa! <sup>9</sup> Ye gare singui nuntan oya tamnun oniyana. Kuyiawa me nu yuwat abnawa gumbe oraimina atu sira me dimbae gumbe inaine oya yavene ipewa, <sup>10</sup> ✧ye ge Isuraeru igiyawa undag, mame anoya. Apan mame yuwat meuma undagit onanane ye namuyap yoiviwa, me Nasaret apan Iesu Keriso iviwa gumbe. Ye Iesu korosi egave toyana megara God me bo gumbe inaig yoine. <sup>11</sup> ✧Apan mame me,

‘An me gwe sisi igiyawa topayayawa,  
me an natawa oraivitwa me visidonawa apa  
teyawa ane.

Mame Ayapan ane.’

<sup>12</sup> ✧Bira da waita oma ape den numpe. Apan mame mekut waita numpe. Kwimin ankwatave God iyayapan yapowo iviwa da den wanne. Iviwa mame mekut gumbe nu waita oma ape auta.” <sup>13</sup> Mu yauya Pita ge Jon ano yusiwa auya a den aya, sira mu anog teraya apan duwam mu girum den teya iyayapanirenwa. Mu yang anoya Pita ge Jon mu Iesu gaibu wakeya. <sup>14</sup> Mu yauya apan inainewa asime mu gaibu yokene, meoya mu gae divi da oma den ane waya. <sup>15</sup> Mu dirumiya Daiboru Painauvitwa gumbe atan dauwag

---

✧ 4:10: Apa 3:6,13-16 ✧ 4:11: Sam 118:22 ✧ 4:12: Mat 1:21

aisiya, sira mu toborak gae yuya. <sup>16</sup> Mu waya, “Nu gare apan mame gumbo dimbae aton? Iyayapan undag Jerusarem apa wakeemewa yaug anoya mu irakoniwa koka oraivit aya, meoya nu oma den ane uyai wata. <sup>17</sup> Megara mame iyayapan yapowo gerave wateteyamiviwa tobottan oya, iviwa mame gumbe sira bira da den dipe gae yaigipam dirumta.”

<sup>18</sup> ✧ Meve mu sira munan uniktan oya auwaya unigiyawa mu gumbo gae yusipam dirumiya: Iesu iviwa gumbe gae ge toewanewan den di aya.

<sup>19</sup> ✧ Pita ge Jon gara waya, “Ye yembovit anoya ambuwa oraimina, God namive God noiwa auta go ye noiwa auta. <sup>20</sup> Nu oma den ane nu yautuwa ge anotuwa gaiyawa vetewa yankweta.”

<sup>21</sup> Mu a ag kwemiya amiya. Mu oma den ane anoya mu aninin akape garawa ibnawa mumpé. Kuyawa iyayapan undag God waieme matadnewa gumbe. <sup>22</sup> Apan irayauyau mame gumbe inainewa bairawan meuma 40 mina.

### *Anotumat Igiyawa Nun Muma*

<sup>23</sup> Pita ge Jon mu kwemiyawa taig amog iyayapan muma gumbo uwaya. Sira mu gumbo waya pirisi kokawa ge namuyoiyoi igiyawa mu wayawa undag dirumiya. <sup>24</sup> ✧ Iyayapan muma mame anoyawa, mu imudanowa undag desirom God gumbe nouwa enagasiya, sira mu waya, “Ayapan, ge kwimin ge piyu ge poeman sira dividivi undag mu danowo wakeyawa me ge wateyana. <sup>25</sup> ✧ Nau geuma aivi abnawa

---

✧ **4:18:** Apa 5:28 ✧ **4:19:** Apa 5:29 ✧ **4:24:** Eks 20:11; Nem 9:6; Sam 146:6 ✧ **4:25:** Sam 2:1-2

isimuranaiwa Devid noiwa gumbe, sira Guwawa Iyakaisiyapama gumbe ge wana, ‘Dimbae oya Ju onan igiyawa au ge kwaruveme, sira piyu igiyawa mu divi da natawa onanwa oya anoeme?’

<sup>26</sup> Piyu ayapanowa mu namu yoiya, sira namuyoiyai igiyawa agoniyag toborag mu Ayapan ge Keriso noiwa den auya.’

<sup>27</sup> ✧Natawa di, Erod ge Pontio Pairat mu Ju onan igiyawa ge Isuraeru igiyawa gaibu gwetoimu koka mame danave agoniyaya. Mu nau geuma aiviwa abnawa iyakaisi, ge oira kuiyave ega-manawa abnawa, Iesu gumbe topayag anokukam aya. <sup>28</sup> ✧Nanigwa ge imugwa gumbe namiven ge anog anawa mu aya. <sup>29</sup> ✧Ayapan. Gare ge yawa mu a amuniya. Kwema nau geuma emewa igiyawa mu gae geuma yusipamit dirumpe. <sup>30</sup> Warinamtan oya nanigwa dima iyayapan warinamumpe. Sira iyakaisi nau geuma aivi abnawa Iesu iviwa gumbe irakoniwa ge anopipanumawa ape.”

<sup>31</sup> Mu meib nun wayawa at me agoniemewa ipunapun ane. Undak mu Guwawa Iyakaisiyapama demtawa auweg God gaiyawa yusipamit amatog waya.

### *Anotumat Igiyawa Dividivi Mumawa Keb Atanwa*

<sup>32</sup> ✧Anotumat igiyawa undag mu nonowa ge anoano desirom ane. Bira da dividivi meuma den wane me nekut neuma, sira mu dividivi

---

✧ **4:27:** Mat 27:1-2; Ruk 23:7-11; Apa 3:13 ✧ **4:28:** Apa 2:23

✧ **4:29:** Epe 6:19 ✧ **4:32:** Apa 2:44

mumawa keb aya. <sup>33</sup> Apasoro yutuwa kokavitwa gumbe Ayapan Iesu sira inaig yoinewa yauyawa waya, sira ano oraiwa kokawa mu undag gumbo. <sup>34</sup> ✧Tawara onanwa abnawa da mu gumbo den wakene. Iyayapan piyu mumawa go gwe mumawa gwiruwariya anmagawa tam uwag, <sup>35</sup> Apasoro amowo teya. Mu keb ag iyayapan anoemewa meib muniya.

<sup>36</sup> Josep me Rivai apan, me at Saipras apa yaine. Apasoro me waya Banabas. Me natawa watmemeyamivi usiwa. <sup>37</sup> Me piyu meuma gwiruwadne, sira anmagawa aug uwag apasoro amowo baraune.

## 5

### *Ananias Ge Sappira*

<sup>1</sup> Gare, apan iviwa Ananias, me biviwa Sappira gaibu toboraya, mu tawara muma gwiruwariya.

<sup>2</sup> ✧Biviwa gaibu ano muma desirom, Ananias garawa upeba me membo oya yumnadne, upeba bog onke apasoro amowo tene.

<sup>3</sup> ✧Megara Pita wane, “Ananias, dimbae oya Seitan me danagwa aune, Guwawa Iyakaisiyapama gumbe uga wana, sira piyu garawa upeba gembo oya yumnatana? <sup>4</sup> Me undag geumawa di. Gwiruwarana, go me ande amat geuma gumbe. Divi oya ugauga anoege? Ge iyayapan gumbo uga den wana, go God gumbe uga wana.”

<sup>5</sup> Meve Ananias gae mame anonewa, me uyug aig botone. Sira iyayapan mame anoyawa, a kokavit mu undagit gumbo uwane. <sup>6</sup> Apan

---

✧ 4:34: Apa 2:45 ✧ 5:2: Apa 4:34-35 ✧ 5:3: Jon 13:2

tamaru mu owan yoig kwapiwa panke yotug aug amog sig umiya.

<sup>7</sup> Ivi kum koniwa 3 mina onanane meve biviwa uwane. Me den yaug anone divi matadne.

<sup>8</sup> Pita vesin dig wane, “Didnega. Mame me ye piyu garawa auyanawa?” Me wane, “E. Garawa meme.”

<sup>9</sup> Pita me dine, “Ge memag gaibu baimda wayana, Ayapan Guwawa meuma gumbe ageyau ayana? Yawa. Memag sig umiyawa mu ankwin noive unig omome, sira mu ge gaibu yotugem ampe.”

<sup>10</sup> Koni kusi me apa me Pita amave uyug aig botone. Sira apan tamaru mu unig onam yauya me botone. Sira yotug aug amiya memawa megiyave me sig umiya. <sup>11</sup> Siosi undag ge undag mame anoyawa gumbo a kokavit uwane.

### *Apasoro Yuwat Igiyawa Obiren Warianamuniya*

<sup>12</sup> ✧ Apasoro nanuwo gumbe irakoniwa ge anopipatum obiren iyayapan yapowo matat muteme. Sira mu undag danowa desirom gumbe toborag Soromon ebuwawa gwanob gaibu apa wakeya. <sup>13</sup> Iyayapan upeba bira da mu gaibu den toboraya, go iyayapan painauwa mu ebnotu a muneme. <sup>14</sup> Sira apan ge vesin obiren Ayapan gumbe anotumat aya. Iyayapan agoniemewa kokavit aivi. <sup>15</sup> Meoya iyayapan yuwat igiyawa yotug epin taibe apa uwaya, sira kem ge goma gerowo te muniya, Pita uwag aiviwa Pita gugup da gerowo umpe oya anoeme. <sup>16</sup> Iyayapan obiren

---

✧ 5:12: Apa 2:43; 14:3



Jerusarem birorot gwetoimu apa onamiya. Mu yuwat igiyawa ge airapu miyotapama mu gumbo wakenewa yotug onam agoniyaya mu undag in-aimusia.

*Apasoro Edawai Auya*

<sup>17</sup> Pirisi painauvitwa ge me owawaiwa undag mu Sadusi igiyawa mumawa, anokukam gumbo noidauwane. <sup>18</sup> Mu apasoro yumamiya, sira mu nog taibewa danave temuniya. <sup>19</sup> ✧ Megara arampuna Ayapan aneya meuma nog ankwinawa watab tam dauwag amiya. <sup>20</sup> Me wane, “Aisiya. Temporu dana yoiya iyayapan gumbo inainai mame gaiyawa undag dirumiya.”

<sup>21</sup> Mu anoyawa, wantete mu temporu arawa dana unigiya amatog toyau muniya. Sira pirisi painauvitwa ge owawaiwa uwag Daiboru Painauvitwa ge iyai Isuraeru mu koukawa undag munan auwaya. Mu apasoro tam onamtan oya iyayapn teya nog amiya. <sup>22</sup> Megara nau eme igiyawa nog gumbe uwayawa mu nog danave mu den yawamiya. Mu sira taig amog umum waya. <sup>23</sup> “Nu yautu nog ankwin undag toboriya. Sira ankwin amaremewa yokeya, me watapiyawa bira da epa danave den yautu. <sup>24</sup> Temporu amaremewa kokawa muma ge pirisi koukawa gae mame anoyawa apasoro gumbo anopipanum aya aninin mame aivi.

<sup>25</sup> Apan da onke wane, “Yauya. Apan ye nog dana temuniyawa temporu arawa danave yokey igiyapan toyau muneme.” <sup>26</sup> Meve temporu amaremewa kokawa muma me nau eme igiyawa

---

✧ 5:19: Apa 12:7-10

gaibu amiya apasoro tam onamiya. Megara mu gwambe mu gumbo den aya. kuiyawa mu iyayapan gumbo a aya matai an gumbe gutpetan.

<sup>27</sup> Mu apasoro tam onam Daiboru Painauvitwa danave yokeya. Pirisi painauwa singui munne.

<sup>28</sup> ✧ Me wane, “Nu gae yaigipamit diruitu iviwa mame gumbe toyau toyau den aya. At Jerusarem danave toyau toyau yeuma noidauwane. Sira apan mame ganiganiyawa ibnawa gunup barauene.”

<sup>29</sup> ✧ Pita ge apasoro upeba gara waya, “Nu God noiwa auta, iyayapan nouwa den auta.

<sup>30</sup> Ye korosi egave Iesu baraug toyana. Isimuranaiwa God mumawa me bo gumbe warinamne. <sup>31</sup> ✧ God Iesu mame me naniyutanwa apa enagadne. Me Kin Usiwa ge Waita Abnawa.

Kuiyawa God me nonemagowa biroriyatanwa ge kukaeba muma anog yankwetanwa Isuraeru munigimpe. <sup>32</sup> Nu dividivi mame yangunup yautunewa. Sira Guwawa Iyakaisiyapama me God noiwa aueme igiyawa mu munnewa me gaibu yangave yaunewa.”

<sup>33</sup> Mu mame anoya, meve mu danowa piripiri wane sira mu imuwo apasoro gurampe boriruwape. <sup>34</sup> Megara, Parisi abnawa da wakene. Iviwa Gamarieru, me Gwangwan toewanewan abnawa. Me iyayapan undag ebnotu awaniya. Me Daiboru Painauvitwa danave wan yoik gae meuma yaigipam dirumne, apasoro mame koni pipi mu daieve temuniya dauwag ampe. <sup>35</sup> Me dirumne, “Isuraeru igiyawa,

<sup>33</sup> Mu mame anoya, meve mu danowa piripiri wane sira mu imuwo apasoro gurampe boriruwape. <sup>34</sup> Megara, Parisi abnawa da wakene. Iviwa Gamarieru, me Gwangwan toewanewan abnawa. Me iyayapan undag ebnotu awaniya. Me Daiboru Painauvitwa danave wan yoik gae meuma yaigipam dirumne, apasoro mame koni pipi mu daieve temuniya dauwag ampe. <sup>35</sup> Me dirumne, “Isuraeru igiyawa,

<sup>33</sup> Mu mame anoya, meve mu danowa piripiri wane sira mu imuwo apasoro gurampe boriruwape. <sup>34</sup> Megara, Parisi abnawa da wakene. Iviwa Gamarieru, me Gwangwan toewanewan abnawa. Me iyayapan undag ebnotu awaniya. Me Daiboru Painauvitwa danave wan yoik gae meuma yaigipam dirumne, apasoro mame koni pipi mu daieve temuniya dauwag ampe. <sup>35</sup> Me dirumne, “Isuraeru igiyawa,

<sup>33</sup> Mu mame anoya, meve mu danowa piripiri wane sira mu imuwo apasoro gurampe boriruwape. <sup>34</sup> Megara, Parisi abnawa da wakene. Iviwa Gamarieru, me Gwangwan toewanewan abnawa. Me iyayapan undag ebnotu awaniya. Me Daiboru Painauvitwa danave wan yoik gae meuma yaigipam dirumne, apasoro mame koni pipi mu daieve temuniya dauwag ampe. <sup>35</sup> Me dirumne, “Isuraeru igiyawa,

---

✧ **5:28:** Mat 27:25 ✧ **5:29:** Apa 4:19 ✧ **5:31:** Apa 2:33-34; Epe 1:20; Ibr 2:10; 12:2

ye yaimoyai yaug anoya aninin apan mame gumbo kwayub amuniya. <sup>36</sup> ✧ Kum da apa Teudas wan yoig membovit apan kokawa mina wane. Apan 400 mina me amave amiya. Megara me toen guriya sira me amave amomewa undag a mina mina amboriya. Onan di ane. <sup>37</sup> Mame onananewa Gariri apan Judas wan yoig iyayapan ivuwa basiemewa kumiwa danave iyayapan ugai munne kokawa gumbo daietaitai aya. Megara me gaibu toen guriya sira me amave amomewa undag a minamina amboriya. Onan di ane. <sup>38</sup> Meoya ne gare diruieni. Iyayapan mame yan kwemiya ampe. Kuyawa dividivi mame apan gumbe ompe ipewa, me matai onanape. <sup>39</sup> Megara me God gumbe ompe ipewa, ye guniyap oma den ane apan mame toboriya. Anten ye yembovit God gumbe matai mut aya go?”

<sup>40</sup> ✧ Mu gae meuma auya. Mu apasoro munan auwaya murap gumbe guriya. Mu gwangwan dirumiya Iesu iviwa gumbe den waigimiya meve kwemiya dauwag amiya.

<sup>41</sup> ✧ Apasoro Daiboru Painauvitwa kweg degadega gumbe amiya. Kuyawa mu yaug anoya mu mumbo oma ane iviwa oya dawai ge iyagau aueme. <sup>42</sup> Kum evedni mu temporu arawa ge gwe gwe danave Iesu me Keriso toyau muneme wag omome. Sira den kwene.

## 6

### *Aigo Meuma 7 Wagomiya Munne*

---

✧ **5:36:** Apa 21:38   ✧ **5:40:** Apa 4:18   ✧ **5:41:** Mat 5:10-12; 1Pi 4:13

<sup>1</sup> ✧Kum me danave aigo meuma tobod mu-mawa koka aivi. Gae Griik veme Ju igiyawa, mu gae Ibru veme Ju igiyawa gumbo yano veme. Kuyawa mu kwapura yaimoyai amat den am-neme evedni nakwai keb gumbe. <sup>2</sup> Meve apasoro 12 mu aigo muma undag agonyag toborag waya, “God gae meuma yankwek nakwai amarata me nugnup oraimina onan. <sup>3</sup> Tatangwanen. Apan 7 wagomiya muniya, iyayapan veme oraimu-muwa. Sira mu danowa Guwawa Iyakaisiyapama gumbe noidauwane, sira mu ano kokawa gaibu. Nu nau mame mu munta. <sup>4</sup> Nu imunwa undag nun gumbe ge God gae meuma wag dirum-tan yumnatta aigimpe.”

<sup>5</sup> Mu gae waya iyayapan undag ung waya. Mu Stepen wagomiyaya, me anotumat ge Guwawa Iyakaisiyapama gumbe noidauwane. Sira mu Pirip, Prokoras, Nikanoru, Timon, Parumenas ge Nikoras gomiya muniya. Antiok abnawa Nikoras me Ju anotumat muma gumbe biroriyanewa. <sup>6</sup> Mu iyayapan mame temiya apasoro namuwo yoiya. Mu nun waya sira nanuwa egowo teya.

<sup>7</sup> ✧God gae meuma wateteyamne. Jerusarem apa aigo meumawa tobod muma tatevit koka aivi. Sira pirisi obiren anotumat gumbe noiwa auya.

### *Stepen Yumiya*

<sup>8</sup> Gare Stepen iyayapan yapowo anopipanu-mawa oraiwa ge irakoniwa ane matadne. Me God ano meuma oraiwa ge yusiwa gumbe noidauwane. <sup>9</sup> Mu waya intum aya igiyawa Sinagogu mumawa apa onamiyawa wakeya. Mu

Sairin igiyawa ge Arekisandria igiyawa sira Sirisia ge Esia apa onamiyawa. Mu wan yoig amatog Stepen gaibu garadi aya. <sup>10</sup> ✧Go, me ano kokawa ge Guwawa gumbé gae waivi, meoya mu oma den ane me gumbé garawa waya.

<sup>11</sup> Mu uga muma gumbé iyayapan upeba ugai mun waya, “Nu Stepen me Mosisi gumbé ge God gumbé gae kukaeba da waivi anotu.”

<sup>12</sup> Sira mu iyayapan ge iyayapan amareme igiyawa ge Gwangwan toewanewan igiyawa nib danowa auya. Mu Stepen yumiya Daiboru Painauvitwa namive aug amiya. <sup>13</sup> Sira mu iyayapan yangowa den yauyawa wan yoik uga gaiyawa wape, “Ud mame at iyakaisi ge Gwangwan gumbé gae wabatam waiviwa den kwene. <sup>14</sup> Apan mame me, ‘Nasaret apan Iesu me at mame wakukampe, sira inaiinai me Mosisi gumbé on nu gunup uwanewa me biroriyape.’ me meis waiviwa nu anotu.”

<sup>15</sup> Iyayapan undag mu Daiboru Painauvitwa danave wakeyawa yangut temtemtem Stepen yaveme. Sira mu yauyawa me ginangawa me aneya ginangawa mina.

## 7

### *Stepen Daiboru Painauvitwa Gumbé Gae Wane*

<sup>1</sup> Pirisi painauvitwa me singui ane, “Me natawa di?”

<sup>2</sup> ✧Stepen gara wane, “Tatangwanen ge manaiwa. Ye ne gunap naunewa taiya. Nu

mamunwa Ebraam ande at Mesopotamiya wak-  
enewa God eyawa me gumbe uwane. Meve me  
aig at Aran apa vinivi. <sup>3</sup> God wane, ‘Ge iyayapan  
geuma ge at geuma kweya, sira aga piyu ne toyau  
gentna.’

<sup>4</sup> ✧ Me Sarudia igiyawa arowa kweg at Aran apa  
wakeivi. Ivi me mamawa boane, meve God me  
baraune at mame onne gare ye wakeene. <sup>5</sup> ✧ God  
mamawa kwanawa da mawapa den wanne. Me  
amawa emnewa arawa piyu musywa da den  
wanne. Megara God me gumbe agi wane. Me  
apa Ebraam ud onan, go God me ge me wag-  
obaiwa gumbo agi wane piyu mame mamawa  
kwanawa oya ivi mumpe. <sup>6</sup> ✧ God me gumbe  
meib wane, ‘Ge wagogaiwa matai at da ube am  
me apa wakeigimpe. Sira bairawan 400 danave  
mu ankwatave nau eme igiyawa ape, sira mu  
gumbo gwambe ape.’ <sup>7</sup> ✧ Sira God wane, ‘At da  
ube igiyawa mu tam ankwatave nau eme igiyawa  
ape ipewa, ne matai mu kepte muntna. Ivi  
meve mu at me apa dauwag onampe mame apa  
waiya nekpe.’ <sup>8</sup> ✧ Sira God kwapituitui agi meuma  
Ebraam wanne. Epin meib Ebraam Aisak ma-  
maven ane sira Aisak yoine oiyat 8 onanane Aisak  
kwapiwa tuine. Ivi Aisak me Jakob mamaven  
ane. Jakob me dam 12 namuyoiyoi igiyawa mu  
mamowon ane.

<sup>9</sup> ✧ Dam namuyoiyoi igiyawa mu Josep gumbe  
danowa piriwane, meoya mu me Ejipt danave  
gwiruwariya, ankwatave nau aivi abnawa ane.

---

✧ **7:4:** Gen 11:31–12:5 ✧ **7:5:** Gen 12:7; 15:18; 17:8 ✧ **7:6:**  
Gen 15:13-14; Eks 12:40 ✧ **7:7:** Eks 3:12 ✧ **7:8:** Gen 17:9-14;  
21:4 ✧ **7:9:** Gen 37:11,28; 39:2,21-23

Go, God me gaibu. <sup>10</sup> ✧ Sira dividivi undag ibnawa gumbe God me waita wanne. Me Ejipt kin Parao namive imive ge ano painauwa me wanne. Parao me Josep wagomiyane namuyoiyoi abnawa ane at Ejipt undag ge kin gweyawa undag amaratan oya.

<sup>11</sup> ✧ Meve at Ejipt ge Keinan undag kait tene kumiwa uwane. Ibnawa kokavit aueme, meoya mamana iwa mu oma den ane nakwai boya. <sup>12</sup> Jakob Ejipt apa nakwai grein\* wakene anonewa, me mamana iwa namu te munne amiya. <sup>13</sup> ✧ Mu amdau duwameba amiyawa, Josep me tatawaiwa dirumne ne bira. Sira Parao me Josep dam meuma yaug anone. <sup>14</sup> ✧ Ivi meve, Josep gae baraune aine, sira me oya mamawa Jakob ge me dam meuma 75 munan wane undag onamiya. <sup>15</sup> ✧ Meve Jakob Ejipt aig aine, sira asimeve Jakob ge mamana iwa mu boriruwaya. <sup>16</sup> ✧ Mu kwapuwa sira tam at Sekem taigiya, sira babat dana te muniya. Babat piyu me Ebraam Amor usitainawa gumbo anmaga upeba gumbe gwiruwadne.

<sup>17</sup> ✧ God Ebraam agi wanewa me kumiwa manman aiviwa, iyayapan numa tobot muma Ejipt danave namuyoiyoi abnawa aivi. <sup>18</sup> Ivi kin da me Josep gumbe den anonewa Ejipt danave kin ane. <sup>19</sup> ✧ Kin mame iyayapan numa gumbo ano gwambe ag ibnawa munne, isimuranaiwa

---

✧ **7:10:** Gen 41:37-44 ✧ **7:11:** Gen 41:54; 42:1-2 \* **7:12:** Wiit mina me nakwaeba. ✧ **7:13:** Gen 45:1-4,16 ✧ **7:14:** Gen 45:9-11; 46:27 ✧ **7:15:** Gen 46:1-7; 49:33 ✧ **7:16:** Gen 23:2-20; 33:19; Jos 24:32 ✧ **7:17:** Eks 1:7-8 ✧ **7:19:** Eks 1:11-22

mu dirumne kikiyan muma matai yayiawa boriruwatan oya epa emeya.

<sup>20</sup> ✧Me kumiwa apa Mosisi yaine. Me usiren onan God yautanwa me oraimina. Dud duwamdesi danave me mamawa gweyave amaraya koka ane. <sup>21</sup> ✧Me daieve barauya, Parao gwaitawa me aune sira me usiven atan oya amarane dog koka ane. <sup>22</sup> Ejipt ano muma painauwa undag Mosisi toyau waniya yaug anone, sira gaiyawa atan ge yusiatatu.

<sup>23</sup> Sira Mosisi bairawan meuma 40 mina aune Isuraeru usitainawa me owowaiwa munan danadawai aune. <sup>24</sup> ✧Me Ejipt apan da me owawaiwa desirom da gumbe gwambe aivi yaune. Me waitawan apan me egaven me yoig garawa Ejipt apan toen gudne. <sup>25</sup> Mosisi anone owawaiwa yaug anoya God Mosisi naniwa gumbe waita waita mumpe, megara owawawiwa den yaug anoya. <sup>26</sup> Kum umaie Mosisi owawaiwa gumbo uwane mu mut eme. Me wasiwamuntan oya dirum wane, ‘Apan, ye tatangwanen. Dimbae oya ye yembovit gara toene?’

<sup>27</sup> Megara apan me eveba gwambe aiviwa Mosisi itarag atan barauk wane, ‘Bira namuyoiyoi ge keptete numa barau genne? <sup>28</sup> ✧Watau ge Ejipt apan toen gurana mina ge imugap ne toen gudnettan anoenge?’ <sup>29</sup> ✧Mosisi mame anonewa me Midian piyuwawa a aine. Asime noi ubewa mina wakene ud duwam usitainawa yayia.

---

✧ **7:20:** Eks 2:2    ✧ **7:21:** Eks 2:3-10    ✧ **7:24:** Eks 2:11-15

✧ **7:28:** Eks 2:14    ✧ **7:29:** Eks 2:21-22; 18:3-4



30 ✧ Bairawan 40 mina onanane. Tui Sainai megiyave at inguiwa arawa apa yoma kusi yoiya. Me apa iyam meru igemewa me danave aneya Mosisi gumbe uwane. 31 Me mame yaunewa, me a ane. Me aig gumbe uwane yaimoyai yangut yaviviwa me Ayapan noiwa anone. 32 'Ne ge mamagaiwa God muma, Ebraam ge Aisak ge Jakob God muma.' Mosisi daram daram ge a kokavit ane, sira yaimoyai yangut den yaune.

33 Meve Ayapan me gumbe wane, 'Sandoro atan boa. Ge yokeyana piyu me piyu iyakaisi. 34 Ne natawa di Ejipt danave iyayapan neuma gumbo gwambe eme yauna, sira ne mu awau muma anona. Meoya ne aig oneg mu waita mun naninwa gumbe muntna. Gare aga, ne barau gentna taig Ejipt aga.'

35 ✧ Iyayapan mu Mosisi mame gumbe topayag waya, 'Bira ge namuyoiyoi abnawa ge keptete abnawa agenne?' Apan mame God aneya nanive baraune aine, me namu yoiyoi abnawa ak iyayapan mu sira autan oya gwiruwadne. Aneya me yoma kusi dana me gumbe uwawannewa. 36 ✧ Apan mame at Ejipt apa mu tam tene dauwaya, sira at Ejipt apa, Poeman Diapama apa sira bairawan 40 danave at inguiwa arawa apa anopipanumawa ge irakoniwa ane.

37 ✧ Mame Mosisi me Isuraeru igiyawa dirumne, 'God ye tateaiwa gumbo propeta da ne minan yenan wagomiyape yoipe.' 38 ✧ Apan mame at inguiwa arawa apa daiboru danave aneya ge

---

✧ 7:30: Eks 3:1-10 ✧ 7:35: Eks 2:14 ✧ 7:36: Eks 7:3; 14:21; Nam 14:33 ✧ 7:37: Deu 18:15 ✧ 7:38: Eks 19:3

mamanaiwa gaibu wakeya. Aneya me tui Sainai apa dine. Sira apan mame inaiinai gaiyawa aug ye yenne.

<sup>39</sup> Megara nu mamanaiwa me noiwa den autan anoeme. Sira mu me topayag sira mu nibdanowa tobiroriyag at Ejipt taiktan anoeme. <sup>40</sup> ✧ Mu Aaron gumbe diya, ‘Nunan god wara, me nu namunup aipewa. Kuyawa Mosisi me at Ejipt apa tam nun onnewa, nu den yaug anotu dimbae me gumbe matadne.’ <sup>41</sup> ✧ Kum me apa mu burumakau usiwa wariya ugauga god gumbe puyo barauya. Sira mu nanuwa gumbe wariyawa degadega eme. <sup>42</sup> ✧ God mu gumbo daiewa taine, sira kwiminau ugauga god meuma gumbe waieme God den to-bod munne. Me propeta bukaeba danave tenewa. ‘Isuraeru gwe mumawa.

At inguiwa arawa apa bairawan 40 danave puyo maeba ge puyo yeuma gunap barauyana? Ye den di barauya.

<sup>43</sup> Ye Moreku nun gweyawa ge god Repan marantun meuma yotuene.

Ye waiyatan oya ugauga god wariyana.

Meoya ne ye tam aneg Babiron utunban aramavit teyentna.’

<sup>44</sup> Nu isimuranaiwa at inguiwa arawa danave tabenako† gaibu. Mu God yangowo yauyawa. Me Mosisi dine ge yawanawa irawa gina desirom meib siya, meoya God gae meuma amave me siya. <sup>45</sup> ✧ Nu isimuranaiwa tabenako mame meib di sig amome. God nu isimuranaiwa namuwo

✧ **7:40:** Eks 32:1 ✧ **7:41:** Eks 32:2-6 ✧ **7:42:** Ams 5:25-27

† **7:44:** Me God gweyawa wape gumbe umiyawa. ✧ **7:45:** Jos 3:14-17

Ju onan igiyawa atatai imne, sira mu arowa nu isimuranaiwa munne. Me kumive Josiya mu gaibu me aug onamiya. Onam Devid kumive uwane. <sup>46</sup> ✧Devid God namive God ano oraiwa meuma aune, sira me Jakob God meuma oya gwe sitan oya nun wane. <sup>47</sup> ✧Megara Soromon God oya gwe sine.

<sup>48</sup> Megara God Painauvitwa apan nanuwo gwe siyawa oma den ane danave vinpe. Propeta mamaib waivi.

<sup>49</sup> ✧‘Ayapan wane, kwimin me ne kin wakeeniwa arawa,

sira piyu me ne amanwa egave baraunawa.

Sira gwe gina ube ambuwa ye nenan simon?

Sira ne nonenwa emigimtanwa arawa me ampa?

<sup>50</sup> Ne naninwa dividivi undag mame den wadna?’

<sup>51</sup> ✧Ye nonewa yaigipam, sira ye nonewa ge naunewa kwapituitui gumbe onan. Ye mameaiwa mina Guwawa Iyakaisiyapama gumbe ebnotu onan kum evedni ene. <sup>52</sup> ✧Propeta da ye mameaiwa den edawai muniya? Numan, Oraivitwa uwaivi gaiyawa vemewa mu guriya. Gare ye me Oraivitwa ominawa teyake me toen guriyana. <sup>53</sup> Ye aneya amat muma gumbe Gwangwan auyana, megara ye Gwangwan aninin wanewa amave den aisiyana.”

### *Stepen An Gumbe Toya*

<sup>54</sup> Mu mame anoyawa, mu danowa piripiri wane sira me gumbe donowa ikimikim aya.

---

✧ **7:46:** 2Sm 7:1-16   ✧ **7:47:** 1Ki 6:1-38   ✧ **7:49:** Ais 66:1-2

✧ **7:51:** Ais 63:10   ✧ **7:52:** Mat 23:31

55 ✧Megara Stepen me Guwawa Iyakaisiyapama gumbe noidauwanewa, yangut owan kwimin yang sira God eyawa meuma ge Iesu God naniyutanwa apa yokene yaune. 56 ✧Me wane, “Yauya. Kwimin watabne Apan Usiwa† me God naniyutanwa apa yokeivine ne yaveni.”

57 Iyayapan mu naunowa tobot wansin kwaruwag Stepen oya kintog amiya. 58 Mu me oreriyag gwe daieve aoreya an gumbe me toya botone. Koni me apa yangowo yauyawa igiyawa wape muma apan mataiwa iviwa Sauru amave teya.

59 Mu Stepen an gumbe toemewa, me noive nun wane, “Ayapan Iesu, ne guwanwa auwa.”

60 ✧Meve me konive popoyam aig yune sira kwaruwane, “Ayapan, kukaeba mame mu gumbo den anoa.” Me meis wag utan vinne.

## 8

1 Sauru ung wane Stepen toya.

### *Kristian Guriya Sira Marewan Amiya*

Me kumiwa apa at Jerusarem apa siosi oya edawai koka kumiwa uwane. Sira iyayapan undag at dada Judia ge Samaria danave marewan amiya. Apasoro mukut Jerusarem apa wakeya.

2 Anotumat epampa igiyawa Stepen sig umiya sira menan it kokavit wag danadawai auya. 3 ✧Go, Sauru amatog siosi wakukamivi. Me gwe gwe aivi vesin ge apan bog oreriyag nog dana temunivi.

---

✧ 7:55: Sam 110:1 ✧ 7:56: 1Ko 3:1 † 7:56: Me Iesu Keriso.

✧ 7:60: Ruk 23:34 ✧ 8:3: Apa 9:1,13; 22:4; 26:9-11

### *Pirip Me Samaria Apa Wakene*

<sup>4</sup> Marewan ampa ampa amiya igiyawa gae opata wag gigeme. <sup>5</sup> Pirip at Samaria aig aine sira Keriso opataeba me apa wane. <sup>6</sup> Iyayapan obiren agoniyayawa mu Pirip gaiyawa anoya sira irakoniwa me ane yauya. Mu undag me wanewa naunowa taiya anoya. <sup>7</sup> Airapu kukaeba iyayapan obiren gumbo kwat gaibu wag dauwag amiya. Naniwa gegeraimusia ge amowa gegeraimusia mu obiren inaimusia. <sup>8</sup> Meoya degadega kokavit gwetoimu koka me danave pawane.

### *Saimon Me Kwasisim Abnawa*

<sup>9</sup> Megara gwetoimu mame danave apan da iviwa Saimon wakene. Me dum kwasisim numan amatog onne gwetoimu mame danave me ane. Samaria igiyawa teraya. Me membovit wane ne kokawa. <sup>10</sup> Sira iyayapan undag, kusiwa apa dog aig kokawa gumbo uwane, me gumbe yaimoyai yaug anoeme waya, "Apan mame me God yusiwa kokavitwa aune." <sup>11</sup> Iyayapan mu me gumbe yaimoyai anoeme. Kuiyawa mu dum meuma oya bairawan obiren teraya. <sup>12</sup> Go, Pirip opata me God toimuwawa ge Iesu Keriso iviwa meuma oya waivi iyayapan anotumat aya, sira apan ge vesin babataito aya. <sup>13</sup> Saimon membo anotumat ag babataito ane. Me Pirip amave ampa ampa amiya. Sira irayauyau kokavit ge irakoniwa matadne me yaune terane.

<sup>14</sup> Samaria igiyawa God gae meuma auya. Sira apasoro mu Jerusarem apa wakeyawa anoya. Mu Pita ge Jon mu gumbo temiya amiya. <sup>15</sup> Mu

eme apa onam uwaya. Mu Samaria igiyawa munan nun waya mu matai Guwawa Iyakaisiyapama aupe. <sup>16</sup> Kuyawa Guwawa Iyakaisiyapama ande bira da egave den uwane. Mu Iesu Keriso iviwa gumbе babataito mekut auya. <sup>17</sup> ✧ Meve Pita ge Jon mu egowo nanuwa teyawa Guwawa Iyakaisiyapama auya. <sup>18</sup> Apasoro nanuwa egowo teemewa Guwawa Iyakaisiyapama aigne Saimon yaune. Me apasoro gumbo anmagawa aug on wan wane.

<sup>19</sup> “Ne naninwa bira da egave barautnawa, me Guwawa Iyakaisiyapama aupe ne mina yusi-pama mame negiya autna.”

<sup>20</sup> Pita me gumbе wane, “Anmagawa geuma ge gungap watkukampe. Kuyawa ge God ano puyowawa meuma anmagawa gumbе gwiruwatan ege. <sup>21</sup> Ge mame gumbе den yunadne, sira ge mame den auwa. Kuyawa ge nonegwa God namive oraimina onan. <sup>22</sup> Meoya ge nonegmagawa biroriya sira Ayapan gumbе nun wa. Anten danagap anoegewa me matai anog yankwepe. <sup>23</sup> Ne yaug anona ge ande sisiwa geuma koka danave wakeyana sira kukaeba geuma ande yumnat genivi wakeege.”

<sup>24</sup> Saimon garawa wane, “Ayapan gumbе nenan nun waya. Ye meib ayawa ye divi da wayawa ne gunap den matatpe.”

<sup>25</sup> Apasoro mu ginongowa yaigipam aya yangowa yauyawa waya. Sira Ayapan gaiyawa waya. Meve mu sira at Jerusarem taig amome. Samaria igiyawa gwetoimu obiren yapave opata wag amome.

---

✧ **8:17:** Apa 19:6

*Pirip Ge Etiopia Apan*

<sup>26</sup> Meoya Ayapan aneya meuma Pirip gumbe wane, “Wan yoig ebu asime sausu gampenwa apa aga. Ebu me aig Jerusarem uwag Gasa uwane. Gare at Gasa me at inguiwa arawa ane.”

<sup>27</sup> Me amatog aine. Me epin taibe Etiopia apan me kin vesinawa ankwatave nau kokawa aiviwa nuntosane. Me apan kokawa da Etiopia kin vesinawa iviwa Kandasi anmaga undag amaraivi abnawa. Apan mame Jerusarem waiyatan oya dog aine. <sup>28</sup> Gare me gwe taig aivi. Me mae osi pui oreriyag aiviwa danave wakeg propeta Aisaya buka meuma tenewa basiyaivi. <sup>29</sup> Guwawa Pirip dine, “Ag mae osi pui oreriyag aiviwa gumbe ug man me gaibu aisia.”

<sup>30</sup> Meve Pirip kin tog gumbe aig apan me propeta Aisaya bukaeba basiyaivi anone. Me wane, “Ge dimbae basiege yang anoana?”

<sup>31</sup> Me wane, “Bira da den toyaunekpewa ne aninin oma ane yang anotna?” Me Pirip oya wane, “Dog onag megianap wakeya.”

<sup>32</sup> ✧ Me Baiboru dana gigirum basiyaivi. Me aib tene,

‘Mae sip guremewa arawa apa veyag aivi mina, sira sip usiwa gumawa tuivi abnawa namive yokeivi mina

me noiwa da den wane.

<sup>33</sup> Me iviwa aug yan barauya sira me gumbe keptete den aya.

Bira da oma den ane kum meuma oya wape.

Inaiinai meuma piyuwawa atan aug aine.

---

✧ **8:32:** Ais 53:7-8

<sup>34</sup> Kin vesinawa ankwatave nau kokawa aiviwa me Pirip digwane, “Toyaunega. Propeta bira oya mame waivi, membo oya waivi go da bira oya waivi?” <sup>35</sup> Pirip noiwa watabne, sira gigirum mame gumbe amatog Iesu oya opata wane.

<sup>36</sup> ✧ Meve mu ebu gumbe amog at yoi da gumbe uwaya. Kin vesinawa ankwatave nau kokawa aiviwa me wane, “Yawa. Yoi wakene. Dimbae oya ne babataito den aten? Babataito atanit di.” <sup>37</sup> (-) <sup>38</sup> Me mae osi pui oreriyag aiviwa tobodne yokene. Pirip ge kin vesinawa ankwatave nau kokawa aiviwa mu duwam yoi danave aigiya Pirip babataito awanne. <sup>39</sup> Mu yoi danave dauwayawa Ayapan Guwawa meuma me Pirip aug aine. Kin vesinawa ankwatave nau kokawa aiviwa me Pirip sira den yaune, megara me degadega gumbe sira taig aine. <sup>40</sup> ✧ Pirip at Asotas apa uwa wanne. Me gwetoimu undag aig gae oraiwa opata waivi meve Sesariya aine.

## 9

### *Sauru Me Anotumat Meumawa Biroriyane*

<sup>1</sup> ✧ Sauru imive anoiviwa Ayapan aigowaiwa gumbo anavi ag ibnawa muntan ge guttan anoivi, sira me pirisi painauvitwa oya aine. <sup>2</sup> Me gigirum oya nun wane Damaskas sinagogu upeba munan. Me anotumat mame eme igiyawa, apan go vesin go, yawampewa, mu tam tuwam bog Jerusarem onampe. <sup>3</sup> Sira me aig Damaskas ob maniviwa, eyawa tatevit kwimin apa gumbe birorot esine.



<sup>4</sup> Sira me piyu egave aignewa, meve noiwa anone, “Sauru Sauru, divi oya edawai negege?”

<sup>5</sup> Sira me wane, “Ayapan, ge bira?” Sira Ayapan garawa wane, “Ne Iesu me ge edawai negegewa.

<sup>6</sup> Gare wan yoig gwetoimu danave aga. Sira ge meve dirukpe divi ge amon.”

<sup>7</sup> Iyayapan mu me gaibu amomewa noiwa anoya, go apan da den yauya, meoya divi da den waya mu di yokeya. <sup>8</sup> Sauru piyu egave wan yoine. Yangawa meramne, go divi da oma den ane yaune. Meoya iyayapan nanive auweg Damaskas amiya. <sup>9</sup> Me oiyat duwamdesi danave oma den ane divi da yaune, sira nakwai ge yoi den nane.

<sup>10</sup> Aigowawa da iviwa Ananias Damaskas apa wakene. Ayapan irawa uyavi minawa danave wane, “Ananias,” me garawa wane, “Ayapan, ne mapa.”

<sup>11</sup> Meve Ayapan wane, “Wan yoig ebu iviwa ‘Siwavit’ aga, sira Judas gweyawa apa Tarsas apan iviwa Sauru wakene. Menan ag yawa. Me nun waivi. <sup>12</sup> Me yaune irawa uyavi minawa danave, apan iviwa Ananias unig me kuiyave naniwa baraupe yangawa sira merampe.”

<sup>13</sup> Megara Ananias garawa wane, “Ayapan, ne anona apan mame at Jerusarem apa iyayapan iyakaisi geumawa gumbo dividivi kukaeba obiren ane.” <sup>14</sup> Pirisi koukawa me yusiwa waniyawa, me gumbe me oma ane iyayapan mu ivugwa auvemewa mu tam tuwampe.”

<sup>15</sup> ✧Megara Ayapan mamaib wane, “Aga. Apan

asime me uinum neuma ne wagomiyanawa. Me ivunwa aug Ju onan igiyawa ge kin muma upeba ge Isuraeru wagobawiwa gumbo aipe. <sup>16</sup> ✧ Ne me toyau wantna ivunwa oya me anintom danadawai aupe.”

<sup>17</sup> Meoya Ananias dauwag aine, sira gwe asime danave unig naniwa Sauru kuiyave baraug wane, “Evenwa Sauru. Ayapan Iesu me ebu taibe ge ongegewa apa uwagenne. Me ne baraunedne genan onedna. Ge sira oma ape yawa sira Guwawa Iyakaisiyapama gungap noidauwape.”

<sup>18</sup> Tatevit divi da me gwambui kwapi ganawa minawa Sauru yangave aigne, meve me oma ane sira yaune. Me wan yoig babataito ane, <sup>19</sup> sira nakwai nag yusiwa aune.

### *Sauru Damaskas Ge Jerusarem Danave*

Sauru me kum upeba aigowawa me Damaskas danave wakeyawa gaibu wakene. <sup>20</sup> Sira tatevit sinagogu upeba apa me amatog opata wane, “Iesu me God Usiwa.” <sup>21</sup> ✧ Iyayapan mu mame anoyawa, terag waya, “Apan mame me apan me Jerusarem apa iyayapan mu Iesu iviwa auwayawa wakukamnewa, go onan? Me mapa onnewa, me mu tam tuwam piri si koukawa gumbo aipe go?” <sup>22</sup> ✧ Megara Sauru me yusiwa koka aivi, sira wag toewan munne Iesu me Keriso. Sira Ju igiyawa mu Damaskas apa wakeyawa terag anopipanum aya.

<sup>23</sup> Oiyat obiren onanane, sira Ju igiyawa Sauru tope boatan oya gae waya, <sup>24</sup> megara Sauru me

anoano muma yaug anone. Mu Sauru tope boatan oya kum ge aram gwetoimu ankwin meuma undag yaveme. <sup>25</sup> ✧ Meoya aigowawa mu arampuna me aug pot danave enag murap gumbe tuweg an gumbe siyawa daieve yukokoramiya aigne.

<sup>26</sup> ✧ Sauru Jerusarem uwanewa, me Iesu aigowaiwa intum atan oya ageyau ane, megara mu den anotumat aya me aigowawa, sira mu a aya. <sup>27</sup> ✧ Megara Banabas me aune, sira me aug apasoro gumbo aine. Meve Banabas natawa mu dirumne. Sauru Damaskas aiviwa, ebu taibe aninin Ayapan yaune, sira divi Ayapan dine, sira me Damaskas apa Iesu iviwa oya iyayapan gumbo gae yusipamit wane, meib Banabas dirumne. <sup>28</sup> Meve Sauru aigowaiwa gaibu Jerusarem apa wakene, sira ingui uwag aine. Sira Ayapan iviwa gumbe gae yusipamit wane. <sup>29</sup> Me gae Griik veme Ju igiyawa mu gaibu gae veme sira gae garawa veme. Megara mu me bo totan oya ageyau eme. <sup>30</sup> Tatawaviwa anoano muma yaug anoya, meoya me aug Sesariya amiya, sira me barauya Tarsas aine.

<sup>31</sup> Siosi me meib at Judia, at Gariri, at Samaria undag apa siya, sira yum amareme, sira Ayapan gumbe ebnotu aya. Sira Guwawa Iyakaisiyapama me amaraivi ge yusiwa wanivi meoya anotumat igiyawa obiren eme.

### *Aneas Ge Dorukas*

<sup>32</sup> Pita at obiren amdau aine. Me anotumat igiyawa iyakaisi mu at Ridda wakeyawa gaibu

munan amdau aig uwane. <sup>33</sup> Meapa, me apan iviwa Aeneas me yuwarane bairawan 8 deriyat egave wakenewa yaune. Me amananiwa bubu-ruimusiawa aune. <sup>34</sup> Pita dine, “Aeneas, Iesu Keriso ge warinangempe. Wan yoiya sira deriyat geuma aug onaga.” Meve tatevit me wan yoine. <sup>35</sup> Iyayapan mu at Ridda ge at Saron apa wakeyawa mu Aeneas yaug Ayapan gumbe sira taig amiya.

<sup>36</sup> At Joppa apa, aigo vesinawa iviwa Tabita (Gae Griik gumbe me Dorukas.) wakene. Vesin mame anoano oraiwa obiren aivi sira dividivi munivi. <sup>37</sup> Megara me kumiwa apa, me yuwarag boane. Iyayapan kwapiwa muiniya sira me pantut painauwa gwe danave barauya. <sup>38</sup> At Ridda me at Joppa megiyave wakene. Aigowawa anoya Pita me at Ridda apa wakene, meoya mu apan duwam teya menan amiya, sira nun waya “Tatevit onaga.” <sup>39</sup> Meoya Pita wan yoig mu gaibu dauwag amiya. Pita uwanewa, mu me aug pantut painauwa amiya. Kwapura undag mu me gumbe yoig iruveme, mu wape ankwatavewa ge wape egavewa obiren mu Dorukas ainamenewa toewaniya.

<sup>40</sup> Pita wane iyayapan undag dauwag amiya, koniwa yug nun wane. Sira tobiroriyag iragi kwapiwa yaug wane, “Tabita, wan yoiya.” Meve me yangawa meramne sira me Pita yaug wan yoine. <sup>41</sup> Pita nanive wan aug waita wanne, sira me amave wan yoine. Me anotumat igiyawa iyakaisi ge kwapura auwane mu on-amiya, me toewamunne me inaine. <sup>42</sup> Gae mame at Joppa undag danave wateteyamne, sira

iyayapan obiren Ayapan gumbe anotumat aya. <sup>43</sup> Sira Pita kum kusi da at Joppa apa, mae kwapiwa waribiyaivi oraimina eme abnawa Saimon gweyave wakene.

## 10

### *Korunerias Pita Oya Auwane*

<sup>1</sup> Apan da desirom at Sesariya apa wakene. Me iviwa Korunerias. Iyayapan waya at Itari mut igiyawa wakeya. Me danave me senturion\* aivi. <sup>2</sup> Me imi danawa undag God gumbe sira biviusitainawa undag gaibu God aeba ag ebnotu eme. Me puyo obiren Ju igiyawa gumbo munivi sira evedni nun waivi. <sup>3</sup> Kum da augoiyau kum koniwa 3† mina me irawa uyavi minawa yaune. Me danave me taibe God aneya meuma yaune. Me gumbe uwag wane, “Korunerias!”

<sup>4</sup> Korunerias me aneya temtem yaug a ane. Me wane, “Ayapan, me divi?” Aneya me garawa wane, “Nun ge puyo geuma God namive dauwag yaugen anoivi. <sup>5</sup> Gare iyayapan teya at Joppa ampe Saimon aug oneya. Iviwa dawa iyayapan veme Pita. <sup>6</sup> Apan mame me iviwa Saimon me kwapiwa waribiyaivi oraimina eme abnawa gaibu wakene, me gweyawa poeman visive.”

<sup>7</sup> Meve aneya me gumbe gae wag aine. Korunerias nau meuma emewa duwam ge mut abnawa desirom munan auwane. Mut abnawa me ankwatave wakene imi danawa undag God

---

\* **10:1:** Me mut igiyawa 100 amaraivi abnawa. † **10:3:** Watavit, me kum koniwa 9 mina Isuraeru kum muma gumbe.

gumbe. <sup>8</sup> Me dividivi undag dig dirumne mu tene at Joppa amiya.

*Pita Uyavi Mina Irawa Yaune*

<sup>9</sup> Kum umae mu amome gwetoimu ob manemewa, Pita nun watan oya at me gwe egave dog aine. Me kum kuiyunup<sup>‡</sup> mina. <sup>10</sup> Me iyagon adne nakwai natan anone. Nakwai meuma tamibarip emewa me yangawa gwengwen aivi den yaiyai anoivi. <sup>11</sup> Me yaune kwimin watabne kabum da me wape koka pepetu minawa noi bamawa duwam ge duwam bog piyu egave aig onivi. <sup>12</sup> Me danave piyuwau mae gina ubeube amowa duwam ge duwam gaibuwa, dararat piyuwau amomewa, kwimin nenipawa wakeya. <sup>13</sup> Meve, noiwa me dine, “Pita, wan yoiya. Gud na.”

<sup>14</sup> ✧Megara Pita wane, “Ayapan, onan di. Den netewa ge miyotapama desirom da numan den di nana.”

<sup>15</sup> ✧Noiwa duwameba sira me gumbe wane, “God waribyanewa meib miyotapama den wa.”

<sup>16</sup> Meiba koni duwamdesi matadnewa, tatevit kabum me kwimin danave aug dog aine.

<sup>17</sup> Pita membo anopipanum aivi, irakoniwa me uyavi minawa yaunewa me natawa aninin. Apan upeba Korunerias tene amiyawa, Saimon gweyawa ampa yaug anoya. Meve ankwin daieve yokeya. <sup>18</sup> Mu auwag singui aya, “Saimon me iviwa dawa iyyapan veme Pita me mapa wakene?”

---

<sup>‡</sup> **10:9:** Watavit, me kum koniwa 6 Isuraeru kum mumawa gumbe. ✧ **10:14:** Rvt 11:1-47; Ejk 4:14 ✧ **10:15:** Mak 7:15,19

<sup>19</sup> Pita irawa me uyavi minawa oya anoiviwa, God Guwawa meuma me wane, “Yawa. Iyayapan duwamdesi genan yobeme. <sup>20</sup> Wan yoig dauwag aiga. Sira mu gaibu aisiya anopipanum den a. Ne mu tena onamiya.”

<sup>21</sup> Pita yan aig iyayapan dirum wane, “Ye Pita oya yobene. Me ne. Ye dimbae oya oniyana?”

<sup>22</sup> Mu garawa waya, “Apan iviwa Korunerias wakene. Me senturion aiviwa sira apan oraiwa. Me God gumbé a aiviwa, me Ju igiyawa undag iviwa enagatemewa. Aneya iyakaisiyapama me dine, ‘Ge Pita aug gwe geuma oya onaga, gae wape anoa.’” <sup>23</sup> Meve Pita eb munan baraune gwe danave wakeg vimpe.

### *Pita Korunerias Gweyave*

Kum umae Pita wan yoig mu gaibu amiya. Sira tatawaiwa upeba at Joppa apa wakeyawa me gaibu amiya. <sup>24</sup> Kum umae mu Sesariya uwaya. Korunerias me di dam desiroma ge owawaiwa auwag onamiya munan amaraivi. <sup>25</sup> Pita uwanewa, Korunerias dauwag yaug, sira namive koniwa yune, sira watdega ane. <sup>26</sup> ✧ Meve Pita wane wan yoine, sira wane, “Wan yoiya. Ne apan di.”

<sup>27</sup> Sira me Korunerias gaibu gae wag gwe danave unig amiya, me yaune iyayapan obiren iyameme. <sup>28</sup> Me mu dirumne, “Ye yaug anoyana mina, Ju igiyawa mu Ju onan igiyawa gaibu tobot eme go amdau emewa me Gwangwan gumbé baina onan. Megara God ne toyau nedne oma den ane watna bira da gumbé iyakaisi onanwa

---

✧ **10:26:** Apa 14:13-15; Rev 19:10

go miyotawa. <sup>29</sup> Meoya ne eb yeumawa aunawa, ne den pimpangidna genan onedna. Ne singui gentna, dimbae oya ye aninin nenan eb teyana?”

<sup>30</sup> Meve Korunerias wane, “Ne gwe neuma danave kum koniwa mame asinutuwa kum oiyat koni duwamdesiyawa nun veni. Yau-nawa, apan da me wape eyawa ennewa namunap yoig <sup>31</sup> wane, ‘Korunerias, God me nun geuma anone, sira ge dividivi wantanwa me imug anone. <sup>32</sup> Meoya apan da baruwa at Joppa aipe, sira Saimon oya eb baraupe me ompe. Iwiwa da Pita waya. Apan mame me Saimon mae kwapiwa waribiyaiwi oraimina eme abnawa gweyave wakeivi. Gweyawa poeman visive wakene.’ <sup>33</sup> Meoya tatevit ne apan da tena genan onamiya. Ge onagana, me oraimina. Nu undag God namive wakeetewa anoano undag me God genan wanewa anotan oya.”

<sup>34</sup> ✧ Meve Pita amatog gae wane, “Mame gumbe ne yaug anona me taibe. God desirom desirom gumbe ubeube den ape, <sup>35</sup> bira da mu at kokawa ubeube wakeyawa God waiyaigimpe ipewa, sira oraiwa ape ipewa, God mu matai aupe. <sup>36</sup> God me Iesu Keriso gumbe yum baiganeba wag teteyanne, sira Isuraeru wagobabiwa gumbo gae meumawa baraune aine. Iesu Keriso mame me Ayapan iyayapan undag munan. <sup>37</sup> ✧ Namu babaito me Jon opata wanewa onne, ivi Gariri apa onne Judia undag danave aninin veniyanewa ye iyaiyai yaug anoyana. <sup>38</sup> ✧ Me Nasaret apan Iesu umumawa. God me apan mame gumbe Guwawa

---

✧ **10:34:** Deu 10:17; Rom 2:11 ✧ **10:37:** Mat 4:12-17 ✧ **10:38:** Mat 3:16; Ruk 4:17-21



Iyakaisiyapama ge yusiwa egamne. Iesu mame gumbe God wakenewa, me aig anoano oraiwa ane, sira iyayapan undag mu airapu kukaeba gaibu wakeyawa warinamunne. <sup>39</sup> Sira nu di-vidivi undag mu Ju igiyawa arawa ge Jerusarem danave Iesu anewa yangnup yautune. Iyayapan mu apan mame korosi gumbe toya botone.

<sup>40</sup> Megara God wane Iesu mame kum duwamdesiyawa sira inaig uwanunne gunup. <sup>41</sup> ✧Megara me iyayapan undag gumbo onan, me nu gunup uwane. God wait numan nunan oya wagomiyane sira nu yangunup yautuwa ete. Namu Iesu sira inaine, ivi nu me gaibu nakwai natune. <sup>42</sup> ✧God Iesu wat kiniyane. Iesu mame me keptete abnawa. Me bo igiyawa ge wakeemewa igiyawa kepte mumpe. Iesu nu didnunne iyayapan gumbo mame oya opata wata. <sup>43</sup> ✧Iesu oya, propeta undag mu taibe waya bira da apan mame gumbe anotumat apewa iviwa gumbe me kukaeba meuma anog yankwepe.”

<sup>44</sup> ✧Pita gae mame waiviwa, Guwawa Iyakaisiyapama me iyayapan undag mu gaiyawa anoemewa gumbo aigne. <sup>45</sup> Anotumat igiyawa mu kwapiwa tuieme sira Pita gaibu onamiyawa mu teraya. Kuiyawa mu yauya Guwawa Iyakaisiyapama ano puyo Ju onan igiyawa gumbo aigne. <sup>46</sup> ✧Mu anoya mu gae ubeube veme sira God degadega waneme.

---

✧ **10:41:** Ruk 24:42-43; Apa 1:8 ✧ **10:42:** Apa 17:31; 1Pi 4:5  
 ✧ **10:43:** Ais 53:5-6; Jer 31:34; Apa 2:38 ✧ **10:44:** Apa 11:15;  
 15:8 ✧ **10:46:** Apa 2:4; 19:6

Meoya Pita garawa wane. <sup>47</sup> “Iyayapan mame mu Guwawa Iyakaisiyapama auya nu mina, bira da oma ane yoi tobotpe sira babataito den ape?”  
<sup>48</sup> ✧Sira me dirumwane Iesu Keriso iviwa gumbe babataito ape. Mu Pita gumbe nun waya me kum upeba danave wakepe.

## 11

### *Pita Anewa Me Taibe Dirumne*

<sup>1</sup> Apasoro ge tatawaiwa at Judia danave wakeyawa mu anoya. Ju onan igiyawa mu meib God gaiyawa auya. <sup>2</sup> Pita Jerusarem dog aine, kwapituitui igiyawa me gumbe yano waya, <sup>3</sup> ✧“Ge kwapituitui onan igiyawa gumbo agana nakwai mu gaibu nana.”

<sup>4</sup> Pita mu gumbo amatog gae konive konive natawa undag dirumne. <sup>5</sup> ✧“Ne gwetoimu kokawa Joppa apa nun veniwa, ne yanganwa gwengwen aivi yaiyai den anoeni irawa uyavi minawa yauna. Kabun da me wape koka pepetu minawa noi bamawa duwam ge duwam bog kwimin apa aig on ne gunap uwane. <sup>6</sup> Ne yangut yaimoyai yauna. Piyuwau mae amowa duwam ge duwam gaibuwa, munnoga guguyanowa, dararat piyuwau amomewa, sira kwimin neni-pawa mu yawamna. <sup>7</sup> Sira noiwa ne didnegivi anona, ‘Pita, wan yoig gud na.’

<sup>8</sup> Ne wana, ‘Ayapan, onan di. Kuyawa den netewa ge miyotapama desirom da numan den di nana.’

---

✧ **10:48:** Apa 19:5 ✧ **11:3:** Apa 10:28; Gar 2:12 ✧ **11:5:** Apa 10:9-48

9 Noiwa duwameba kwimin apa sira wane anona, me garawa wane, ‘God muinewa divi da ne den neni den wa.’ 10 Meiba koni duwamdesi matadne. Sira dividivi undag bog kwimin dog aine.

11 Kumive di apan duwamdesi gwe namive ne wakeeniwa apa yokeya. Mu Sesariya apa tene ne gunap uwaya. 12 Guwawa ne didnedne, “Ge mu gombo aisiya anopipanum den a. Ne tatanaiwa 6 mu gaibu antu, sira nu apan gweyawa uniktu. 13 Me nu didnunne. Me aneya yaune. Aneya me gweyawa danave yokeg wane, ‘Iyayapan teya at Joppa ampe Pita waya Saimon me aug onampe. 14 ✧Apan Pita ge ge iyayapan geuma undag wait-awaita amumpe gaiyawa wape.’

15 ✧Gae amatog wanawa, amatonewa apa Guwawa Iyakaisiyapama nu egunup aigne me mina meis mu egowo aigne. 16 ✧Meapa Ayapan wanewa ne imug anona. Me wane, ‘Jon babataito yoi gumbe amunne, go ye Guwawa Iyakaisiyapama gumbe babataito aya.’ 17 Meoya nu Ayapan Iesu Keriso gumbe anotumat atuwa, God ano puyowawa nunne. God ano puyowawa meis desiroma meis God mumpe. Aninin ne oma ane God aiviwa tobotna?”

18 ✧Mu dividivi mame anoyawa nouwa iyagisia. Sira God eyawa wai ag waya, “God me Ju onan igiyawa gaibu inaiinai natawa autan oya nonemagowa biroriyatanwa munne.”

### *Siosi Antiok Danave*

✧ 11:14: Apa 16:31 ✧ 11:15: Apa 2:4 ✧ 11:16: Apa 1:5

✧ 11:18: Apa 13:48; 14:27

19 ✧Gare Stepen oya edawai amatone. Iyayapan marewaniya Penisiya, Saipras ge Antiok am uwaya, sira mu Ju igiyawa mukut gae waya bira da onan. 20 Megara mu danowa Penisiya ge Saipras igiyawa upeba wakeya. Mu Antiok uwayawa Griisu igiyawa gaibu dirumeme Ayapan Iesu gaiyawa opata veme. 21 Ayapan naniwa mu gumbo. Iyayapan tobod mumawa kokawa mu anotumat ag Ayapan gumbe tobiyaya.

22 ✧Siosi me Jerusarem apa wakeyawa naunowa umum mame anoya. Meoya mu Banabas barauya Antiok aine. 23 Me uwanewa God ano oraiwa meuma yaug degadega ane. Danewa yaigipamit amarag Ayapan gaibu wakeigimtan dirum yusiwa munne. 24 Me apan oraimina sira Guwawa Iyakaisiyapama ge anotumat me gumbe noidauwane. Iyayapan obiren Ayapan gumbe onamiya.

25 ✧Meve Banabas at Tarsas aine, sira Sauru oya yobag yaune. 26 Sira meve Banabas Sauru yaune me aug at Antiok onamiya. Bairawan desirom siosi danave agoniyaya iyayapan abototoi toyau muniya. Sira at Antiok apa aigowawa namuiren Kristian veme.

27 Kum mame danave propeta upeba Jerusarem apa aig onam at Antiok uwaya. 28 ✧Mu danowo desirom me iviwa Agabas wan yoine Guwawa gumbe matai matatpewa dine. Matai kait kokawa kumiwa uwape piyu egave undag warumpe. (Mame Kraudias amaraivi kumiwa apa pawane.) 29 Meoya aigowawa desirom

✧ 11:19: Apa 8:1-4 ✧ 11:22: Apa 4:36 ✧ 11:25: Apa 9:30

✧ 11:28: Apa 21:10

desirom yutuwa muma gumbe tatawaiwa at Judia apa wakeemewa waita a muntan oya anoya. <sup>30</sup> ✧Mu me di aya. Banabas ge Sauru nanuwo puyo me waita muntan oya barauya namu yoiyoi igiyawa oya tam amiya.

## 12

### *Pita Me Nog Danave Dauwag Aine*

<sup>1</sup> Kum me apa kin Erod me iyayapan siosi danave wakeyawa edawai muntan oya naniwa baraune. <sup>2</sup> Me Jemus, Jon tatawa, deba donave botone. <sup>3</sup> Me yaug anone Ju igiyawa me gumbe degadega aya. Me Pita gaibu yumtan ane. Me Iist Onan Brediyawa Buyunaeba apa matadne. <sup>4</sup> Me Pita aug nog danave baraune. Me mut igiyawa agonagon 4 nanuwo barau munne amarape. Agonagon muma desirom danave mut igiyawa 4. Erod imive me Uwag Gaveya Buyunaeba onanapeve Pita aug iyayapan namuwo taibe dauwape.

<sup>5</sup> Me mina, Pita nog danave yumnadne wakene. Megara siosi menan God gumbe nun evedni yaigipamit veme.

<sup>6</sup> Erod imive Pita aug taibe dauwatan anoivi. Aram watauwa Pita mut igiyawa duwam yapowo kubvinivi. Me aiyan murapeba sein duwam gumbe tunasiya, sira mut igiyawa ankwin noive nog amareme. <sup>7</sup> Amta onan Ayapan aneya meuma uwane, sira eyawa nog danave esine. Aneya me Pita megiyave yug me wagwanamne

---

✧ **11:30:** Apa 12:25

yoine. Me wane, “Tatevit wan yoiya.” Meve aiyan murapeba sein me nanive geyot aigne.

<sup>8</sup> Sira aneya me gumbe wane, “Berip geuma ena, sira sandoro ena.” Meoya Pita meib di ane. Meve aneya wane, “Wape egavewa ena sira ne amanap onaga.” <sup>9</sup> Sira me dauwag aneya amave aine. Aneya me gumbe aiviwa gare natawa di matasivi me yaimoyai den yaug anone. Me irawa uyavi minawa anone. <sup>10</sup> ☆ Mu ankwin namuwa ge duwameba gaveyag meve aiyan ankwinawa uwaya. Me ankwin daievenwa me gwetoimu koka aine. Sira ankwin me mu munan inganit watabne. Meve mu dauwag amiya, sira ebu taibe amomewa, aneya me tatevit yankweg aine.

<sup>11</sup> Meve Pita membovit imiwa taig anog wane, “Gare mame di yaug anona. Ayapan me aneya meuma nenan baraune onne. Erod naniwa gumbe sira Ju igiyawa mu imug anoemewa yaigipamit undag gumbe Ayapan waita nedne.”

<sup>12</sup> Pita mame yaug anonewa, Jon mu waya Mak, me inawa Meri gwe meuma aine. Asimeve iyayapan obiren agoniyag nun veme. <sup>13</sup> Pita ankwin papapak tonewa, nau warivi vesinawa iviwa Roda me garawa watan onne. <sup>14</sup> Sira me Pita noi irawa yaug anonewa, me degadega kokavit ane. Me ankwin wataptan imiwa atataine taig kintog gwe dana unig aine. Me kwaruwane, “Pita ankwin noive.”

<sup>15</sup> Mu waya, “Kwiyagwa kukaine.” Megara me egave egave waivi, “Me natawa di.” Mu waya, “Me aneya meuma.”

---

☆ **12:10:** [Apa 5:19](#)

<sup>16</sup> Megara Pita papapak ande toivi. Mu ankwin watapke me yauya, sira mu tet koka aya. <sup>17</sup> Pita me munan naniwa viyane noiwa iyagisia, sira Ayapan aninin nog dana waita negne dauwag onedna dirumne. Pita dirum wane, “Jemes tatag-wanebaiwa mame oya dirumiya anope.” Meve me at da oya aine.

<sup>18</sup> ✧Wantene, Pita gumbe divi matadne mut igiyawa garawano aya. Mut igiyawa wayug wayug kokavit aya. <sup>19</sup> Erod Pita menan yaimoyai yobadne, megara oma den ane yaune. Meoya me nog amaremewa singui munne, meve nog amaremewa guttan oya dirumne. Meve me Judia yankwek Sesariya aigke asime apa wakene.

### *Erod Boane*

<sup>20</sup> Erod me Taiya ge Saidon igiyawa gumbo danawa piri wane. Meoya mu toborak kin gumbe amdau onamiya, sira mu yum oya Bras-tas me kin ankwatave amaraiwiwa gumbe nun waya. Kwiyawa mu kin arawa apa nakwai muma boeme.

<sup>21</sup> Erod gae watan kumiwa barauya. Me kumive Erod kin wapeyawa enamne sira kin arawa wakeg iyayapan gumbo gae wane. <sup>22</sup> Iyayapan kwat veme, “Mame God noiwa, apan noiwa onan.” <sup>23</sup> ✧Tatevit, Ayapan aneya meuma Erod tone. Kuyawa Erod God gumbe den waiyane. Nagam tune.

<sup>24</sup> ✧Ayapan gaiyawa me yoig koka aivi sira watete amne.

<sup>25</sup> ✧Banabas ge Sauru nau muma onanane, sira

---

✧ **12:18:** Apa 5:22-24 ✧ **12:23:** Dan 5:20 ✧ **12:24:** Ais 55:11

✧ **12:25:** Apa 11:29-30; 15:37

Mak waya Jon gaibu at Jerusarem taigiya.

## 13

### *Banabas Ge Sauru Teya Amiya*

<sup>1</sup> Antiok siosi danave propeta ge toewanewan igiyawa wakeya. Mu Banabas, Naijer waya Simeon, Sairin apan Rukias, Manaen, me piyu mame namuyoiyoi abnawa Erod gaibu am naya, ge Sauru. <sup>2</sup> ✧Mu Ayapan waieme sira kwit emewa, Guwawa Iyakaisiyapama wane, “Banabas ge Sauru nenan wagomiyak negiya. Ne nau neuma atan oya munan auwana nau ape.” <sup>3</sup> ✧Mu kwit ake nun waya. Mu nanuwa egowo teya sira mu temiya amiya.

### *At Saipras Apa*

<sup>4</sup> Mu duwam Guwawa Iyakaisiyapama temunne amiya. Mu Serukia amiya sira me apa Saipras oya wa gumbe amiya. <sup>5</sup> ✧Meve mu at Saramis uwaya Ju sinagogu danave mu God gae meuma opata waya. Jon mu gaibu wakeg waitawaita muniya.

<sup>6</sup> Mu ginayapawa undag birorot amiya meve at Papos uwaya. Asime apa mu ugauga propeta, Ju dum abnawa me iviwa Baru-Iesu nun tosaya. <sup>7</sup> Apan mame at me namuyoiyoi atan abnawa Serugio Poras gumbe wakene. Serugio Paurus me anoano abnawa sira Banabas ge Sauru munan auwane. Kuiyawa me God gae meuma anotan anoivi. <sup>8</sup> Sira kwasisim da Eraimas wakene. (Iviwa Eraimas me tobiroriyanewa natawa

---

✧ 13:2: Apa 9:15 ✧ 13:3: Apa 6:6 ✧ 13:5: Apa 12:12; 15:39



kwasisim.) Me mu duwam topai munne, sira me imive at me namuyoiyoi abnawa anotumat meuma biroriape. <sup>9</sup> Megara Sauru, iviwa da waya Poru, me Guwawa Iyakaisiyapama noidauwane yangut Eraimas temtemtem yaune wane, <sup>10</sup> “Ge uga ge gwambe undag ge gungap noidauwane, ge airapu kukaeba usiwa, sira oraiwa undag anavi ana. Ge Ayapan ebuwawa siwavitwa epin gwambe ege me den yankweege? <sup>11</sup> ✧Gare yawa. Ayapan naniwa ge egagap wakene. Ge yangagwa muniwape koni pipi danave kum eyawa den yawa.”

Tatevit igu ge aram me gumbe uwaya, meoya me pom ge pam aivi bira da me naniwa wattan oya. <sup>12</sup> Mame mataddnewa at me namuyoiyoi abnawa me yaune, me anotumat ane. Kuiyawa me Ayapan toewanewan meuma gumbe terane.

### *At Antiok Apa*

<sup>13</sup> ✧Papos apa Poru ge owawaiwa Pampurua danave at Perga oya wa gumbe amiya. Asimeve Jon mu kwem sira taig at Jerusarem aine. <sup>14</sup> Perga apa mu Pisidia danave at Antiok amiya. Sabat kumive mu sinagogu unig yan wakeya. <sup>15</sup> Gwangwan ge Propeta buka mumawa basiyaya onanane. Sinagogu namuyoiyoi igiyawa gae mu gumbo veme, “Tatangwanen, ye yapeyap bira da dega muntan gaiyawa wakepewa iyayapan mame oya wat dirumiya.”

<sup>16</sup> Meve Poru wan yoik naniwa viyak wane, “Isuraeru igiyawa ge God gumbe aepam emewa,

ne watna anoya. <sup>17</sup> ✧ Isuraeru igiyawa God mu-  
mawa. Me mamana iwa wagomiyamunne. Iyaya-  
pan Ejipt danave wakeyawa me yusiwa munne  
obiren aya. Naniwa painau enagakke iyayapan  
namuwo yoik tam at me kweg dauwag onamiya.  
<sup>18</sup> ✧ At Inguiwa arawa danave bairawan 40 mina  
mu amat amunne. <sup>19</sup> ✧ At Keinan danave dam 7  
me wakukamunne. Piyu me keb ag munne piyu  
kwan muma ane. <sup>20</sup> ✧ Undag mame bairawan 450  
mina aune.

Dividivi mame onanane me keptete igiyawa  
munne, meve propeta Samueru baraune onne.  
<sup>21</sup> ✧ Meve iyayapan kin oya autan anoeme. Meoya  
God dam Benjamin apan Kis usiwa Sauru munne.  
Me bairawan 40 amarane. <sup>22</sup> ✧ God Sauru itarane,  
meve Devid aug yudabne kin muma ane. Me  
Devid yaug natawa wane, ‘Ne Jesi usiwa Devid  
yauna. Me nonenwa, sira dividivi undag ne  
anoeniwa me ape.’

<sup>23</sup> ✧ Apan mame yawa meuma gumbe, God  
me Waita Abnawa Iesu baraune. Me Isuraeru  
uwanewa agi wanewa gumbe. <sup>24</sup> ✧ Namu Jon  
nonemagowa biroriyatan ge babataito atan oya  
Isuraeru igiyawa undag gumbo opata wane, ivi  
Iesu uwane. <sup>25</sup> ✧ Jon inaiinai meuma onanaivi me  
wane, ‘Ye anoene ne bira? Ne apan me onan. Go,  
yauya. Me ivi amanap onivi. Ne oma den ane  
beyawa sandoro murapeba vetna.’

---

✧ **13:17:** Eks 1:7; 6:6; 12:51    ✧ **13:18:** Nam 14:34; Deu 1:31-32  
✧ **13:19:** Deu 7:1; Jos 14:1    ✧ **13:20:** Jaj 2:16; 1Sm 3:20  
✧ **13:21:** 1Sm 8:5,19; 10:20-24    ✧ **13:22:** 1Sm 13:14; 16:12; Sam  
89:20    ✧ **13:23:** 2Sm 7:12-16    ✧ **13:24:** Mat 3:1-2    ✧ **13:25:**  
Jon 1:20,27

26 Tatangwanen, Ebraam wagobawiwa, sira ye yapeyap God gumbe aepam emewa. Waita waita gaiyawa mame nunan baraune onne. 27 Jerusarem igiyawa ge namuyoiyoi mumawa mu Iesu mame den yaug anoya, sira propeta gaiyawa Sabat Kumiwa evedni basieme go mu den yaug anoya. Mu Iesu kukaeba abnawa waya, me gumbe propeta gae mumawa natawa ane. 28 ✧Mu Iesu gumbe toen guttan oya ibnawa da den yauya, megara mu Pairat me ayaya tope bototan. 29 ✧Mu Iesu oya dividivi undag aya onananewa, sira yoma korosi gumbe aug aigeg dagup danave barauya. 30 Megara God ane boriruwawawa igiyawa gumbo Iesu sira inaine. 31 ✧Iesu me gaibu Gariri dauwag Jerusarem onamiyawa oiyat obiren namuwo uwaivine. Gare mu yangowo yauyawa igiyawa iyayapan numawa gumbo. 32 God mamantaiwa gumbo agi wanewa nu opata ye guniyap vete.

33 ✧God Iesu warinamne yoine. Me gumbe, agi meuma me natawa wagobabiwa gunup toyau nunne. Buka Sam duwameba danave mamaib tene.

‘Ge ne utunwa. Gare ne barau genna.’

34 ✧God me Iesu bo gumbe warinamne yoine sira den di putaibe. Me gumbe me mamaib wane, ‘Ne Devid gumbe agi wanawa. Agi me iyakaisi ge natawa waribiya yentna.’

35 ✧Meoya ampa da danave mamaib wane,

---

✧ **13:28:** Mat 27:22-23 ✧ **13:29:** Mat 27:59-60 ✧ **13:31:** Apa 1:3,8 ✧ **13:33:** Sam 2:7 ✧ **13:34:** Ais 55:3 ✧ **13:35:** Sam 16:10

‘Ge Iyakaisi Abnawa geuma oma den ane kweya putaipe.’

<sup>36</sup> Devid wakeivi kumive me God anoano meuma oya nauwawa ane. Sira me botone isimuranaiwa gumbo barauya kwapiwa putaine.

<sup>37</sup> Megara God warinamne bo gumbe yoinewa me den putaine.

<sup>38</sup> Meoya tatanaiwa, Apan mame gumbe, kukaeba anog yankwetan opataeba ye guniyap waivi ye yaiyai yang anoya. <sup>39</sup> ✧Mosisi Gwangwan gumbe iyayapan mu dividivi undag gumbe oma den ane oraimina aya, megara Apan mame gumbe iyayapan desirom desirom anotumat ape ipewa, dividivi undag gumbe oraimina ape God namive. <sup>40</sup> Ye yaimoyai yaukapa, propeta buka muma danave wayawa ye guniyap den matatpe.

<sup>41</sup> ✧‘Yauya. Ye, ae vene igiyawa.

Anopipanum aya, onanaya.

Ye kum yeuma apa divi da atna.

Bira da ye guniyap natawa taibe diruipe,

go ye anotumat den di aya.’ ”

<sup>42</sup> Poru ge Banabas sinagogu kweg amomewa, iyayapan nun waya pura da umae Sabat Kumiwa gae mame sira didnuniya. <sup>43</sup> Sinagogu daiboruwawa onanane. Ju igiyawa obiren ge God noiwa aueme anotumat mumawa tobiroriyayawa mu Poru ge Banabas amowo amiya. Mu gumbo gae waya, sira mu dirumiya God ano oraiwa meuma danave wakeigimiya.

<sup>44</sup> Pura da umae Sabat Kumiwa apa gwetoimu igiyawa koni undag God gaiyawa anotan oya

agoniyaya. <sup>45</sup> Megara Ju igiyawa mu iyayapan agoniemewa yauyawa, anokukam muma nibdanowa noidauwane, sira Poru wanewa gumbe topayak gae kukaeba gumbe veme.

<sup>46</sup> ✧Me oya Poru ge Banabas garawa taibe mu gumbo waya, “Nu God gae meuma namu ye guniyap waponu go. Megara ye topayayana sira ye yembovit yaibobot inaiinaiba oya oma den ane yaug anog barauya. Yauya. Nu Ju onan igiyawa gumbo angetan anoete. <sup>47</sup> ✧Kuiyawa mamaib Ayapan did nunne.

‘Ne ana ge Ju onan igiyawa eyawa muma ana. Me ge waitawaita aug piyu viripusiwa aitan oya.’”

<sup>48</sup> Ju onan igiyawa mame anoyawa, mu degadega ake Ayapan gae meuma waiyaya. Yai-bobot inaiinaiba oya wagomiyayawa munnewa undag anotumat aya.

<sup>49</sup> At me apa undag Ayapan gae meuma wateteyamiya. <sup>50</sup> Megara Ju igiyawa God noiwa aueme ano wake wake painau vesinowa ge gwe-toimu namu yoiyoi igiyawa danowa kwaikwai aya. Mu Poru ge Banabas edawai muniya mu imiya dauwag arowon amiya. <sup>51</sup> ✧Mu duwam garawa amowa atapupu tog sira at Aikoniam amiya. <sup>52</sup> Aigowawa mu danowo degadega ge Guwawa Iyakaisiyapama gumbo noidauwane.

## 14

### *At Aikoniam Apa*

---

✧ **13:46:** Apa 3:26; 18:6   ✧ **13:47:** Ais 49:6   ✧ **13:51:** Mat 10:14; Apa 18:6

<sup>1</sup> At Aikoniam apa, evedni mu amomewa mina, Poru ge Banabasi mu duwam toborak Ju sinagogu muma unigiya. Mu gae wayawa Ju ge Griisu igiyawa obiren anotumat aya. <sup>2</sup> Megara Ju igiyawa upeba anotumat den eme. Mu Ju onan igiyawa danowa dana kwaikwai aya, Ju onan igiyawa mu ano kukaeba tatawaiwa gumbo anoya. <sup>3</sup> ✧Kum obiren mu asimeve wakeg Ayapan gumbe gae yusipamit waya. Ayapan mu nanuwa gumbe irakoniwa ge anopipanumawa aya. Sira Ayapan ano oraiwa meuma natawa toyau munne. <sup>4</sup> Megara gwetoimu danave iyayapan kep upeba gamben gamben teya. Gamben Ju igiyawa gaibu, dawa apasoro gaibu. <sup>5</sup> ✧Ju onan igiyawa ge Ju igiyawa mu duwam namuyoiyi igiyawa muma gaibu apasoro gumbo ubmamawa atanwa ge an gumbe guttanwa oya ano eme. <sup>6</sup> Mu duwam me yaug anoyawa, Rikakonia gwetoimuwawa Ristra ge Derube, sira gwetoimu megiyavewa oya a amiya. <sup>7</sup> Asimeve mu gae oraiwa sira evedni opata veme.

### *Ristra Ge Derube Apa*

<sup>8</sup> Ristra apa apan amawa gegerainewa asime yan wakene. Me meis yaine a den yoig aivi. <sup>9</sup> Apan mame Poru gae waivi naunawa taig anoivi. Poru me temtemtem yaune, sira me yaug anone apan me amawa oraimina atan oya anotumat gumbe wakene. <sup>10</sup> Me noiwa kokavit wane, “Amagap wan yoiya.” Meve me pisapisag amatog aine.

---

✧ 14:3: Mak 16:20; Ibr 2:4 ✧ 14:5: Apa 14:19

11 ✨Iyayapan obiren Poru dimbae anewa yauyawa, Rikakonia gae muma gumbe nouwa owan kwaruwaya, “God me apaniren mina ane nu gunup aig onne.” 12 Mu Banabas me Seus veme, sira Poru me Erumes veme, kuiyawa Poru me gae abnawa. 13 Seus temporu meuma gwetoimu ankwin namive yokene. Seus pirisi meuma me burumakau apanit ge ben tam gwetoimu ankwin noiwa onne. Kuiyawa me ge iyayapan obiren imuwo puyo menan tepe.

14 Apasoro Poru ge Banabas mame anoyawa, mu wape muma viya iyayapan obiren danowo toen dum kwarapam unigiya. 15 ✨Mu waya, “Iyayapan numa. Dimbae ye mame ene? Nu iyayapan ye mina di. Nu gae oraiwa yenan aug ongete. Dividivi mame oraimina onan. Ye mame yan kwem God yaibobot viniviwa gumbe tobiroriyaya oya. God kwimin ge piyu ge pau-rum ge mu danowo dividivi undag me wadne. 16 ✨Watavit kumiwa apa God kwemne piyu egave iyayapan undag mu ebu muma minamina amiya. 17 ✨Megara me membovit taibe aivinewa den yankwene. Me baigan meuma gumbe kwimin apa uvin ge maura kumiwa nunivi sira nakwai ge degadega gumbe nu danunup noidauwane.” 18 Mu gae mame natawa mina oya wa ge wa eme. Waigin oieba iyayapan obiren puyo muntan emewa me yan kweya.

19 ✨Meve Ju igiyawa upeba Antiok ge Aikoniam apa onamiya. Mu iyayapan obiren niuo

---

✨ 14:11: Apa 28:6 ✨ 14:15: Sam 146:6; Apa 10:26 ✨ 14:16: Apa 17:30 ✨ 14:17: Jer 5:24 ✨ 14:19: Apa 17:13; 2Ko 11:25

kaeya muniya, sira Poru agim gumbe toya. Mu anoya me wait botone sira gwetoimu daieve me oreriyag dauwag amiya. <sup>20</sup> Megara aigowawa agoniyag Poru birorot paniyawa, me wan yoike gwetoimu danave unig aine. Kum umae me Banabas gaibu Ristra kweg Derube amiya.

### *Siriya Danave Antiok Sira Taig Amiya*

<sup>21</sup> Mu gae oraiwa gwetoimu danave opata wag aigowawa obiren tamiya. Meve mu taig at Ristra, Aikoniam ge Antiok amiya. <sup>22</sup> ✧ Mu aigowawa guwowa gumbe yusiwa muniya. Anotumat kikikit yumnattan dirumeme. Mu waya, “God toimuwawa danave nu uniktanwa me yaigiwa obiren dadi danave unigtan etc.” <sup>23</sup> Poru ge Banabas siosi desirom desirom namuyoiyoi munan atan oya gomiya muniya. Sira mu munan nun waya kwit ag mu tam anotumat gumbe Ayapan gumbe teya. <sup>24</sup> Mu duwam Pisidia gaveyag uwag amiya meve Pampiria uwaya. <sup>25</sup> Meve mu Peruga danave gae opata waya sira aigeg at Ataria amiya.

<sup>26</sup> ✧ Ataria apa mu wa egave taig Antiok onamiya. Antiok apa numan God oraiwa gumbe mu te muniya amiya, gare nau muma undag onanane. Sira Antiok taig onamiya. <sup>27</sup> ✧ Asime mu uwag siosi igiyawa mu desiromit toboraya. Dividivi undag God mu gumbo wakeg anewa sira anotumat ankwineba Ju onan igiyawa munan watabnewa umumawa waya. <sup>28</sup> Mu asime apa aigo igiyawa gaibu kum yobutatae wakeya.

---

✧ **14:22:** Apa 15:32; 1Te 3:3   ✧ **14:26:** Apa 13:1-2   ✧ **14:27:** Apa 15:4,12



# 15

## *Jerusarem Apa Daiboru Ayawa*

<sup>1</sup> ✧Sira iyayapan upeba Judia apa aig onam tatawaiwa toewan muneme, “Mosisi Gwangwan meuma gumbé ye kwapiwa den tuiyawa, ye oma den ane waitawaita auya.” <sup>2</sup> ✧Poru ge Banabas mu yapowo wan yoieg gae yaigipamit garawa eme. Poru ge Banabas ge upeba danowo wag gomiya muniya. Mu Jerusarem amotan eme. Me apa apasoro ge namuyoiyoi igiyawa gaibu gae watan oya. <sup>3</sup> Siosi igiyawa te muniya. Mu Penisiya ge Samaria gaveag amome. Mu epin taibe gae undag dirumiya. Ju onan igiyawa aninin nib danowo God gumbé tobiroriyaya. Tatawaiwa undag me anoya degadega kokavit aya. <sup>4</sup> ✧Meve mu onam Jerusarem uwaya. Siosi igiyawa, apasoro namu yoiyoi igiyawa mu gaun muniya. Mu dividivi undag God mu gumbo wakeg anewa umum dirumiya.

<sup>5</sup> Megara, numan Parisi intum aya gare an-otumat emewa mu wan yoik waya, “Ju onan igiyawa kwapiwa mu tuitanit di. Sira Mosisi Gwangwaneba oya wag dirumta mu amaratanit di.”

<sup>6</sup> Sira apasoro ge namuyoiyoi igiyawa singui mame yaug anotan oya toboraya. <sup>7</sup> ✧Mu gae yusipamit garawa aya onanane. Pita wan yoik mu dirumne, “Tatangwanen, ye anoyana, kum mayabit apa God ye yapeyap wat gomiyane Ju onan igiyawa ne nonuwa gumbé gae oraiwa

anok sira anotumat aya. <sup>8</sup> ✧Sira God me iyayapan danowa yaug anonewa, Guwawa Iyakaisiyapama nu nunne mina Ju onan igiyawa munne. Mu gumbo meib taibe uwa munne. <sup>9</sup> Me nu ge Ju onan igiyawa yapave ube da den wadne. Kuyawa me anotumat muma gumbe mu danowa muinne. <sup>10</sup> ✧Megara ye dimbae oya aigowaiwa meyowa yoma tek ibnawa munag oya God gumbe ageyau ene? Isimuranaiwa ge nu oma den ane ibnawa mamaib autu. <sup>11</sup> ✧Nu anotumat atu Ayapan numa Iesu ano oraiwa gumbe waitawaita autu. Sira mu mina meib.”

<sup>12</sup> Meve iyayapan undag agoniyayawa nouwa iyagisia. Banabas ge Poru mu God Ju onan igiyawa yapowo mu gumbo irakoniwa ge anopipanumawa anewa gae waya. Gae vemewa, mu yaimoyai anoya. <sup>13</sup> ✧Mu gae waya onanane meve Jemus garawa wane, “Tatangwanen, ne gunap anoigimiya. <sup>14</sup> God aninin namu Ju onan igiyawa gumbo kwayub a munne, sira me iviwa gumbe waya igiyawa mu yapowo iyayapan meuma bone, Simeon nu gunup wait gae wasiwamne. <sup>15</sup> Propeta gae mumawa gae mame desirom ane. Me meib di tene.

<sup>16</sup> ✧“Dividivi mame onanapewa, ne sira taig Devid tabenako meuma gomag aignewa sitna. Undag gongamak aignewa sira sitna numanwa mina ape.

<sup>17</sup> Me, iyayapan upeba, mu Ju onan igiyawa,

---

✧ **15:8:** Apa 10:44; 11:15 ✧ **15:10:** Mat 11:30; Gar 3:10

✧ **15:11:** Gar 2:16; Epe 2:5-8 ✧ **15:13:** Gar 2:9 ✧ **15:16:**

Ams 9:11-12

mu ne ivunwa gumbe iyayapan vemewa sira mu undag Ayapan kinuni atan oya.

<sup>18</sup> Ayapan me watavit ampa wag dirumnewa, me meib waivi.’

<sup>19</sup> Meoya, oieba, ne ano neuma gumbe keptena. Ju onan igiyawa mu God gumbe nib danowa tobiroriyayawa den anopipandum amuniya.

<sup>20</sup> ✧ Megara, nu gigirum munan mamaib teg dirumta. Ugauga goddeba namive tene miyotawa, uinantaraki, mae meyawa inoniyayawa ge ganigani mu yankwetanit di.

<sup>21</sup> Kuyawa watavit ampa gwetoimu desirom desirom danave Mosisi Gwangwaneba opata vemewa wakeya, sira Sabat Kumiwa apa evedni sinagogu danave mu basiyag omome.”

### *Daiboru Me Gigirumawa Ju Onan Igiyawa Munan Teyawa*

<sup>22</sup> Meve apasoro, namuyoiyoi igiyawa ge siosi undag ung wayawa, siosi igiyawa mu yapowo apan upeba gomiya mumpe sira mu tepe Poru ge Banabas gaibu Antiok ampe. Mu Judas, (me iviwa veme Barusabas), ge Sairas gomiya muniya. Mu tatawaiwa yapowo namuyoiyoi igiyawa.

<sup>23</sup> Mu gaibu gigirum baraueme aivi. Mu mamib teya. “Tateaiwa, apasoro ge namuyoiyoi igiyawa mu Antiok,

Siria ge Sirisiya danave Ju onan tatawaiwa oya kaiwa kaiwa muma veme.

<sup>24</sup> Nu amutan den watu, go nu yapunup iyayapan upeba mu gae waya gumbe ye anopipandum ayana sira ye nonemagewa

---

✧ **15:20:** Eks 34:15-17; Rvt 17:10-16

yaimoyai den wakene. Nu meis anoete.  
<sup>25</sup> Nu danunwa undag desirom ane.  
 Nu apan upeba gomiya muntu sira nu  
 iyayapan numa nonunmagawa Poru ge  
 Banabas gaibu yenan te muntu. <sup>26</sup> Poru  
 ge Banabas mame mu Ayapan numa Iesu  
 Keriso iviwa oya inaiinaí muma topayaya.  
<sup>27</sup> Meoya nu Judas ge Sairas temete mu  
 gae desiroma mu nouwa gumbe wape.  
<sup>28</sup> ☆Guwawa Iyakaisiyapama ge nu dividivi  
 mame amaratan anoetewa me mekut  
 yempe. Ibnawa da den yempe. <sup>29</sup> Ugauga  
 goddeba namive tenewa, ganigani, mae  
 meyawa inoniyayawa ge uinantaraki yan  
 kweya. Ye yaukapa dividivi mame gumbe  
 painau wakeyawa me oma ane. Wakeya.”

<sup>30</sup> Mu marewan dauwag Antiok aig amiya.  
 Me apa mu siosi igiyawa toborak gigirum mu  
 nanuwo barauya. <sup>31</sup> Iyayapan gigirum basiyag  
 yusiwa muntan gaiyawa gumbe degadega aya.  
<sup>32</sup> Judas ge Sairas mu mina mumbovit propeta.  
 Mu gae obiren waya tatawaiwa yusiwa munke  
 degadega aya. <sup>33</sup> Mu oiyat upeba asime wakeya.  
 Tatawaiwa yum gumbe temuniya. Mu at kweya  
 at namu on temuniya amiyawa apa taig amiya.  
<sup>34</sup> (-)\* <sup>35</sup> Poru ge Banabas ande Antiok apa  
 wakeya. Me apa mu iyayapan upeba obiren  
 gaibu Ayapan gae meuma toewanewan ge opata  
 amuniya.

---

☆ **15:28:** Mat 23:4 \* **15:34:** V34 den wakene, go namu tenewa  
 da mamaib waivi; V34: Megara Sairas imive me apa waketan  
 anone.

*Poru Ge Banabas Ano Muma Ubeube*

<sup>36</sup> Oiyat upeba onanane Poru me Banabas gumbe wane, “Nu numan Ayapan gae meuma opata atu. Asimeve sira taig gwetoimu desirom dada gumbe tatanaiwa gumbo amdau anta. Mu aninin emewa nu yauta.” <sup>37</sup> ✧Banabas imive mu gaibu Jon aug ampe. Jon iviwa da Mak. <sup>38</sup> ✧Megara Poru imive den anoivi, kuiyawa Jon me Pampiria apa yankwem aike nau mu gaibu den ane. <sup>39</sup> Mu daietaitai aya. Meoya mu ubeube amiya. Banabas me Mak aug wa gumbe Saipras oya amiya. <sup>40</sup> Poru me Sairas wagomiyane. Tatawaiwa mu Ayapan ano oraiwa gumbe anotumat yusipamit ag temuniya amiya. Mu kwem amiya. <sup>41</sup> Poru me Siria ge Sirisiya danave uwag aine. Me kumiwa apa siosi yusiwa munne.

## 16

*Timoti Me Poru Ge Sairas Intum Ane*

<sup>1</sup> ✧Poru me Derube uwag meve Ristra aine. Me apa aigowawa iviwa Timoti wakene. Timoti me Ju anotumat vesinawa usiwa sira mamawa me Griisu apan. <sup>2</sup> ✧Ristra ge Aikoniam apa tatawaiwa gae me oya oraivit veme. <sup>3</sup> Poru imive apan mame gaibu aitan anoivi. Meoya Poru Timoti kwapiwa tuine. Kuiyawa me Ju igiyawa at me apa vinemewa mu undag yaug anoya me mamawa Griisu apan. <sup>4</sup> ✧Sira mu at kokawa uwage uwag amome. Jerusarem apa apasoro ge namuyoiyoi igiyawa gwangwan gaiyawa yuya. Meoya me

---

✧ **15:37:** Apa 12:12,25 ✧ **15:38:** Apa 13:13; 1Ko 4:10 ✧ **16:1:** Apa 14:6; 2Ti 1:5 ✧ **16:2:** Pir 2:19-22 ✧ **16:4:** Apa 15:23-29

noiwa autan oya mu umum barau ge barau amiya. <sup>5</sup> Meoya siosi anotumat gumbe yusiyusi aya sira iyayapan evedni tobod muma koka aivi.

*Masedonia Igiyawa Oya Poru Irawa Uyavi Minawa Taibe Yaune*

<sup>6</sup> ✧Guwawa Iyakaisiyapama tobod munne Esia apa gae den waya, meoya mu Prigia ge Garatia uwag gaveyag amiya. <sup>7</sup> Mu Misia yumateba amog uwayawa, mu amatog Bitinia uniktan anoeme, go Iesu Guwawa baina den wane. <sup>8</sup> Meoya mu Misia uwag Troas aigeg amiya. <sup>9</sup> Arampuna irawa uyavi minawa Poru gumbe uwane. Mesedonia apan da Poru namive yokeke me gumbe nun waivi, “Dauwag Mesedonia onag waita nuna.” <sup>10</sup> Poru irawa uyavi minawa yaune, tatevit nu Masedonia angetan tamibarip atu. God nunan auwane gae oraiwa opata gumbo watan ete meib taibe di yaug anotu.

*Piripi Apa Ridia Imidanawa God Gumbe Tobiroriyane*

<sup>11</sup> Troas apa nu wa autu siwavit Samotrake antu. Kum umae nu Niaporis uwatu. <sup>12</sup> Meve nu Piripi antu. Me at kokawa Romu amaraivi, sira me at yumateba Masedonia danave namui ren gwetoimuwawa. Gwetoimu mame danave nu oiyat upeba waketu. <sup>13</sup> Sabat Kumiwa apa nu gwetoimu ankwin noiwa nu dauwag antu yoi gambenwa uwatu. Nu anoete at me nun arawa. Nu me apa uwag yan waketu, vesin agoniyayawa gumbo gae watu. <sup>14</sup> Vesin da me iviwa Ridia me Poru gae meuma anoivi. Me gwetoimu koka

---

✧ 16:6: Apa 18:23

Taiataira danave wape me gamat diyapam ge burut yapavewa gwiruwariwi sira me God waiyaivi vesinawa. Ayapan Ridia nonemagawa watabne Poru gae waiviwa gumbe naunawa yaimoyai taig anoivi. <sup>15</sup> Me ge apan ud meumawa babataito aya. Me mu gumbo nun kokavit wane, “Ye yaug anoyana ipewa ne Ayapan gumbe anotumat eniwa, oneg ne gwe neuma apa wakeya.” Me kaeya munne.

*Poru Ge Sairas Nog Danave Wakeya*

<sup>16</sup> Nu nun veme arawa oya angetewa, otau da airapu kukaeba danave wakenewa nuntosa atu. Me koukawa ankwatawo nau aivi. Me guwawa yaug anone ivi divi matatpe dum gumbe. Me dum ag, garawa kokavit aug koukawa meuma garawa tameme. <sup>17</sup> ✧ Otau mame Poru ge nu amunup on kwaruwaivi, “Iyayapan mame God Painauvitwa ankwatave nau eme igiyawa. Mu waitawaita ebuwawa ye diruieme.” <sup>18</sup> Me kum obiren mame aivi. Me gumbe Poru uiwa topayadne meve man tobiroriyak airapu kukaeba gumbe wane, “Iesu Keriso iviwa gumbe ne dirugeni. Me gumbe man dauwa.” Me apa airapu kukaeba me yankweg dauwag aine.

<sup>19</sup> Me koukawa meumawa mu anmaga waremewa ebuwawa waropiyaya yauya, meoya mu Poru ge Sairas yumam tuwam orodmun amog gwiruwaremewa arawa unig uwaya. <sup>20</sup> ✧ Mu tam onam gabemant nau eme igiyawa koukawa namuwo uwag waya, “Iyayapan mame Ju igiyawa, sira gwetoimu numawa wakukameme. <sup>21</sup> Mu

---

✧ 16:17: Mak 1:24 ✧ 16:20: Mak 13:9

inaiinai taibe did nuneme. Inaiinai me nu Romu igiyawa auta go atawa me gwambe.”

<sup>22</sup> ✧Iyayapan obiren wan yoik toboraya mu duwam gumbo danowa piriwane. Gabemant nau eme igiyawa koukawa dirumiya wape muma vike murap gumbe guriya. <sup>23</sup> Koni obiren murap gumbe mu duwam guriya tam nog dana emeya. Mu nog amaraivi abnawa yaimoyai amat amuntan oya diya. <sup>24</sup> Nog amaraivi abnawa gae diyawa nouwa aune. Mu duwam nog dana bagive temuniya. Mu amowo kapet tuwamiya.

<sup>25</sup> Nub danawa Poru ge Sairas God gumbe nun veme bererin tovemewa nog igiyawa up-eba mu gumbo naunowa taig anoeme. <sup>26</sup> Amta onan pinunu koka uwane, nog niium barauyawa ipunapun ane. Meve nog ankwinawa undag inganit watabmusia sira murap undag amowo kapesiyawa tutakwag aigiya. <sup>27</sup> ✧Nog amaraivi abnawa gwanad yoine yaune nog ankwinawa watabmusia. Me mureme tum meuma aug membo ingan yutan ane kuiyawa me anone nog igiyawa wait dauwag a amiya. <sup>28</sup> Megara Poru noiwa kokavit kwaruwane, “Ge gembovit den yuwa. Nu undag mapa.”

<sup>29</sup> Nog amaraivi abnawa dun oya auwane. Tat-  
evit unig daramdaram ag Poru ge Sairas namuwo uyug aigne. <sup>30</sup> ✧Me mu tam dauwag aig dirumne, “Koukawa. Ne aninin aka waitawaita autna?”

<sup>31</sup> Mu waya, “Ayapan Iesu gumbe anotumat a, me gumbe ge ge vesin ud geuma gaibu wait-awaita auya.” <sup>32</sup> Mu God gaiyawa me ge iyaya-

---

✧ **16:22:** 2Ko 11:25; 1Te 2:2 ✧ **16:27:** Apa 12:18-19 ✧ **16:30:** Apa 2:37



pan undag me gwe meuma danave wakeyawa dirumiya. <sup>33</sup> Aram me kumiwa apa nog amaraivi abnawa mu tam dauwag aik kamot muma muinne. Sira tatevit me ge vesin ud meuma undag babataito aya. <sup>34</sup> Meve me mu duwam tam gwe meuma unig amiya. Me nakwai munan namuwo tamibarip ane mu naya. Me vesin ud meuma undag gaibu God gumbe anotumat ayawa degadega aya.

<sup>35</sup> Wantene gabemant nau eme igiyawa koukawa mu nouwa nau eme igiyawa temuniya uwak diya, “Iyayapan yan me kwemiya dauwag ampe.” <sup>36</sup> Nog amaraivi abnawa gae mame Poru dine, “Gabemant nau eme igiyawa koukawa mu nouwa nau eme igiyawa tenuniya waya ye duwam kweyempe dauwag aisiya. Meoya gare yum gumbe dauwag aisiya.”

<sup>37</sup> Megara Poru noive nau eme igiyawa gumbo wane, “Gabemant nau eme igiyawa koukawa nu Romu igiyawa yai den kepte nuniya. Nu taibe murap gumbe gut nunke nog dana te nuniya. Gare nu guwave kwe nuntan eme. Onan di. Mu mumbo ingan onam kwe numpe dauwag anta.”

<sup>38</sup> Nouwa nau eme igiyawa gabemant nau eme igiyawa koukawa gumbo gae mame umum waya. Poru ge Sairas mu Romu igiyawa mu anoya a aya. <sup>39</sup> Mu uwaya nonowa watmemeyam mu-niya. Sira mu nog daieve tam gwetoimu danave yankweg dauwag amtan oya waya. <sup>40</sup> Poru ge Sairas nog danave dauwaya. Mu Ridia gwe meumna unigiya. Meve mu tatawaiwa yawamiya ano yusiwa gaiyawa mu dirumiya. Sira kwem amiya.

# 17

## *Tesaronika Apa*

<sup>1</sup> Mu Ampiporis ge Aporonia gaveyag amome Tesaronika uwaya. Ju sinagogu muma asimeve wakene. <sup>2</sup> Poru evedni aiviwa mina me sinagogu danave unigne. Sabat Kumiwa duwamdesi Baiboru gumbé garawano aya. <sup>3</sup> Keriso dawai auke bo gumbé sira inaine me taibe wane sira gae mame natawa di wane. Me wane, “Iesu oya ye diruieni, Iesu mame me Keriso di.” <sup>4</sup> Ju igiyawa upeba mu yaug anoya Poru ge Sairas amowo amiya. God waiyawaiya veme Griisu obiren sira tawara vesinawa dodogu onan wakeya.

<sup>5</sup> Go Ju igiyawa upeba watkukameya. Gwiruwareme arawa apa apan kukaeba upeba ui onan gigeme. Ju igiyawa tam desirom agoniya muniya. Mu gwetoimu danave wayug wayug muma noidauwane. Mu tatevit Jeson gweyawa dana unigak Poru ge Sairas tam agonagon namuwo tetan oya munan yobareme. <sup>6</sup> Megara mu da oma den ane yawamiya. Meoya mu Jeson ge tatawaiwa upeba orod mun gwetoimu namu yoiyoi munan onamiya mu kwat veme, “Iyayapan mu piyu undag egave wayug wayug eme mu at mame gumbé unig onamiya. <sup>7</sup> ✧Jeson me gwe meuma dana mu tamne. Iyayapan mame undag mu kin da Iesu wakene veme, meoya mu Romu dana kokavit abnawa Siisa gwangwan meuma amave den amome.” <sup>8</sup> Me mina iyayapan obiren ge gwetoimu namuyoiyoi igiyawa mu gae mame anoya ui aepam eme. <sup>9</sup> Mu Jeson

---

✧ 17:7: Ruk 23:2; Jon 19:12

ge iyayapan upeba gumbo garawa auya meve kwemiya dauwag amiya.

### *Berea Apa*

<sup>10</sup> Tatevit, tatawaiwa aram danave Poru ge Sairas temuniya dauwag at Berea amiya. Me apa uweme Ju sinagogu muma unig amiya. <sup>11</sup> Berea igiyawa mu iyayapan oraimina. Tesaronika igiyawa mina onan. Mu imuwa God gaiyawa yang anotan oya anoeme. Sira gae Baiboru gumbe yumnasiya go onan oiyat evedni yaimoyai yaveme. <sup>12</sup> Meoya mu yapowo obiren anotumat aya. Mu anotumat igiyawa yapowo Griisu tawara vesinawa ge apan dodogu onan wakeya.

<sup>13</sup> Megara Ju igiyawa Tesaronika apa wakeyawa mu anoya Poru Berea apa gaibu God gaiyawa opata waivi. Mu asime gaibu onamiya, sira iyayapan obiren anopipanum amuniya sira meve mu wayug wayug aya. <sup>14</sup> Meoya tatawaiwa tatevit Poru barauya me poeman aine, go Sairas ge Timoti Berea apa wakeya. <sup>15</sup> Poru aigoyaya gaibu amiyawa mu me aug Asen amiya. Sira Poru dirumne Sairas ge Timoti tatevit onam gumbe uwape. Mu gae me auwag amiya.

### *At Asen Danave*

<sup>16</sup> Poru Asen danave munan amaraiwi. Gwe-toimu me god ugaugaeba noidauwane yaune danawa piri-piriwane. <sup>17</sup> ✧ Meoya Poru me sinagogu danave Ju igiyawa ge God waiya emewa gaibu gae garawa aya. Sira kum evedni gwiruwaremewa arawa apa asime iyayapan wakeemewa gaibu gae garawa aya. <sup>18</sup> Epikuros

---

✧ 17:17: Apa 18:19

igiyawa ge Stoik igiyawa anoano anoemewa upeba me gaibu garawa aya. Epikuros upeba waya, “Apan mame dimbae watan aivi?” Sira upeba waya, “Ne anoeniwa at painauwa goddeba oya waivi.” Kuyawa Poru me Iesu ge sira inainewa opata waivi. <sup>19</sup> Meve mu Poru daiboru arawa Areopagas aug amiya waya, “Mame toyautoyau mataiwa ge opata vege. Me dimbae toyau nuna? <sup>20</sup> Ge anoano gina ubewa nu naununwa gumbe tam ongege. Meoya nu imunup anotan me dimbae.” <sup>21</sup> Asen igiyawa ge at ubewa igiyawa me apa vinemewa undag mu kum muma gumbe divi da den ag wakeeme. Mu anoano mataiwa oya gaiyawa veme sira naunowa taieme. <sup>22</sup> Meve Poru me Areopagas bunangave wan yoik wane, “Asen igiyawa. Ne ebu undag gumbe yauyemna, ye anotumat kokavit ene igiyawa. <sup>23</sup> Ne a gigeni sira yangut yaimoyai ye waienewa yawameni. Ne yauna iyakaisi kem meuma gaibu wakene. Me egave ‘God me gumbe den yaug anotuwa oya,’ me tene. Ye den yaug anog sira waienewa me dimbae diruitna.

<sup>24</sup> ✧God piyu ge piyu danave dividivi undag wadne. Sira God mame kwimin ge piyu Aya-paneba. Meoya me iyayapan nanowa gumbe siyawa temporueba danave den vinivi. <sup>25</sup> ✧Sira me divi da anoiviwa oya iyayapan nanowa gumbo waita wantan oya den anoivi. Kuyawa God me membovit inainai, ge gaup ge dividivi undag iyayapan munne. <sup>26</sup> Sira me apan desirom gumbe iyayapan undag piyu egave wadne. Me

---

✧ 17:24: 1Ki 8:27; Apa 7:48    ✧ 17:25: Sam 50:12

piyu egave undag temunne mu vinag wakeeme. Me kumive kumive iyayapan tene sira mu vinag wakeeme yumateba baraune. <sup>27</sup> ✧ God mame ane iyayapan me gumbe kiniyatan oya. Sira mu me didimama apewa me yaupe. God nu desirom desirom gunup painau den wakene. <sup>28</sup> Kuyawa nu God danave vinate, a gigate, wakeete. Me natawa di, ye yapeyap buka Sam me Baiboru danave wakenewa mina teeme igiyawa mu waya, ‘Nu gaibu dam desiroma gumbe yaig onnewa.’

<sup>29</sup> ✧ Nu God usitainawa. Iyayapan upeba ano muma emewa gumbe oraimina, sira nanuwa gumbe nau eme oraimina. Mu gooru, siruva go an gumbe god guwawa wariya. Megara God me mina onan. Nu meib di anotanit di. <sup>30</sup> Watavit kumiwa apa iyayapan den yaug anog emewa God anog yankwemne, mu anoemewa eme. Megara gare God iyayapan undag ampa ampa wakeemewa dirumne nonemagowa biroriyaya. <sup>31</sup> ✧ Kuyawa God me Apan da wagomiyane. Apan me natawa gumbe piyu keptetan oya God kum meuma baraune. Sira God boriruguayawa igiyawa gumbo me sira inaine meoya iyayapan undag mame natawa toyau munne.”

<sup>32</sup> Bo gumbe inaipe mu anoyawa, upeba me iyagau eme. Sira upeba waya, “Nu mame gumbe kum da sira ge gungap anota.” <sup>33</sup> Poru iyayapan agoniyyawa danave kwem dauwag aine. <sup>34</sup> Megara iyayapan upeba Poru amave amog anotumat aya. Mu Areopagas apa keptete ab-

---

✧ **17:27:** Sam 145:18; Jer 23:23 ✧ **17:29:** Ais 40:18-20; 44:10-17; Apa 19:26 ✧ **17:31:** Sam 96:13

nawa da Daionisius, vesin da iviwa Damaris ge iyayapan upeba.

## 18

### *Korint Apa*

<sup>1</sup> Dividivi mame onanane, ivi Poru Asen kweg at Korint aine. <sup>2</sup> ✧Asimeve Poru Ju apan iviwa Akuira yaune, me at Pontas apa yainewa. Me matai at Itari apa dauwag biviwa Prisira gaibu onamiya. Kuyawa Kraudias me Romu aya-paneba me Ju igiyawa undag at Romu yankwetan oya dirumne. Poru mu gumbo aine. <sup>3</sup> ✧Kuyawa Poru me mina baram gumbe gwe sivi abnawa, meoya mu gaibu wakeg nau aya. <sup>4</sup> Sabat Kumiwa apa evedni me sinagogu danave toyau munne. Poru me imive gae meuma oyog oyog ape anone. Griisu igiyawa ge Ju igiyawa yan tope me noiwa aupe.

<sup>5</sup> ✧Sairas ge Timoti Masedonia apa onamiya. Meve Poru membovit gae toyau muntan oya nib danawa undag me apa wakene, sira me Ju igiyawa gumbo taibe dirumne Iesu me Keriso. <sup>6</sup> ✧Megara mu Poru gae meume noiwa den auya gae gwambe waya. Meoya Poru wape meuma viyaviya ane mu gumbo wane, “Ye ganigani yeumawa kuieyap aikpe. Ne amat neuma ye guniyap onan. Gare mame apa ne Ju onan igiyawa gumbo anakna.”

<sup>7</sup> Poru me apa yan kwek dauwag apan da gwe meuma aine. Me iviwa Taitias Jastas,

---

✧ **18:2:** Rom 16:3 ✧ **18:3:** Apa 20:34 ✧ **18:5:** Apa 17:14-15

✧ **18:6:** Apa 13:46,51; 20:26

God waiyaivi abnawa. Gwe meuma sinagogu megiyave. <sup>8</sup> Sinagogu namuyoiyoi abnawa Krispas ge vesin ud meuma undag anotumat Ayapan gumbe aya. Sira Korint igiyawa obiren mu anak anotumat aya babataito aya.

<sup>9</sup> Aram da arampuna Ayapan irawa uyavi minawa gumbe Poru dine, “A den a. Gae waigima. Nogwa den iyagita. <sup>10</sup> ✧Ne ge gungap. Da bira ge gungap divi da den ape. Da bira ge den towakpe. Kuyawa ne iyayapan neuma obiren gwetoimu mame danave wakeya.” <sup>11</sup> Poru bairawan desirom ge dud 6 mina mapa wakene, God gaiyawa toyau munne.

<sup>12</sup> Gario me at Akaia amaraivi abnawa kumive, Ju igiyawa danowa desirom aya Poru totan oya me keptete arawa aug amiya. <sup>13</sup> Mu waya, “Apan mame iyayapan Gwangwan gumbe ubeube ag God waiya atan oya ayag munivi.”

<sup>14</sup> Poru noiwa watap gae watan aiviwa, Gario me Ju igiyawa gumbo wane, “Ye Ju igiyawa, me ugauga emewa go kukaeba kokavit emewa oya ipewa, ne ye guniyap naunanwa taig anotna. <sup>15</sup> Megara me gae, ge iviwa ge Gwangwan yeuma oya singui gumbe ipewa, ye yembovit ibnawa yeuma wasiwamiya. Ne dividivi mame gumbe den keptetna.” <sup>16</sup> Me keptete arawa apa mu atatai imne. <sup>17</sup> Meve mu undag sinagogu namuyoiyoi abnawa Sostene yumiya keptete arawa namive me toya. Megara Gario dividivi mame oya den anone.

### *Prisira, Akuira Ge Aporos*

---

✧ **18:10:** Jos 1:9; Ais 41:10

18 ✧ Poru ande oiyat obiren Korint apa wakene, meve tatawaiwa gumbo wakeyo wane, wa gumbe Siria aine. Prisira ge Akuira gaibu amiya. Poru me God gumbe agi wane oya at Senkrea apa kuiyagumawa wadne. 19 Mu at Epesas uwaya. Poru asimeve Prisira ge Akuira kwemne me mekut sinagogu unigne Ju igiyawa gumbo garawano aya. 20 Mu me diya kum kusi yobe mu gumbo waketan oya waya. Megara me waketan den anone. 21 Me wak kwem agi wane, “God ano meuma ipewa ne matai sira taig onekna.” Meve me at Epesas apa wa gumbe dauwag aine. 22 Meve me at Sesariya uwag aigne sira dog aig Jerusarem siosi igiyawa yawamne meve at Antiok aig aine.

23 Poru asimeve kum upeba wakene. Sira me amdau amatog at Garatia ge Prigia danave undag aig aigowawa undag ano yusiwa gaiyawa dirmne.

24 Sira Ju apan iviwa Aporos me at Arekisandria apan me at Epesas onne. Me gae oraivit waivi abnawa sira me Baiboru anoano meuma yang anone. 25 Apan mame Ayapan ebuwawa toyau waniya. Me Guwawa meuma igivi Iesu gumbe gae siwavit toyaumunivi, go me Jon babataito meuma mekut anone. 26 Apan mame sinagogu danave amatog gae taibe yusipamit waivi. Priserage ge Akuira me anoya. Mu gwe muma ontan oya me diya, God ebu meuma yaimoyai me diya.

27 Aporos me Akaia aitan anoivi. Tatawaiwa me yusiyusi atan gaiyawa me diya. Sira aigowawa

---

✧ **18:18:** Nam 6:18; Apa 21:24



asime wakeyawa gigirum munan teya. Me asime uwanewa, wait God oraiwa gumbe anotumat aya igiyawa gumbo waitawaita kokavit munne. <sup>28</sup> ✧ Me Baiboru gumbe Iesu me Keriso taibe ane, sira me Ju igiyawa gae muma yusipamit taibe, yan tene.

## 19

### *Poru At Epesas Apa Wakene*

<sup>1</sup> ✧ Aporos at Korint apa wakeiviwa, Poru amave at ebu me poeman visive onan aig Epesas uwane. Asimeve me aigowawa upeba yawamne. <sup>2</sup> ✧ Sira me singui munne, “Ye anotumat ayawa Guwawa Iyakaisiyapama auyana?” Mu garawa waya, “Onan. Nu den di anotu Guwawa Iyakaisiyapama autan oya.”

<sup>3</sup> Sira me wane, “Ye babataito dimbae auyana?” Mu waya, “Jon babataito meumawa nu autu.”

<sup>4</sup> ✧ Poru wane, “Jon babataito meumawa me nonemagowa biroriyatan oya. Me iyayapan dirumne apan da me ivi ne amanap onivi, me Iesu. Me gumbe anotumat aya.” <sup>5</sup> Mu mame anoya, Iesu Keriso iviwa gumbe babataito aya. <sup>6</sup> ✧ Poru kuiyowo naniwa tenewa Guwawa Iyakaisiyapama egowo aigne. Sira mu gae pednowa ubeube waya, God oya gae waya. <sup>7</sup> Iyayapan undag 12 mina me apa wakeya.

<sup>8</sup> Meve Poru sinagogu danave unig dud duwamdesi danave taibe yusipamit toyau munne, sira God toimuwawa oya gae yusipamit

---

✧ **18:28:** Apa 9:22 ✧ **19:1:** 1Ko 3:6 ✧ **19:2:** Apa 8:16

✧ **19:4:** Mat 3:11 ✧ **19:6:** Apa 8:17; 10:44,46

dirumne. <sup>9</sup> Megara iyayapan upeba danowa yaigiwane naunowa den taig anoya sira iyayapan obiren namuwa Ebu mame oya gae kukaeba waya, meoya Poru kwemne. Sira Poru aigowawa kwemtan oya dirumne. Sira Poru me Tairanas gigirum gweyawa danave evedni wag dirumne. <sup>10</sup> Toewanewan mame bairawan duwam danave meis di aine. Meoya Ju igiyawa ge Griisu igiyawa undag Esia danave vinemewa Ayapan gae meuma anoya.

<sup>11</sup> ✧God Poru naniwa gumbe irayauyau kokavit ane.

### *At Epesas Apa Irayauyau Ane*

<sup>12</sup> ✧Poru me atop go wape kapet tuiwiwa atan tam yuwat igiyawa gumbo tenewa, yuwat kwemne ge airapu kukaeba dauwag amiya.

<sup>13</sup> Ju igiyawa mu airapu kukaeba danowo wakeyawa dauwag amtan oya nauwawa emewa mu ampa amdau amome. Mu upeba airapu kukaeba danowo wakeyawa gumbo Ayapan Iesu iviwa gumbe ageyau gumbe waya, “Poru opata waivi Iesu iviwa gumbe ne diruieni.” <sup>14</sup> Ju pirisi kokawa iviwa Seva usitainawa 7 mame meis aya. <sup>15</sup> Sira Airapu kukaeba garawa gumbo wane, “Ne Iesu yang anona sira Poru gaibu yang anona, go ye bira?”

<sup>16</sup> Airapu kukaeba danave wakenewa pisiak egowo dauwane sira mu duwam yan emamne sira mu undag gudne. Meoya mu taibe aya siget boya gwe yan kweg kin tog dauwag amiya. <sup>17</sup> ✧Mame Ju ge Griisu igiyawa undag at Epesas

apa vinemewa yang anoya. Sira mu a gaibu ake Ayapan Iesu iviwa enagasiya. <sup>18</sup> Sira anotumat aya igiyawa obiren uwak dividivi mu emewa taibe vesiya. <sup>19</sup> Kwasisim dum emewa obiren bukaeba tam uwaya iyayapan yangowo okeriya. Mu garawa basiyag toborayawa garawa 50,000 siruva koin mina. <sup>20</sup> Epin mamaib. Ayapan gaiyawa wateteyamiya koka ane sira me yusiwa kokavit aivi.

<sup>21</sup> ✧ Dividivi mame undag matadne onananewa, Guwawa Poru toyau wanne. Me gumbe me Masedonia ge Akaia yapave gaveyag uwag Jerusarem aitan oya anone. Me wane, “Ne namu Jerusarem anakna ivi Romu gaibu yautna.” <sup>22</sup> Meoya me nauwawa emewa duwam Timoti ge Erastas tene Masedonia amiya. Poru me membo ande at Esia apa kusi pipi wakene.

### *Epesas Apa Wayug Wayug Aya*

<sup>23</sup> ✧ Me kumiwa apa ebu mame gumbe wayug wayug koka yaig yoine. <sup>24</sup> Siruva gumbe warivi abnawa iviwa Demetrius wakene. Me siruva gumbe Arutemis god gweyawa kusikusiwa waramivi. Nanuwo wareme igiyawa anmaga kokavit munivi. <sup>25</sup> Sira me nanuwo wareme igiyawa ge nau desiroma igiyawa dirumne undagit desirom agoniyaya. Me wane, “Iyayapan undag. Ye anoyana nu nau mame gumbe anmaga kokavit tamete. <sup>26</sup> Ye yavene sira anoene. Apan mame Poru at Epesas danave mekut onan Koni Esia danave undag iyayapan obiren gae yu-sipam gumbe toyau munivi mu anopipanum aya.

Me waivi, ‘God iyayapn nanuwo waremewa me god onan.’ <sup>27</sup> Nu nau numawa waropiyatan ete sira iyayapan nau numawa oraimina sira den wape. Iyayapan god vesinawa kokawa Arutemis gweyawa matai den anope, sira Esia undag ge piyu undag god vesinawa eyawa meuma waiyeme, go eyawa meuma aiktan aivi.”

<sup>28</sup> Mu mame anoya mu danowo piripiriwane sira amatog kwaruveme, “Epesas igiyawa muma Arutemis me kokawa.” <sup>29</sup> ✧Sira gwetoimu undag wayug wayug aya, sira iyayapan mu Masedonia igiyawa Gaias ge Aristarukas yumamiya. Mu Poru gaibu gigemewa. Iyayapan undag kuiyowa desirom ane kae eme gweyawa danave igemat unigiya. <sup>30</sup> Poru imive iyayapan danowo uniktan anoivi, megara aigo meuma me toboriya. <sup>31</sup> Esia danave nau koka eme igiyawa mu Poru eve-baiwa. Mu gae aug aiviwa menan barauk toborak waya, kae eme gweyawa danave den uniga.

<sup>32</sup> Daiboru danave anopipanum. Iyayapan obiren den yaug anoya divi oya agoniyaya, me oya mu gae kuiyawa ubeube kwaruwaya. <sup>33</sup> Ju igiyawa mu apan me Arekisanda namuwo itaraya. Sira iyayapan upeba gae watan oya me diya. Meoya me naniwa viyane iyayapan namuwo wasiwamtan watan anoivi. <sup>34</sup> Megara mu yaug anoya me Ju abnawa, sira mu undag nouwa desirom ande kwaruveme kum koniwa duwam mina, “Epesas vesin goddeba numa me kokavitwa.”

<sup>35</sup> Gwetoim koka gigirum tete abnawa me

---

✧ **19:29:** Apa 20:4; 27:2; 1Ko 4:10; Prm 24

iyayapan undag nouwa tobot mun wane, “Iyayapan neuma Epesas igiyawa. Gwetoimu Epesas me god vesinawa kokavitwa Arutemis ge me guwawa me kwimin apa aig onnewa amaraivi. Bira da den yaug anone? <sup>36</sup> Mame natawa nu oma den ane topayata. Meoya ye noiwa iyaigisia, sira igemat den di aya. <sup>37</sup> Iyayapan mame ye tam oniyana, mu den aya temporu miyot ane, sira mu god vesinawa gae kukaeba den waya. <sup>38</sup> Meoya Demetrius ge me owawaiwa nau desiroma emewa mu gunat gumbo atan ape ipewa, keptetan kumiwa wakene, sira at amareme igiyawa wakeya, meoya desirom desirom pui yutan oya keptetan arawa ampe. <sup>39</sup> Ye gae guniyap obiren ipewa, gwangwan daiboru kokawa gumbe gae wag yugeyau ape. <sup>40</sup> Gare mame wayug wayug gaiyawa oya, asiwa apa natawa oraimina onan. Meoya wayug wayug mame oya, anten wakukam yempe go. Mame oya nu oma den ane ye waita yenta.” <sup>41</sup> Meib wag daiboru onanane dauwag amiya.

## 20

### *Poru Masedonia Ge Griisu Aine*

<sup>1</sup> Wayug wayug onanane, ivi Poru aigowawa oya auwane agoniyag yutuwa munne, sira dirumwane wakeyo, sira Masedonia oya kweg aine. <sup>2</sup> Sira at me gumbe uwag aine, tatawaiwa gumbo gae dadi wag yutuwa munne. Meve Griisu uwane. <sup>3</sup> Poru me apa dud duwamdesi wakene. Me wa gumbe Siria aitan aivi, megara me kumiwa apa Ju igiyawa me gumbe ano guwavewa

eme, meoya anog namu Masedonia aikape meve sira taig aitan anone. <sup>4</sup> Berea apan Sopateru me Pairas usiwa, ge Tesaronika apan duwam Aristarukas ge Sekandas, ge Derube apan Gaias, ge Timoti, sira Esia apan Titikas ge Tropimas mu Poru aigo waniya. <sup>5</sup> Mu namu wait amiya, sira at Troas apa nunan amareme. <sup>6</sup> Iist Onan Bredi Buyunaeba onanane, sira nu wa gumbe at Piripi kwetune. Oiyat 5 onanane, meve at Troas apa undagit toboratune, sira oiyat 7 asime apa waketu.

### *Yutikas Boane Sira Inanine*

<sup>7</sup> Pura amatonewa apa, nu undagit agoniyatu breidi warensitan oya. Me kumiwa apa, Poru oiyat umae kwetan anone iyayapan gumbo gae waivi aram nub bagiwa uwane. <sup>8</sup> Gwe egadodot siyawa danave dun dadi, me apa nu agoniyag gae watune. <sup>9</sup> Apan mataiwa iviwa Yutikas gwe kwanogawa apa yan wakeivi. Me yangawa kub emne, sira Poru gae meuma yobutatae waivinewa, me kubvinne imiwa atataine, sira me gwe danawa egavewa duwamdesiyawa apa piyu egave uyug aigne. Wan auyawa, me wait boane. <sup>10</sup> Poru aig onne, me egave toketam vinne, sira me enagadne, wane, “Den a aya. Me inaivi.” <sup>11</sup> Me sira dog aine, breidi wasig nane, sira gae dirumivine wantene, meve kweg aine. <sup>12</sup> Iyayapan mu apan mataiwa me sira inainewa auwag gwe amiya, sira watmemeyam kokavit amunne.

### *Poru Me Troas Apa Miretas Aine*

<sup>13</sup> Meve nu namu wa danave dauwatune, Asos oya antune. Nu Asos apa Poru wa danave dauwatan oya anotune, kuiyawa Poru imive amave aitan. <sup>14</sup> At Asos apa Poru nutusa nunne, meve me wa danave entu, sira Mitrene antune. <sup>15</sup> Meapa wa gumbe antune, wantene at Kiyosu poeman danave uwatune, sira oiyat dawa at Samos uwatune, sira oiyat dawa at Miretas uwatune. <sup>16</sup> Poru imive Epesas atan kweg yapave togomiyane at asime uwatan oya anone, kuiyawa at Esia danave me kum waropiyatan den anone. Me imive Pentekost kumiwa danave at Jerusarem apa waketan anone, meoya me tatevit aivi.

<sup>17</sup> ✧ Poru me Miretas apa umum igiyawa tene Epesas amiya, sira Epesas siosi namuyoiyai igiyawa munan auwane. <sup>18</sup> ✧ Mu agoniyayawa, Poru dirum wane. “Ne at Esia uwana. Me kumiwa apa onne gare mame ne aninin ye gaibu kum evedni vineniwa, ye yaug anoyana. <sup>19</sup> Ne mokona kokavit gumbe sira it gaibu, sira edawai obiren me Ju igiyawa amaorot mumawa negiyawa danave ne Ayapan numa nauwawa ana. <sup>20</sup> Dividivi undag me waita yeniyawa ne toyau yenna sira topai den ana. Iyapan namuwa sira gwe gwe gumbe ne toyau yenna. <sup>21</sup> Ne Ju igiyawa ge Griisu igiyawa gumbo taibe wanawa, mu nonemagowa biroriyag God gumbe sira amtanit di sira Ayapan numawa Iesu gumbe anotumat atanit di.

<sup>22</sup> Ne gare Guwanwa tunedne Jerusarem anjeni. Ne den yaug anoeni divi ne gunap asimeve

matatpe. <sup>23</sup> ✧Toimu desirom desirom danave Guwawa Iyakaisiyapama taibe toyau nedne. Ne yaug anonawa, murap gumbe tunektan ge dawai autan nenan amareme. <sup>24</sup> ✧Megara ne ebu angeniwa undag kintotna oma ape ipewa, sira nau neuma me Ayapan Iesu nednewa undag atna oma ape ipewa, ne inaiinai neuma oma ape waropiyatna. Nau neumawa me God ano oraiwa meuma gae oraiwa dirumpna taibe ape.

<sup>25</sup> Yauya. Ye yapeyap aneg God toimuwawa oya opata yenna. Megara gare mame di ne yaug anona ginanganwa sira den yauya. <sup>26</sup> Meoya ne gare mapa wat kinieni. Iyayapan undag pui mumawa oya, me ne anoeniwa onan. <sup>27</sup> Kuyawa ne God anoano meuma undag yenan wana onanane. <sup>28</sup> ✧Ye yembovit ge iyayapan yeuma undag oya amat munigimiya. Guwawa Iyakaisiyapama me yenan iyayapan namuyoioyi mumawa ane. Kuyawa me ye God siosi meuma me God diyawa meuma gumbe gwiruwadnewa amaratan oya. <sup>29</sup> ✧Ne anoeniwa ye kwe yempnawa, mae urup muripama ye guniyap matai wakukam yempe. <sup>30</sup> Ye yapeyap upeba matai gae ugauga gumbe aigowawa upeba tamepe mumawa ape. <sup>31</sup> ✧Meoya yaukapa. Ne bairawan 3 danave oiyat ge aram evedni it gaibu ye desirom desirom toyau yeneni. Garawapa imug anoigimiya.

<sup>32</sup> Sira gare, God ge ano oraiwa meuma gaiyawa yenan naniyap baraueni. Gae meumawa oma ane yenan amat yempe sira koka aya, sira me

---

✧ **20:23:** Apa 9:16; 21:11 ✧ **20:24:** Apa 21:13; 2Ti 4:7 ✧ **20:28:** 1Ti 4:16; 1Pi 5:2-4 ✧ **20:29:** Mat 7:15; Jon 10:12 ✧ **20:31:** 1Te 2:11



oma ane iyayapan undag mu iyakaisi ayawa danave ye kwan matai auya. <sup>33</sup> ✧ Ne iyayapan gooru ge siruva go wape mumawa den autan anona. <sup>34</sup> ✧ Ye yaug anoyana. Naninwa mame ne wakewake neuma oya sira ne gaibu wakeemewa muma oya nau wariya. <sup>35</sup> Ne dividivi undag ye toyau yeneni. Nu meib iyayapan mu yusiwa onanwa gumbo waita muntanit di. Sira nu imug anota Ayapan Iesu membovit wanewa gaiyawa, ‘Wantanwa me waribiya koka, sira autanwa me waribiya kusi.’ ”

<sup>36</sup> Poru meib wane onanane, sira konive yug iyayapan undag gaibu nun waya. <sup>37</sup> Iyayapan undag iruwaya, sira Poru meyave yum obiren uwatoya. <sup>38</sup> Sira mu danadawai koka Poru gaiyawa gumbe auya, kuiyawa me wane, “Ye ginanganwa sira den di yauya.” Meve Poru wa autanwa oya mu me aigoyag amiya.

## 21

### *Poru Jerusarem Oya Aivi*

<sup>1</sup> Nu mu kwemtu wa gumbe antu, sira at Kosu siwavit uwatu. Oiyat umae at Rodes uwatu, sira me apa at Patara antu. <sup>2</sup> Me apa nu wa me at Penisia aitan aivi yautune, meoya wa me gerave dauwag antune. <sup>3</sup> Koni pipi me apa Saipras yautu. Sira naniketaiwa apa me yaug, Siria oya sira yunat antune, sira at Taiya apa aigtune. Kuiyawa me apa wa numa tawara mumawa aiktanwa anoeme. <sup>4</sup> ✧ Nu aigowawa upeba yawamtu, me

---

✧ **20:33:** 1Ko 9:11-12   ✧ **20:34:** Apa 18:3; 1Te 2:9   ✧ **21:4:** Apa 20:23

apa oiyat 7 waketu. Guwawa gumbe mu Poru dig waya at Jerusarem oya den di aipe. <sup>5</sup> Kum mame onananewa, nu at me apa kweg antune. Mu undag bivituiwa ge usitainawa gaibu agoniyag sira nu gaibu wemun antu gwetoimu daieve angek uwatu. Sira poeman visive uwag koninup yug nun watune. <sup>6</sup> Meve nu garawa watu aisiyo. Sira wa danave dauwag unigtu, mu gwe muma taig amiya.

<sup>7</sup> Nu at Taiya apa amatog wa gumbe onantu, nu Ptoremis uwatune. Me apa nu tatanaiwa baigan muntu, sira oiyat desiroi mu gaibu waketune. <sup>8</sup> ✧ Oiyat umae me apa kwetu Sesariya uwatu. Me apa apan 7 gomiyamuniya mu danowo desirom me gae oraiwa opata veme igiyawa da Pirip wakene. Nu me gweyave waketu. <sup>9</sup> Apan mame gwaitowaiwa otaw 4 gaibu mu God gaiyawa vewewa.

<sup>10</sup> ✧ Nu oiyat upeba mepe waketunewa, propeta iviwa Agabas Judia apa aig uwane. <sup>11</sup> ✧ Me nu gunup uwane, sira Poru berip meuma aune. Me naniwa ge amawa berip gumbe tug wane, “Guwawa Iyakaisiyapama me waivinewa, ‘Ju igiyawa mu apan me berip mame gaibuwa mamaib Jerusarem apa tupe, sira mu me Ju onan igiyawa nanuwo baraupe.’”

<sup>12</sup> Nu mame anotunewa, nu sira iyayapan upeba gaibu Poru gumbe nun watune Jerusarem den aipe. <sup>13</sup> ✧ Meve Poru garawa wane, “Ye mamaib nenan iruvene sira nonenmagawa toenguriyana. Divi oya meib ene? Ne tamibarip ana

---

✧ **21:8:** Apa 6:5; 8:40   ✧ **21:10:** Apa 11:28   ✧ **21:11:** Apa 20:23; 21:33   ✧ **21:13:** Apa 20:24

Ayapan Iesu iviwa oya, Jerusarem danave murap gumbe den tunekpe go tonekpe boatna, me meiba ne gunap bairda.” <sup>14</sup> Me nu gae numawa autan den anonewa, nu ditune, “Ayapan me anoiviwa ape,” meve nounuwa tobottu divi da den watu.

<sup>15</sup> Kum mame onananewa, nu a atan oya tamibarip atune, sira Jerusarem dog antu. <sup>16</sup> Sesariya aigowawa upeba nu gaibu antune, sira Saipras apan Manason me aigowawa namuwa gumbe mu tam nuniya antune. Asimeve waketan anotune.

### *Poru Jerusarem Apa Uwane*

<sup>17</sup> Jerusarem uwag tatanaiwa degadega gumbe baigan nuniya. <sup>18</sup> Oiyat umae, Poru nu tam nunne sira Jemus oya amdau antune. Asimeve namuyoiyoi igiyawa undagit agoniyag wakeya. <sup>19</sup> ✧Poru mu baigan munne, sira me nauwawa gumbe God aninin Ju onan igiyawa danave anewa, desirom desirom amatog waivine.

<sup>20</sup> ✧Mu mame anoya sira God gumbe watdega aya, sira Poru gumbe mamaib waya, “Tatunwa, ge yang anoana, Ju igiyawa danave anotumat emewa 10,000 egave animpo mina dadi wakeya. Mu undag anoemewa Gwangwan me yaigipamit yumnasiemewa me kokawa di. <sup>21</sup> Mu mamaib veme. Usitainawa gumbo kwapuwa den tuiyampe sira kuinui numa gumbe den wakeigimpe. Meib, ge Ju igiyawa mu Ju onan igiyawa danave wakeemewa Mosisi topai atan oya toyau munege. <sup>22</sup> Meve nu aninin aton? Mu

---

✧ 21:19: Apa 15:12 ✧ 21:20: Apa 15:1,5

anoeme di ge uwana. <sup>23</sup> ✧ Meoya nu dirutawa garawapa ge a. Nu gunup apan undag 4 mu God gumbe agi ayawa. <sup>24</sup> Mu tam aga, sira kwapugwa mu gaibu wat muina, sira kuiyowa gumawa tuipe oya garawa baraua. Ge meib a ipewa, iyayapan undag yaug anope mu genan oya anoemewa me natawa onan, ge gwangwan gumbe yaimoyai wakeegewa. <sup>25</sup> ✧ Ju onan igiyawa mu anotumat emewa gumbo nu wat kiniyatunewa mamaib. Mae puyowawa me god ugaugaeba gumbe waniyawa, sira diyawa, ge mae me meyakoniwa yuemewa, ge uinantaraki emewa mu topai atanit di. Nu munan wait gigirum tetune.”

<sup>26</sup> ✧ Meoya Poru iyayapan mu tamne, sira oiyat umae undagit wat muinamne sira temporu arawa danave unigiya, sira muinnewa kumiwa onananewa, apan desirom desirom oya puyo wanigimtanwa kumiwa dirumne.

### *Mu Poru Yum Auya*

<sup>27</sup> Megara oiyat 7 koni onanatan aiviwa, Ju igiyawa mu at Esia apa onamiyawa Poru temporu arawa danave wakene yauya, meoya mu iyayapan obiren dirum waya mu uwa danowa kwaiya. Mu nanuwo kwapive barauya, <sup>28</sup> sira kwaruwaya, “Isuraeru igiyawa, waita nuniya! Apan mame me at undag apa iyayapan undag toyau toyau munivi, iyayapan numawa, Gwangwan numawa ge at mame oya garadodot ataneme. Sira megiyave Griisu apan aug temporu arawa danave unig onne, sira at iyakaisiyapama

---

✧ **21:23:** Nam 6:1-20; Apa 18:18 ✧ **21:25:** Apa 15:29 ✧ **21:26:** 1Ko 9:20

mame miyot miyot ane.” <sup>29</sup> ✧Watavit mu yauya Epesas apan Tropimas gaibu Poru me gwetoimu danave wakeya. Meoya mu gwambe anoya Poru me aug temporu arawa danave unig onamiya.

<sup>30</sup> Sira meve gwetoimu undag ege aig waya, sira iyayapan Poru gumbé kintog amiya sira me yumiya, sira me aug temporu arawa daieve ororiyak amiya. Ankwin tatevit toboriya. <sup>31</sup> Sira mu me totanwa oya anog emewa, umum me mut namuyoiyoi abnawa kokawa gumbé uwane. At undag Jerusarem danave wayug wayug eme. <sup>32</sup> Me tatevit mut igiyawa ge senturion\* tam munan amiya. Iyayapan mu mut namuyoiyoi abnawa kokawa ge mut igiyawa yawamiyawa Poru toemewa yankweya.

<sup>33</sup> Mut namuyoiyoi abnawa kokawa me Poru gumbé uwag yumtune, sira aiyan murapeba sein duwam gumbé tutan dirum wane. Meve singui wanewa, Poru me bira sira me dimbae ane?

<sup>34</sup> Megara iyayapan obiren danowo upeba dividivi muma oya kwaruwaya, sira upeba dividivi muma oya kwaruwaya, meoya wayug wayug oya me oma den ane natawa yaug anone. Meoya mut namuyoiyoi abnawa kokawa me dirum wane Poru aug mut igiyawa gweyowa ampe. <sup>35</sup> Poru tet apa uwaiviwa, mut igiyawa Poru painau wan auya, kuiyawa iyayapan dadi me totanwa oya eme. <sup>36</sup> ✧Kuiyawa iyayapan obiren amowo omome kwaruvemewa, “Me toya.”

### *Poru Iyayapan Obiren Gumbo Opata Wane*

---

✧ **21:29:** Apa 20:4      \* **21:32:** Me mut igiyawa 100 amaraivi abnawa.      ✧ **21:36:** Ruk 23:18

<sup>37</sup> Mu Poru aug mut igiyawa gweyowa danave unig amomewa, mut namuyoiyoi abnawa kokawa gumbe Poru wane, “Ne oma ane gae ge dirukna?” Mut igiyawa namuyoiyoi abnawa kokawa wane, “Ge gae Griik vege? <sup>38</sup> ✧Ge Ejipt apan me wayug wayug namu aivi sira mut igiyawa 4,000 mina gaibu at inguiwa arawa a amiyawa?”

<sup>39</sup> Poru garawa wane, “Ne Ju abnawa me Sirisia danave Tarusas apan, sira ne toimu me abnawa di. Garawapa ne kwenega iyayapan gae dirumpna.”

<sup>40</sup> Mut namuyoiyoi abnawa kokawa dig wane gae wape, meve Poru tet egave yoine, sira iyayapan gumbo naniwa viyane. Sira mu undag noi iyadmusiawa, me gae Ibru gumbe gae mamaib dirum wane.

## 22

<sup>1</sup> “Tatangwanen ge mamana iwa. Gare mame yenan paparavintan eniwa watna ye anoya.”

<sup>2</sup> Poru gae Ibru gumbe waivinewa anoyawa, mu undagit di noi iyadmusia.

Meoya Poru gae di yunad waivi. <sup>3</sup> ✧“Ne Ju abnawa me Sirisia danave Tarusas apa yainawa. Ne toimu me danave koka ana, sira Gamarieru ankwatave wagonaiwa Gwangwan mumawa oya yaigipamit gigirumawa tena. Ye undag gare enewa mina ne God oya kokavit anona. <sup>4</sup> ✧Ne ebu mame gumbe edawai munna, murap gumbe apan vesin tuwamna, nog danave emena, sira

---

✧ 21:38: Apa 5:36-37 ✧ 22:3: Apa 5:34 ✧ 22:4: Apa 8:3

upeba boriruwaya. <sup>5</sup> Mame oya, pirisi painauvitwa ge iyayapan koukawa daiboru koka muma mu nenan taibe wape. Ne gigirum mumawa me iyayapan mame tatawaiwa oya teyawa auna, sira Damaskas oya kweg anedna. Kuiyawa nu me apa wakeyawa igiyawa tuwam, mu tam Jerusarem ongetan sira ibnawa muntan oya.

<sup>6</sup> Meve angeniwa kum kuiyunup apa, ne Damaskas koni uwatan eniwa, tatevit eyawa kokavit gunap birorot yune esine. <sup>7</sup> Ne piyu egave aidnawa, noiwa anona nenan wane, ‘Sauru, Sauru, ge divi oya edawai nege?’

<sup>8</sup> Meve ne garawa wana, ‘Ayapan, ge bira?’ Apan asime garawa wanewa, ‘Ne Nasaret apan Iesu me edawai negegewa.’ <sup>9</sup> Iyayapan mu ne gunap wakeyawa eyawa asime yauya sira a aya, megara me noiwa me nenan waiwiwa mu yaiyai den yaug anoya.

<sup>10</sup> Ne singui wana, ‘Ayapan, ne divi atna?’ Ayapan nenan wane, ‘Wan yoiya, Damaskas aga. Asime apa divi ge atanwa matai ge dirukpe.’

<sup>11</sup> Megara eyawa yusiwa meuma oya yanganwa oma den ane yangut ana. Iyayapan mu ne gaibuwa naninap aug Damaskas unigiya.

<sup>12</sup> Me apa apan da iviwa Ananias wakene. Me Gwangwan numa gumbe anotumat oraiwa aiviwa abnawa, sira me me apa wakeemewa Ju igiyawa undag me apa wakeemewa danowo mu menan ebnotu eme. <sup>13</sup> Ananias uwag ne megianap yoig wane, ‘Tatan Sauru, oma ane ge yawa.’ Sira me koniwa apa ne oma ane apan me yauna.

14 Me mamaib wane, 'Isimuranaiwa God mu-mawa me genan wat kiniyane, sira me ano meuma yaug anoa, sira Ayapan oraiwa yawa, sira gae meuma noive waiviwa anoa. 15 Ge yangagap yaug anoanawa a, sira iyayapan undag gumbo ge divi yawanawa sira anoanawa diruma anope. 16 Divi oya topai ege? Wan yoiya. Me iviwa gumbe babataito a, sira kukaeba geuma muina.'

17 Mamaib ne Jerusarem sira taig anedna, sira temporu arawa danave nun veniwa, ne uyavi mina vinna, 18 ✧sira Ayapan yauna. Ayapan gae waivi, 'Tate Jerusarem gare mame di kweg aga, kuiyawa nenan oya taibe wanawa mu den anog aupe.'

19 ✧Meve ne garawa wana, 'Ayapan, mu yaug anoya ne sinagogu dada dana anotumat genan eme igiyawa tam nog danave tena, sira murap gumbe gudna. 20 ✧Sira Stepen me genan boinewa diyawa aignewa, ne me apa wakena, sira yutuwa munna, sira me toeme igiyawa wape muma amareni.'

21 ✧Meve Ayapan ne didneg wane, 'Aga, ne ge baraugentna aramawa Ju onan igiyawa gumbo.'"

### *Poru Me Romu Sinsin Apan*

22 Iyayapan Poru gae wag mame waiviwa anoeme, megara gare mame kwaruwaya, "Apan mame minawa piyu egave atan auya. Me tota di boipe."

---

✧ 22:18: Apa 9:29-30 ✧ 22:19: Apa 8:3; 26:9-11 ✧ 22:20: Apa 8:1 ✧ 22:21: Apa 9:15



<sup>23</sup> Meve iyayapan boboi ge kwaruwaya, wape muma painau emiya, sira atapupu owan kwiminu emiya. <sup>24</sup> Meoya mut namuyoiyoi abnawa kokawa dirumnewa Poru aug mut igiyawa gweyowa unig ampe. Sira me yaug anotan anoivi divi oya iyayapan kwat Poru gumbe mamaib veme. Meoya me dirumne me murap gumbe tog singui ape. <sup>25</sup> ✧ Mu Poru murap gumbe me totanwa oya tuyawa, Poru senturion\* me asime yokeivinewa dig wane, “Keptete den baraune sira Romu sinsin apan murap gumbe tope, me baina go?”

<sup>26</sup> Senturion mame anonewa, me mut namuyoiyoi abnawa kokawa menan aine umum dine, “Ge divi a? Apan asime me Romu sinsin apan.”

<sup>27</sup> Mut namuyoiyoi abnawa kokawa me Poru menan aine singui ane, “Ne didnega, ge Romu sinsin apan?” Poru wane, “E, ne meme.”

<sup>28</sup> Meve mut namuyoiyoi abnawa kokawa wane, “Ne sinsin apan atan oya anmaga koka barauna.” Meve Poru wane, “Ne Romu sinsin danave yoina.”

<sup>29</sup> ✧ Meoya iyayapan mu Poru gumbe singui watan emewa, tatevit me gumbe atan siririyag amiya. Sira mut namuyoiyoi abnawa kokawa yaug anone Poru me Romu sinsin apan, me a ane kuiyawa murap sein gumbe Poru tuya.

### *Daiboru Kokavitwa Namive*

<sup>30</sup> Oiyat umae, mut namuyoiyoi abnawa kokawa me divi oya Ju igiyawa mu Poru gumbe keptete barautan oya anotan anoivi, meoya me

---

✧ **22:25:** Apa 16:37      \* **22:25:** Me mut igiyawa 100 amaraivi abnawa.      ✧ **22:29:** Apa 16:38

dirum wane Poru aiyan murapeba sein gumbe tuyanawa atan vesiya. Sira me dirum wane pirisi koukawa ge Daiboru Painauvitwa igiyawa undag agoniyape, Poru aug amiya, sira namuwo yoine.

## 23

<sup>1</sup> Meve Poru Daiboru Painauvitwa tem yawam dirum wane, “Owanaiwa, ne gare mame God namive anog vinan ongeniwa imug imug oraiwa gumbe.” <sup>2</sup> ✧Sira pirisi painauvitwa Ananias me iyayapan mu Poru megiyave yoiemewa gumbo dirum wanewa, Poru noive toya. <sup>3</sup> ✧Me ku-miwa apa Poru me gumbe wane, “Ge bogigi me pupuyu wadnewa! God matai ge towakpe. Ge Gwangwan gumbe matai pui yunettan arawa apa wakeege, megara ge Gwangwan togomege sira mu ne tonektan oya dirumana?”

<sup>4</sup> Meve iyayapan mu megiyave yoiemewa waya, “God pirisi painauvitwa gumbe ge gae gwambe vege?”

<sup>5</sup> ✧Meoya Poru garawa wane, “Owanaiwa, ne den yaug anona me pirisi painauvitwa. Baiboru tenewa, ‘Iyayapan namuyoiyoi abnawa muma gumbo gae gwambe den wa.’”

<sup>6</sup> ✧Megara Poru yaug anone iyayapan upeba mu Sadusi igiyawa upeba mu Parisi igiyawa, Daiboru Painauvitwa danave kwaruwane, “Owanaiwa, ne Parisi abnawa sira Parisi usiwa. Mu ne pui yunegeme boriruguayawa mu matai sira inaig yoipewa anoetewa oya.” <sup>7</sup> Me mame wanewa, Parisi igiyawa ge Sadusi igiyawa yapowo garadi

---

✧ 23:2: Jon 18:22-23   ✧ 23:3: Mat 23:27   ✧ 23:5: Eks 22:28

✧ 23:6: Apa 26:5

aya. Sira Daiboru Painauvitwa me kuiya 2 to-gomiyaya. <sup>8</sup> ✧Kuiyawa Sadusi igiyawa wayawa, sira inaig yoitanwa onan, aneya den wakene, sira guwawa den wakene. Megara Parisi igiyawa wayawa mame undag wakeya.

<sup>9</sup> Wayug wayug koka aivi sira Gwangwan toewanewan upeba mu Parisi igiyawa muma wan yoiya sira gae yaigipam dirumeme waya, “Nu oma den ane yautune dividivi kukaeba da apan mame gumbe. Anten guwawa go aneya me gumbe wane go?” <sup>10</sup> Garadi kokavit emewa, mut namuyoiyoi abnawa kokawa me Poru gumbe danadawai aune, kuiyawa mu Poru matai tog kesia kesia ape anoivi. Me mut igiyawa dirum wane aig Poru yutuwa gumbe aug mut igiyawa gweyowa ampe.

<sup>11</sup> ✧Aram me danave Ayapan Poru megiyave yoig wane, “Yusiyusi a. Ge Jerusarem apa nenan oya gae wana. Meib ge Romu danave gaibu gae wa.”

### *Poru Totan Oya Ju Igiyawa Kigemuk Waya*

<sup>12</sup> Wantenewa, Ju igiyawa agoniyaya sira agi wayawa, namu Poru tope boipe, ivi mu nakwai ge yoi nape. <sup>13</sup> Kigemuk mame wayawa me iyayapan 40 sira egave mina. <sup>14</sup> Mu pirisi koukawa ge iyayapan namu yoiyoi igiyawa gumbo amiya waya, “Nu agi yusipamit watunewa, namu nu Poru tota boipe ivi divi da nata. <sup>15</sup> ✧Gare mame ye sira Daiboru Painauvitwa gaibu ugauga ag, mut namuyoiyoi abnawa kokawa gumbe mamaib nun waya, nu Poru sira yautan anoete meoya

---

✧ **23:8:** Mat 22:23   ✧ **23:11:** Apa 27:24; 28:16,23   ✧ **23:15:** Apa 25:3

Poru aug nunan onampe. Nu tamibarip atune Poru asime uwaigimpewa nu me tota boipe.”

<sup>16</sup> Megara Poru yogiyawa usiwa kigemuk mame anonewa, me mut igiyawa gweyowa gumbe aig Poru dine.

<sup>17</sup> Meve Poru me senturion da auwag wane, “Garawapa apan mataiwa mame mut namuyoiyoi abnawa kokawa gumbe aug aga. Me umum da gaibu me ditan.” <sup>18</sup> Senturion me apan mame aug mut namuyoiyoi abnawa kokawa gumbe aine sira wane, “Nog abnawa Poru nenan auwane sira nun wanewa, apan mataiwa mame umum geumawa me gumbe wakene, meoya me genan ompe.”

<sup>19</sup> Mut namuyoiyoi abnawa kokawa nanive aug atan aine sira singui ane, “Divi ge didnektan anoenge?”

<sup>20</sup> Me garawa wane, “Ju igiyawa mamaib ung waya. Mu Poru gumbe yaug anotan oya ugauga ape. Sira genan nun wapewa ge umae Poru aug Daiboru Painauvitwa gumbe onaga. <sup>21</sup> Garawapa gae muma den auwa. Kuyawa iyayapan 40 egave mina agi wayawa, namu Poru tope boipe, ivi mu nakwai ge yoi nape. Mu menan amareme. Gare mame di mu tamibarip aya onanane, mu amareme ge nun muma autan oya.”

<sup>22</sup> Meve mut namuyoiyoi abnawa kokawa dig wane, “Iyayapan da den diruma ge mame did neganawa,” sira apan mataiwa kwene aine.

### *Poru Barauya At Sesariya Aine*

<sup>23</sup> Sira me senturion duwam munan auwane sira dirumne, “Mut igiyawa amowo amomewa

200, mut igiyawa mu mae osi egave amomewa 70, sira apan mut tamiyawa 200 tamiya tamibarip aya, aram gare kum koniwa 9 aupewa at Sesariya ampe oya.”<sup>24</sup> Sira amaraiviwa kokawa Perikus gumbe Poru yaiyai me aug ampe oya, mae osi upeba Poru waniya egave aitan oya.

<sup>25</sup> Sira me mamaib gigirum tene.

<sup>26</sup> “Kraudias Raisias, Amaraiviwa koka numawa Perikus gaun neuma ge gungap.

<sup>27</sup> ✧Ju igiyawa mu apan mame aug totan emewa, ne yang anona me Romu sinsin. Meoya ne mut igiyawa neuma tam onedna, sira menan papara vinna. <sup>28</sup> ✧Ne yang anotan anona divi oya mu me oya pui yuya, meoya ne wana me Ju Daiboru Painauvitwa muma gumbe aug amiya. <sup>29</sup> Sira yang anona mu me oya pui yuyawa, me singui me Ju Gwangwan mumawa gumbe. Megara yang anona me kukaeba me gumbe onan bo atanwa go nog aitanwa oya. <sup>30</sup> ✧Megara ne apan mame oya kigemuk umumawa auna. Meoya ne tatevit genan barauna onne. Sira ne iyayapan mu me oya pui yuemewa gumbo dirum wanawa, ge namugap ye pui me yuya.”

<sup>31</sup> Meve me dirum wanewa mina, mut igiyawa mu Poru aug at Antipatris oya arampuna amiya.

<sup>32</sup> Oiyat umae, mut igiyawa mae osi egave amomewa kwemiya Poru gaibu amtan oya, sira mut igiyawa amowo mut gweyawa taig amiya. <sup>33</sup> Mut

---

✧ **23:27:** Apa 21:30-33; 22:25-27 ✧ **23:28:** Apa 22:30 ✧ **23:30:** Apa 23:16-23; 24:1-9

igiyawa mae osi egave amomewa at Sesariya uwaya, amaraiviwa kokawa ghirum waniya, sira Poru nanive barauya. <sup>34</sup> Amaraiviwa kokawa me ghirum basianewa, Poru gumbe singui ane me at ambuwa toimuwawa abnawa. Sira me yaug anone Poru me at Sirisia apan, <sup>35</sup> sira wane, “Namu iyayapan mu ge oya pui yuwagemewa onampe, ivi ne singui gentna.” Sira dirum wanewa Poru yaiyai amarape Erod gweyawa kokawa danave.

## 24

### *Keptete Arawa Perikus Namive*

<sup>1</sup> Sira oiyat 5 onananeve, pirisi painauvitwa Ananias me iyayapan namuyoiyoi igiyawa ge papara aivi abnawa iviwa Teruturas gaibu Sesariya aig amiya. Meve mu namuyoiyoi abnawa kokawa namive Poru gumbe pui yuya. <sup>2</sup> Meve Poru auwaya unignewa Teruturas amatog pui yuwanne wane, “Kokawa numa Perikus, ge gungap nu degadega ete, ge ankwatagap yum oraimina auete, sira ge anoano oraiwa geuma gumbe at mame danave yaiyai oraimina biroriyaivi. <sup>3</sup> Nu dividivi oraiwa mame at ampa ampa danave yautu, meoya gaun ge gungap vete. <sup>4</sup> Gare ge gungap ne den ibnawa gentna, meoya ne gae pipi mame dirukna. Garawapa gae neuma anoa ebnotu geuma gumbe.

<sup>5</sup> ✧Apan mame me yuwat iviwa Pesto mina, sira Ju igiyawa mu piyu mame undag danave wa-keemewa mu yapowo waivi mut darat waivi. Me namuyoiyoi abnawa Nasaret kuiya da danave.

---

✧ 24:5: Apa 17:6

6 ✨Apan mame me temporu miyot miyot atan aivi, meoya nu me yumtune. 7 (-)\* 8 Apan koka numawa Perikus, ge gembovit dividivi mame yobag yawawa, ge matai yang anoa divi oya nu me diyag vete.”

9 Ju igiyawa gaibu ung waya me anoano meuma oya, sira waya undag mame natawa di.

10 Meve amaraiviwa kokawa me Poru gumbe naniwa yune sira wane Poru gae watan oya. Meoya Poru garawa wane, “Ne anona apan koka numawa ge bairawan dadi iyayapan oya keptete ege abnawa, meoya ne degadega gumbe nembo oya papara vintna. 11 Ge yaiyai yobawa yang anoa, ne God waiyatan oya Jerusarem dog anedna, sira me apa onnewa gare oiyat 12 mina onanaivi. 12 Sira bira da den yaunedne, temporu arawa danave, sinagogu danave, gwetoimu koka danave ne bira da gaibu diguragut etewa, sira iyayapan gaibu nu wayug wayug etewa. 13 Mu pui yunegemewa oya mu matai natawa da oma den ane toyau gempe. 14 Megara ne namugap taibe watna, epin me Ju igiyawa wayawa anotumat ugaugaeba gumbe ne isimuranaiwa God numawa waiyaeni. Dividivi undag me Gwangwan ge Propeta bukaeba danave tenewa ne anotumat eni. 15 ✨Sira iyayapan mame gaibu anoeme mina, ne imug imug God gumbe anoeniwa, apan oraiwa

---

✨ 24:6: Apa 21:28-30 \* 24:7: Namu tenewa da V6ge V8yapave gae mamaib wakeya: V6 oieba, Nu me keptetan antune Gwangwan gumbe. V7 Megara namuyoiyai kokawa Raisias uwag nu naninup yusiwa gumbe me venun aine. V8 Sira me nu didnunnewa nu genan ongetan. (Apan koka numawa Perikus...)

✨ 24:15: Jon 5:28-29

ge apan kukaeba matai bo gumbe sira inaimutpe.  
<sup>16</sup> Meoya ne kum evedni oraivitwa neuma eni,  
 God ge iyayapan namuwo mu pui den yunekpe.

<sup>17</sup> Namu bairawan dadi onanane, ivi ne evenaiwa gumbo dividivi muntan oya ge puyo barautan oya sira taig onedna. <sup>18</sup> ✧Puyo asime oya, nenan muiinne sira ne temporu arawa danave unig wakenawa, mu ne yaunegiya. Megara iyayapan dadi den wakeya sira garawa den eme. Ju igiyawa upeba mu Esia apa onamiyawa mu mukut wakeya. <sup>19</sup> Mu anoano muma oya pui yunektan anoeme ipewa, mu namugap onam ne pui yunekpe di. <sup>20</sup> Go, iyayapan mu mapa wakeemewa kwemna wape divi kukaeba neuma yauyawa ne Daiboru Painauvitwa namive yoinawa kumiwa apa. <sup>21</sup> ✧Ne yapowo yoinawa, ne divi desirom kwaruwanawa, ‘Ye gare mame pui yunegenewa boriruwayawa sira inaimut yoipe oya.’”

<sup>22</sup> ✧Megara Perikus Ebu mame oya anoano kokawa yaug anone, meoya me wane, “Mut namuyoiyai abnawa kokawa Raisias aig ompewa, kukaeba yeuma mame waribiyata,” sira keptete kumiwa utuban barautan oya wane. <sup>23</sup> Meve me senturion† gumbe dig wanewa, Poru aug danave yangut yaiyai yavigimpe. Megara Poru ui onan kwepe wakeigimpe, meve owawaiwa oma ane Poru me amaraigimpe.

<sup>24</sup> Oiyat upeba onanane, Perikus me biviwa Drusira me Ju vesinawa aug onne, sira Poru

---

✧ **24:18:** Apa 21:17-28   ✧ **24:21:** Apa 23:6   ✧ **24:22:** Apa 23:26   † **24:23:** Me mut igiyawa 100 amaraivi abnawa.



auwane. Meve me Keriso Iesu gumbe anotumat aiviwa gaiyawa wane anoya. <sup>25</sup> Megara Poru dirum wane oraiminawa ge numbo amat numawa ge pui yutanwa kumiwa oniviwa oya, meoya Perikus a ag wane, “Gare mame ge oma ane gwe sira taig aga. Kum da ne genan auwatna.” <sup>26</sup> Kum desirom me apa, me anoiviwa Poru gumbe anmagawa guwawe aupe, meoya me Poru oya kum dada menan auwane me gaibu gae waya.

<sup>27</sup> Bairawan duwam onananewa, Porukias Pestas me Perikus nau meuma aune. Megara Perikus imive Ju igiyawa degadega atan oya me Poru kwene nog dana ande wakene.

## 25

### *Poru Siisa Keptete Meuma Namive Yoitan Anone*

<sup>1</sup> Pestas me at meuma amaratan oya uwane, sira oiyat duwamdesi onananewa Sesariya apa Jerusarem dog aine. <sup>2</sup> ✧ Meve pirisi koukawa ge Ju namuyoiyoi igiyawa mu onamiya Poru pui yuya. <sup>3</sup> ✧ Mu nun wayawa Pestas me baigan gumbe munan atan oya, sira nun wayawa Poru aug Jerusarem onampe. Kuiyawa mu iyayapan upeba dirumiya ebu taibe Poru amareme me totan oya. <sup>4</sup> Megara Pestas garawa wane, “Poru me Sesariya apa nog dana wakene, sira ne gare mame di taig anakna. <sup>5</sup> Meoya me gumbe dividivi kukaeba wakepewa, namuyoiyoi igiyawa yeuma ne gaibu aig anta, sira me gumbe pui yuya.”

---

✧ 25:2: Apa 24:1 ✧ 25:3: Apa 23:15

<sup>6</sup> Pestas oiyat dawa 8 go 10 mina mu gaibu wakeya, Sesariya aig aine. Oiyat umae, kepteiviwa danave me arawa egave wakene, me wane Poru aug unig onampe. <sup>7</sup> ✧Poru uwanewa, Ju igiyawa mu Jerusarem apa aig onamiyawa Poru gumbe birorot yoiya, sira amatog kukaeba koka meuma oya dig waya, megara oma den ane yaiyai natawa watkiniyaya.

<sup>8</sup> Megara Poru membovit oya papara vin wane, “Ne divi da kukaeba den ana Ju igiyawa Gwangwan muma gumbe, go temporu gumbe, go Siisa gumbe.”\*

<sup>9</sup> Megara Pestas anoiviwa Ju igiyawa degadega ape, meoya singui Poru gumbe wane, “Ge imugap Jerusarem agetan anoege dividivi mame oya namnap kepteya?”

<sup>10</sup> Meve Poru garawa wane, “Ne Siisa keptete meuma namive yoieniwa, ne mapa keptete atan eni oraimina. Ge gembo yaug anoana, ne Ju igiyawa gumbo kukaeba da den ana. <sup>11</sup> Kukaeba da oya boatan apopowa, ne a den atna ne bo atna. Megara dividivi me iyayapan mame pui yunegemewa natawa onan. Bira da oma den ane nenan aug nanuwo baraupe. Ne Siisa gumbe keptete atan oya nun watna.”

<sup>12</sup> Me kumive Pestas gae waya iyayapan mu wakeyawa gaibu, sira garawa wane, “Ge Siisa gumbe keptete atan oya nun wanawa, Siisa gumbe aga.”

### *Pestas Me Kin Agrippa Gaibu Gae Wayawa*

---

✧ 25:7: Apa 24:5-6      \* 25:8: Siisa me Romu ayapaneba.

<sup>13</sup> Oiyat dawa upeba onanane, kin Agrippa ge Berunike Pestas ebnotu wantan oya Sesariya uwaya. <sup>14</sup> ✧ Mu me apa kum dadi wakeyawa, Pestas kin gumbe Poru wakeiviwa oya dine, “Apan da nog danave wakene me Perikus kwenewa. <sup>15</sup> Ne Jerusarem anednawa, piri si ge Ju namuyoiyoi igiyawa ne did negiya sira nun waya apan mame me kukaeba oya dima yuya.

<sup>16</sup> Me kumiwa apa, ne garawa dirum wana, ‘Bira da me kukaeba iyayapan pui yupewa, me oma ane pui yueme igiyawa namuwo membo oya parau vimpe. Parau den vimpe ipewa, me matai boatan den baraupe aipe. Me Romu gwangwan muma wanewa.’ <sup>17</sup> Meoya iyayapan mu kukaeba meuma pui yuemewa mapa agoniyayawa, ne kum den waropiyana oiyat uma e Tatevit keptete arawa egave wakena, sira apan asime kwena dauwag onne. <sup>18</sup> Iyayapan mu kukaeba meuma pui yuemewa wan yoiya, megara kukaeba meuma anoeniwa oya mu desirom da den waya. <sup>19</sup> Dividivi mumawa me gae yugeyau wayawa me anotumat mumawa oya, sira apan iviwa Iesu me boinewa oya. Poru wane Iesu sira inaig wakene. <sup>20</sup> Ne den di yaug anona dividivi mame aninin yum tam atna, meoya menan singui ana, ‘Ge imugap Jerusarem aga, sira dividivi mame oya keptete atan anoege?’ <sup>21</sup> Megara Poru imive wakenewa, namu me aug amarape, ivi Romu ayapaneba me keptete danave gae meuma wape. Meoya ne dirum wana namu aug amarape, ivi Siisa gumbe me aug ampe.”

---

✧ **25:14:** Apa 24:27

<sup>22</sup> Meve Agrippa me Pestas gumbe wane, “Ne anoeniwa apan mame membovit gaiyawa anotna.” Pestas garawa wane, “Umaipa ge gae meuma anoa.”

*Poru Agrippa Namive*

<sup>23</sup> Meoya oiyat umae, Agrippa ge Berunike mu ben muma oraivitwa wat uwaya, sira mu gae anoemewa gweyawa unigiya mut igiyawa namuyoiyoi koukawa ge toimu namuyoiyoi igiyawa gaibu. Meve Pestas dirum wanewa, Poru aug unig onamiya. <sup>24</sup> Sira Pestas wane, “Kin Agrippa ge iyayapan undag mapa waketuwa, yauya. Ju igiyawa undag Jerusarem danave ge mapa Sesariya danave kwaruwaya me tope boitan di, sira kukaeba meuma nenan vemewa me apan mame oya. <sup>25</sup> Ne anoeniwa me bo atan oya divi da den ane. Megara me membovit Romu ayapaneba† gumbe keptete atan wane, meoya ne yaug anonawa me barautna asime aipe. <sup>26</sup> Megara Kokavitwa neuma gumbe me oya tetan oya divi da natawa ne gunap onan. Meoya ye undag namuyap, sira kin Agrippa, ge genan oya aug onedna. Gae meuma yaug anotawa, ivi gimirum tetan oya divi da autnave. <sup>27</sup> Kuyawa nog abnawa barautan aipe oya kukaeba meuma dimbae gimirum den tetnawa, me oraimina onan.”

## 26

<sup>1</sup> Meve Agrippa me Poru gumbe wane, “Ge oma ane gae wa gembo oya.” Meoya Poru naniwa dimne membovit oya amatog papara vinne.

---

† 25:25: Namu tenewa dawa vemewa, me Siisa go Augustus.

<sup>2</sup> “Kin Agrippa. Ne degadega eni, kuiyawa ne gare mame oma ane nembo oya papara vintna divi da undag me Ju igiyawa pui yunegemewa oya.

<sup>3</sup> Kuiyawa me genan, Ju igiyawa anoano muma ge ibnawa muma oya ge yaiyai yaug anoana. Garawapa nenan naunagwa taiya ebnotu gumbe.

<sup>4</sup> Gare mame di gae watna. Ne aninin vinan namuiren iyayapan neuma danowo wakeeniwa, sira Jerusarem danave ne ud toranap onne gare mame aninin wakeeniwa Ju igiyawa undag yaug anoya. <sup>5</sup> ✧ Ne namuiren onne gare mame yaunek anoya, meoya mu oma ane nenan oya gae wape. Dam numawa me yaigipamitwa anotumat numawa danave, sira ne Parisi abnawa ag wakena onne gare mame. <sup>6</sup> ✧ Sira gare mame, keptetan oya yoinawa me owanowan me God numawa me isimuranaiwa gumbo agiyawa anewa oya. <sup>7</sup> Dam 12 numawa mu aram ge kum God gumbe nau yusipamit eme. Mu imug imug muma agi natawa yautan ge autan anoeme. Kin neuma, ne anoeniwa mame gumbe Ju igiyawa mu nenan pui yunegeme. <sup>8</sup> God oma ane boriruwayawa sira wape inai mutpe, divi oya ye me anotumat den ene?

<sup>9</sup> ✧ Watavit ne gaibu anona ne Nasaret apan Iesu iviwa gumbe anavi yusipamit atanit di. <sup>10</sup> Ne Jerusarem danave meib ana di. Pirisi koukawa mu yusiwa negiya, iyayapan iyakaisi dadi nog danave tena, mu guremewa ne ung wana. <sup>11</sup> Sira ne kum evedni sinagogu dada gumbe angeni mu nau ibnapam atan oya. Ne ayamuneni gae

kukaeba wape. Ne ginanganwa pipau toivine, sira toimu upeba apa mu edawai muntan oya anedna.

<sup>12</sup> Mamaib pirisi koukawa mu yusiwa negiya, sira Damaskas oya angeniwa, <sup>13</sup> epin taibe kum kuiyunup apa, kin neuma, ne yauna eyawa me kokavit kum eyawa mina onan kwimin apa aig onne. Me ne ge ne gaibu angetewa igiyawa gunup birorot yune. <sup>14</sup> Nu undag piyu egave petat aiktu, sira ne noiwa nenan gae Ibru gumbe waivine anona, ‘Sauru Sauru, divi oya ne edawai negege? Yoma gaut ganaganapam gumbe amagap toawa, me ge gungap dawaiba.’

<sup>15</sup> Ne wana, ‘Ayapan, ge bira?’

Me garawa wane, ‘Ne Iesu me ge edawai negegewa. <sup>16</sup> Kuiyagwa enagata, sira amagap wan yoiya. Ne genan uwanawa me ge nau neuma atan abnawa a sira yangagap yawanawa watan abnawa a. Ne ge kini ageneni. Ge diruma divi da ge yawanawa sira divi da ne matai genan uwag toyau gentnawa. <sup>17</sup> Ne matai genan parau vintna iyayapan geuma ge Ju onan igiyawa danowo, meve munan ne baraugeneni aga. <sup>18</sup> ✧Ne mu yangowa muma watapna, sira mu sisip gumbe te muntna. Seitan yusiwa gumbe biroriyag God gumbe onampe. Anotumat gunap eme igiyawa, kukaeba muma anog yankwetna, sira mu God toimuwawa aupe iyayapan iyakaisi danowo.’

<sup>19</sup> Meoya kin Agrippa, ne ugegeyawa kwim-inauwa gumbe ebnotu topai den ana. <sup>20</sup> Ne namu Damaskas igiyawa gumbo opata wana, sira ivi

---

✧ **26:18:** Ais 42:16; Epe 2:2; 1Ko 1:13

Jerusarem igiyawa, Judia danave undag sira Ju onan igiyawa gumbo gaibu. Ne opata wanawa mu nonemagowa biroriyag God gumbe sira amtanit di, sira mu nonemagowa biroriyayawa toyau muntanit di emewa gumbe. <sup>21</sup> Meoya Ju igiyawa temporu arawa danave ne aunegiya, sira ageyau eme tonektanwa oya eme. <sup>22</sup> Sira kum me apa on gare mame uwane. God waitawaita nedne yusiyusi yoina, sira kusikusiwa ge koukawa gumbo ne gae dirum wana. Propeta igiyawa ge Mosisi waya aninin matai veniyapewa. Ne me mekut dirum wana. Divi upeba da den dirum wana. <sup>23</sup> ✧ Mu wayawa, Keriso edawai aupe, sira bo gumbe inaipe, meve iyayapan meuma ge Ju onan igiyawa gumbo namuiren eyawa oya dirumpe.”

<sup>24</sup> Poru meis parau viniviwa, Pestas noiwa kokavit wane, “Poru, ge kuiyagwa kukaine. Ge anoano kokavit anoana, meoya ge kuiyagwa kukaine.”

<sup>25</sup> Meve Poru mamaib wane, “Kokawa neuma Pestas, ne kuiyanwa yaiyai nau aivi. Ne gae natawa di veni. <sup>26</sup> Kin dividivi mame yaiyai yang anone, kin gumbe ne siwavit gae veni. Dividivi mame nib yuniwa apa den pawane, meoya ne anoeni dividivi undag mame kin gumbe guwawe da onan. <sup>27</sup> Kin Agrippa, ge propeta gumbo anotumat ege? Ne anoeniwa ge anotumat ege.”

<sup>28</sup> Sira Agrippa Poru dine, “Kum pipi danave, ne Kristian atan oya ge yusiyusi ege.”

<sup>29</sup> Poru garawa wane, “Kum pipi go yobe me divi da onan. Ne imunap gekut oya onan,

---

✧ **26:23:** Ruk 24:44-47; 1Ko 15:20

megara iyayapan undag mu gae neuma gare mame anoemewa ne minan ape, megara murap mame tunegiyawa oya den anoeni.”

<sup>30</sup> Me apa, kin ge namuyoiyoi kokawa ge Berunike sira iyayapan upeba mu asime wakeyawa wan yoiya. <sup>31</sup> Mu dauwag taibe amiyawa, gae garawa veme, “Apan asime me bo atanwa go nog aitan oya divi da den aivi.”

<sup>32</sup> Sira meve Agrippa me Pestas dine, “Apan mame Siisa gumbe keptete oya nun den wanewa, ne anoeni me taibe dauwag aipa.”

## 27

### *Poru Wa Gumbe Romu Aitan Aivi*

<sup>1</sup> Gare mu yang anoyawa, nu wa gumbe Itari angetan ete. Poru ge nog igiyawa upeba mu senturion iviwa Jurias nanive teya. Me Romu kokavitwa mut igiyawa meuma danave wake-newa. <sup>2</sup> ✧ Nu Adramaitium wa meuma danave dauwag kweg antu. Wa mame at toimu ampa ampa Esia danave unig dauwag aitan aiviwa. At Tesaronika danave Masedonia apan Aristarukas me nu gaibu.

<sup>3</sup> Oiyat umae at Saidon uniktu. Jurias baigan gumbe Poru amaraivi, sira ung wane Poru me owawaiwa oya aipe baigan gumbe ape. <sup>4</sup> Me apa nu dauwag antu, megara taig gud nunnewa, Saipras megiyave antu. <sup>5</sup> Sira Sirisia ge Pampiria poeman danave antune, sira at Maira toimu Rusia danave uniktu. <sup>6</sup> Asimeve Arekisandria wa meuma me Itari aitan aiviwa wakene, senturion\*

✧ 27:2: Apa 19:29

\* 27:6: Me mut igiyawa 100 amaraivi

abnawa.



me yaune, sira wane nu wa asime dauwatu. <sup>7</sup> Kum upeba danave wa ekekenut aivine. Sira nu at Kunidas poeman meuma yusiyusi ag uwatune. Megara taig koka anewa nu oma den ane sira angetan, meoya nu at Kurete me poeman Sarumone apa wakenewa visive antu. <sup>8</sup> Poeman visive angete, yusiyusi ag angek at iviwa waya wa yoiviwa arawa oraiwa uniktu. At me megiyave, at Rasea gwetoimu wakene.

<sup>9</sup> Kum koka waropiyatu, sira kwit kumiwa wait onanane, meoya wa gumbe angetanwa me kukaeba, Poru dirum wane, <sup>10</sup> “Iyayapan neuma, ne anoeniwa a numawa mame danave kukaeba pawatan aivi, tawara ge wa mame mukut onan inaiinai numawa gaibu kukaeba uwanuntan aivi.” <sup>11</sup> Megara senturion me wa yumnasiviwa abnawa ge wa mamawa anotumat yusipamit ane. Poru wanewa me anotumat yusipamit den ane. <sup>12</sup> Sira wa yoiviwa arawa mame me baina onan taig kumiwa danave waketanwa oya, meoya iyayapan dadi wayawa maib, mame kweta, sira oma ape ipewa Kurete danave wa yoivi arawa Penikus anta—me sausuwest ge noosuwest gumbe wakenewa anta, sira taig kumiwa at me apa waketa.

### *Taig Koka Uwane*

<sup>13</sup> Sira taig memeyaivinewa sausu apa uwanewa, iyayapan kum mame di apa wa anika† ororiyaya dauwane, at Kurete ginayapawa visive

---

† **27:13:** Me marakibubu mina. Wa yokenewa marakibubu minawa yoi dana aoreeme. Wa aitanwa oya me ororieme dauwaivi.

angete. <sup>14</sup> Megara kum koni yobe onan, taig koka iviwa Yurokraidon† me tui ge pawawa apa aig onne. <sup>15</sup> Wa taig yumnadnewa, oma den ane wa aine taig manne. Meoya wa kwetune ingan aivi. <sup>16</sup> Megara wa me ginayapawa kusi iviwa Kauda megiyave aivi, meoya nu oma ane yusiyusi ag wa kusi yumnattu. <sup>17</sup> Nu wa kusi enagattu wa kokawa danave barautu, sira murap me wait tamibarip ayawa gumbe tutune. Sira wa me at Sirutes togewa apa aitan aivine nu a atune, meoya nu wa anika meuma barautu poeman danave aigne wa inganit aivine. <sup>18</sup> Taig koka gumbe aig ge dauwa antune, sira oiyat umae iyayapan amatog tawara upeba wa danave wakeyawa emetune. <sup>19</sup> Oiyat duwamdesi apa, nu nanuwo wa dividivi meumawa upeba tam epa emeya. <sup>20</sup> Nu oma den ane kum ge marantun yawamtu, oiyat upeba onanane, taig koka ande toivinewa, oieba nu gob waitawaita oya anog yankwetu.

<sup>21</sup> Bira da kum obiren nakwai da den naya, meoya Poru namuwo yoig dirum wane, “Iyayapan neuma, ne gae neuma aug wa gumbe at Kurete ginayapawa apa den onantuwa, nu kukaeba mame ge waropiyatanwa den gaveyapono. <sup>22</sup> Megara gare mame di ne wasiwam yeneni. Yusiyusi aya. Ye daneyap undag da bira inaiinai den waropiyape. Wa mekut waropiyata. <sup>23</sup> Watau arampuna, God nauwawa eniwa aneyaeba namunap yoine, <sup>24</sup> ✧ me wane, ‘Poru, den a a. Ge Siisa namive

---

† 27:14: Me taig koka nosuiist apa oniviwa. ✧ 27:24: Apa 23:11

yoitanit di. Sira God me iyayapan undag mu wa danave ge gaibu wakeyawa genna.’ <sup>25</sup> Meoya iyayapan neuma, yusiyusi aya. Ne God gumbe anotumat eniwa, dividivi undag me matai veniyape wait ne didnednewa mina. <sup>26</sup> ✧Nu matai ampa ginayapawa visive angetanit di.”

### *Wa Koka Kukaine*

<sup>27</sup> Oiyat 14 onanane, aram sisipuna danave, nu poeman Adria apa aig ge dauwa etewa, aram nub bagiwa apa wa nau eme igiyawa anoyawa, wa me piyu da uwatan aivi. <sup>28</sup> Mu poeman epampa meuma aninin om wariyawa, mu yang anoya epampa meumawa 40 mitas mina. Sira utunut siririyaya sira om wariyawa me 30 mitas mina. <sup>29</sup> Mu anogugut ayawa me an koka poeman danave dauwapetan, meoya wa anika duwam ge duwam wa virive apa emiya sira wantetan oya amareme. <sup>30</sup> Megara wa nau eme igiyawa wa gumbe a amotan eme, sira mu ugauga ake wa anika aoretan oya eme, wa kusi barauya poeman egave ekekenut aigivi. <sup>31</sup> Meoya Poru me senturion ge mut igiyawa dirum wane, “Wa danave iyayapan mame den wakepe ipewa, ye gaibu waitawaita den auya.” <sup>32</sup> Meve mut igiyawa wa kusi murap meuma togomiyaya kweya ingan aine.

<sup>33</sup> Wanteivi omome, Poru wasiwam munne undag nakwai natan oya, “Ye amarene amarene, onne gare nakwai da den nayana, oiyat 14 onanane. <sup>34</sup> Meoya ne ye diruiyeni nakwai naya. Mame ye sira yutuiwa yempe oya. Kuiyegumewa

---

✧ 27:26: Apa 28:1

danave desirom da den waropiyape.” <sup>35</sup> Meib wane, sira breidi aune iyayapan undag namuwo God gumbe gaun wane, sira warensig amatog nane. <sup>36</sup> Meve iyayapan yutuwa auya, sira amatog nakwai naya. <sup>37</sup> Nu wa danave waketuwa undag 276. <sup>38</sup> Undag nakwai kokavit naya oma ane, meve wa beumatan oya mu nakwai wiit emeya poeman danave aigeaya.

<sup>39</sup> Wantenewa, mu at piyu ginangawa yaiyai den yang anoya, megara mu awau eg baraune yauyawa, mu imuwo awau uniktan anoya. <sup>40</sup> Wa anika murapeba togomiyaya poeman danave aigne, me koniwa apa murap barauk tuyawa vesiya, sira wa wapeyawa taig autan oya wan yuya dauwane, sira awau noiwa oya amome. <sup>41</sup> Sira togewa me apa yoi poeman danave kintoiviwa duwam uwagaveya eme, meoya wa togewa apa yabnadne. Wa kuiyawa yabnadne aitanwa oma den ane, sira yawarat yusipamitwa wa viriwa yabnewa, me amatog dumedne.

<sup>42</sup> Mut igiyawa garawano ayawa mu nog igiyawa undag gutpe boriruwape, kuiyawa nog igiyawa oi tek a ampewa me baina onan me kukaine. <sup>43-44</sup> Megara senturion anoiviwa me Poru waita wantan. Meoya me mu anoemewa topayane. Me dirum wanewa namu birabira oma ane oi teemewa pisiag aigiya poeman danave sira piyu egave dauwape, ivi iyayapan upeba yoma peyawa ge wa peyawa upeba yumnat oeteg ampe. Meib aya, sira iyayapan undag piyu egave yaiyai dauwaya.

## 28

### *At Maruta Ginayapawa Apa*

<sup>1</sup> Meib nu waita autuwa, yaug anotu at mame me ginayapawa mu waya Maruta. <sup>2</sup> ✧ Ginayapawa mame igiyawa mu inaiinai nugunup oraimina di aya. Me kumiwa apa uvin uwane taig wadnunne, meoya mu iyam okeriya baigan muma oraimina nugunup aya. <sup>3</sup> Poru yoma gedoapam aug iyam yangave aorenawa, iyam amiwa gumbe mokare kukaeba gedo danave dauwane, me Poru naniwa adne. <sup>4</sup> Ginayapawa igiyawa yauya mokare nanive geroriyane, sira gae garawa aya, “Apan mame iyayapan gurivi nu den pimpan gitta. Me poeman gumbe waita aune, megara vesin goddeba oraiminawa me yan den kweya vinigimpe.” <sup>5</sup> ✧ Megara Poru mokare naniwa geroriyanewa iyam danave totarane, me divi da den wakukamne. <sup>6</sup> ✧ Ginayapawa igiyawa mu anoemewa gare mame di tampe sira uyug aig tatevit botope. Meoya mu amareme. Megara divi da den matadne, mu anoemewa biroriyag amatog waya, “Apan mame me god.”

<sup>7</sup> At asime megiyave, namuyoiyoi abnawa painau iviwa Pabrius me piyu meuma wakene. Me nu angetan wanewa nu antu, sira me nu baigan kokavit gunup ane oiyat duwamdesi onanane. <sup>8</sup> Me kumiwa apa, me mamawa yuwarane ui amiwa ge ni yoipam tuivi gumbe viniviwa arawa apa wakeivi. Meoya Poru apan

asime oya aig nun wane, naniwa egave baraune me oraimina ane. <sup>9</sup> Mame anewa, ginayapawa igiyawa yuwat gaibu upeba onamiya yuwat muma gumbe inaimusia. <sup>10</sup> Sira mu munan ebnotu kokavit aya, sira nu wa gumbe dauwag antunewa mu tawara obiren nu imunup anoetewa nunan tamibarip aya.

### *Poru Me Romu Aivi*

<sup>11</sup> Dud duwamdesi onanane, nu wa gumbe dauwag antu. Me Arekisandria wa meuma, me taig kumiwa apa ginayapawa mame apa wakenewa, me wa kuiyave naturup goddeba ivuwa Kasta ge Porakus teyawa. <sup>12</sup> Nu Sirakiusu antu, sira kum duwamdesi waketu. <sup>13</sup> Asime apa nu wa gumbe dauwag antu, sira at Regium uwatu. Kum desirom onananewa taig me sausu apa amatog tone, meoya oiyat dawa Puteori uwatune. <sup>14</sup> Meapa nu tatanaiwa upeba yawamtu, sira didnuniyawa kum 7 danave mu gaibu waketu. Mame mina nu Romu uwatu. <sup>15</sup> Tatangwanen nunan anoyawa, mu nu yau nuntan oya Romu apa at Api Porum ge at Tores Tavans onamiya. Poru mu yawam God gumbe gaun wane, mu ano yusiwa waniya.

### *Poru Romu Danave*

<sup>16</sup> Nu Romu uwatuwa, Poru mut igiyawa gaibu gwe dana vintan ung waya.

<sup>17</sup> Kum duwamdesi onanane. Poru Ju igiyawa koukawa agoniyatan oya wane, sira mu agoniyayawa Poru mu dirum wane, “Ne tatanaiwa, ne divi da den ana. Iyayapan neuma gumbo sira isimuranaiwa anoano muma gumbe kukaeba

den ana. Megara Jerusarem apa mu yum negiya sira Romu igiyawa nanuwo baraunegiya.

<sup>18</sup> ✧ Romu igiyawa yaimoyai yaunegiya, megara ne bo atan oya natawa da den yauyawa, mu anoemewa matai kwenetpe dauwag anetna.

<sup>19</sup> ✧ Megara Ju igiyawa mu topai aya, meoya ne Siisa gumbe keptete atan oya nun wana. Natawa meib, ne owanaiwa gumbo pui den yuwameni.

<sup>20</sup> ✧ Kuiyawa mame oya, ne imunap ye yavetna sira ye gaibu gae watna, meoya ye guniyap ongetan wana. Isuraeru owanowan oya ne murap gumbe tunegiya.”

<sup>21</sup> Meve mu waya, “Nu umum genan da den autune Judia gumbe. Sira nu owanaiwa upeba mapa onamiya, megara mu gumbo bira da genan gae gwambe den toyau nuniya, sira gwambe den waya. <sup>22</sup> ✧ Nu anoetewa ge divi anoegewa siwavitwa anotanwa me oraimina di. Nu anotuwa anotumat dam mame gumbe at obiren apa iyayapan pui yuwameme.”

<sup>23</sup> Sira mu gae yuya kum desirom, meve iyayapan obiren gaibu Poru gwe me apa wakenewa mu uwaya. Poru me gae mumbe wag onivi aram uwane. Me God toimuwawa oya gae wane, sira Mosisi Gwangwan ge propeta bukaeba oya wag, mu toyau munivi Iesu oya. <sup>24</sup> Iyayapan upeba mu me dimbae wanewa gumbe anotumat eme, megara iyayapan upeba mu anotumat den eme.

<sup>25</sup> Mame mina, mu anoemewa desirom den ane, sira mu taig amomewa, Poru gae desirom wane,

---

✧ **28:18:** Apa 26:31 ✧ **28:19:** Apa 25:11 ✧ **28:20:** Apa 26:6-7

✧ **28:22:** Apa 24:14

“Guwawa Iyakaisiyapama me Aisaya gumbe me isimureaiwa gumbo wanewa me me di.

<sup>26</sup> ✧ ‘Iyayapan mame gumbo ag diruma.

Ye anoene, megara den di yaug anoya;  
ye yavene, megara den di yaug anoya.

<sup>27</sup> Kuyawa iyayapan mame nonowa e den sivi,  
mu naunowa boredne,  
sira mu yangowa abumiya.

Mu yangowo den yaveme.

Mu naunowo den anoeme, nonomagave den  
yaug anoeme,  
sira nonomagawa den tobieme. Ne den warina-  
muntna.’

<sup>28</sup> Meoya yaug anoya. Waita waita mame God  
meuma baraune Ju onan igiyawa gumbo aine.  
Mu matai anope.” <sup>29</sup> (-)\*

<sup>30</sup> Mame mina, Poru bairawan duwam danave  
gwe me anmaga meuma gumbe koni pipi  
vinigimtanwa oya aunewa apa vinivi, sira  
iyayapan me gumbe amdau onamiyawa undag  
me baigan gumbo ane. <sup>31</sup> Me yusipamit, sira  
bira da me gumbe tobottanwa onan di, God  
toimuwawa oya gae taibe dirum wag Ayapan  
Iesu Keriso oya toyau munne.

---

✧ **28:26:** Ais 6:9-10      \* **28:29:** V29 den wakene. Megara namu  
tenewa dawa da mamaib waivi. V29: Ju igiyawa yankweg amiya.  
Mu mumbovit kokavit wa ge yau yusipamit eme.



**GAE MATAIWA**  
**The New Testament in the Maiwa language of Papua**  
**New Guinea**  
**Nupela Testamen long tokples Maiwa long Niugini**

copyright © 2011 Wycliffe Bible Translators, Inc.

Language: Maiwa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

---

PDF generated using Haiola and XeLaTeX on 11 Nov 2022 from source files dated 9 Oct 2020

45dcb14f-9541-5013-8907-63bcfabcd6b5